

秋

笳

集附錄

一



成集書叢

編初

者編主
五雲王

行發館書印務商



集 笈 秋
錄 附
(一)



3 0645 2006 1

撰 纂 兆 吳

本館據粵雅堂叢
書本排印初編各
叢書僅有此本

秋笳集小引

弟兆宜願令撰

蓋聞山禽鐵羽。怨四子之分飛。庭樹敷榮。歎三荆之同本。是以靡依參佐。愛比機雲。家藏賜書。學同彪固。茱萸兩地。寄摩詰之幽憂。春草一塘。勞惠連之夢寐。余兄漢槎。以惠子五車。陳王七步。琉璃雕管。題成芍藥之工。翡翠筆牀。篇擅芙蓉之譽。何來謠詠。遽悼漂離。馬伏波之薏苡。溪水墮鳶。移中監之毳毛。塞天齧雪。迢遙紫土。水咽松花。灑迤黃雲。關寒榆葉。托嘶馬以長征。望孤鴻而永慟。穹廬靜夜。遙聽邊笳。刁斗凌風。時聞塢笛。蒲萄藏貴相之谷。豈易消憂。琵琶調馬上之絃。徒然增感。此執珪所以越吟。而軍府爲之南操者也。况夫鶴鬪萬里。萱背無依。雞塞頻年。棣華空茂。帛書雁足。向南望而程遙。尺素魚鱗。思北馳而路渺。夏連積雪之嶺。疇念衣單。秋轉飛蓬之根。獨憐衰草。遂使垂虹烟柳。限若羊腸。笠澤爲花。杳如馬角。鉞衣遠戍。蕭條銀磧之聲。牙帳從軍。憔悴金微之客。嗟乎。生存華屋。子建以之哀吟。貧賤親離。顏遠因而悲咽。陶彭澤有停雲之作。孫子荆有零雨之篇。緬彼安居。尙多感慨。矧伊遠謫。能不凄其。山是構茲危苦。抒彼勞歌。命曰秋笳。彙成一集。陳子公之關河城邑。並入縹囊。郭景純之山海圖經。咸盈赤軸。聊述窮鳥之賦。用當塞客之吟。健菴先生。標俊及之鴻名。推藝林之淵府。三虎聯鑣。登鼉頭而縹緲。九龍齊奮。搏鸞翼以逍遙。身旣托于重霄。情彌深于舊雨。慷慨緜袍之戀。清俸時捐。徘徊歧路之隅。芳訊屢及。讀定遠玉關

之札。側望沾襟。接都尉塞外之詩。悲涼實涕。迺謀劄。以壽棗梨。將令開府思鄉。人頌江南之賦。若使孝儀歸國。家貽使北之書。余慙居第五之名。兼切在三之義。春風秋月。溯景淑而羣離。暑雨祁寒。驚節序而滋戚。時披華製。以代萱蘇。敢藉短翰。而仰斧藻。自此蔡女清笳之拍。樂府俱傳。晏子脫駟之恩。故人共感云爾。

秋笳前集卷五序

練水盟弟侯元泓研德撰

漢槎吳季子。今之賈生終童也。出其餘技。爲歌詩。才名籍甚吳楚閒。與予遇於虎阜。抵掌莫逆。遂出詩編。屬余弁語。予結髮誦詩。自成童時。常與兄弟朋好。跌宕江湖。有唱有答。然終不能名一家。十餘年閒。洊被傾覆。羣從凋喪。嚮者雕蟲末技。兵燹散亡。而予益頽然廢放。漸收聲華。如溝斷散櫟。以不才求全矣。雖然。風雅之原。聲情之本。酒酣狂來。尙能爲季子言之。夫詩之爲用者。聲也。聲之所以用者。情也。豳風二南。二雅三頌。或出於婦人小夫。衝口率志之作。或出於元臣碩老。諷諭賦述之言。泳洙休明。抒寫道德。情盛而聲自叶焉。遂登樂章。歌薦朝廟。此天下之真聲也。若夫情曼者。其聲嘽。情伉者。其聲厲。情危者。其聲烈。情豫者。其聲揚。是數者。雖詭於和。而情之所激。皆足以鏗鏘律呂。感動鬼神。相鼠之詩。其聲率。山樞之詩。其聲迫。迫且率。而仲尼不刪者。爲其情真也。真故不諱其激。有激極而和之勢焉。此亦聲亞也。六季三唐。刻鏤組繪。南北二宋。披猖率埜。聲情交叶。什無二三。何大復常謂唐初四子。音節可誦。子美調失流轉。予初韙之。然究其所撰。明月篇。聲浮於情。學者從是矯宋元之過。相與規步音響。趨摹格調。而天下之情隱者。亦大復爲之戎首也。數十年以來。聲盛者情僞。情真者聲俗。兩家之說。戛然不入。而其不諧真樂。則同。終亦成其兩僞而已矣。予雖稍有窺見。自愧能知而不作。悠悠塵渣。莫可爲盡也。竊願焉。季子以其髻鬣之

歲。嶮。江。楚。弔。沅。湘。指。衡。霍。劍。槩。相。摩。龍。虎。爭。搏。華。年。盛。氣。掉。臂。出。沒。乎。其。閒。故。其。爲。人。英。朗。雋。健。忠。孝。激。發。凡。感。時。恨。別。弔。古。懷。賢。流。連。物。色。之。製。莫。不。寄。趣。哀。涼。遺。音。婉。麗。情。盛。而。聲。叶。非。季。子。其。孰。能。及。之。而。予。回。首。昔。時。與。兄。弟。上。潯。陽。經。廬。嶽。分。曹。課。句。睥。睨。爭。雄。銜。杯。一。笑。江。波。振。起。今。日。獨。與。季。子。談。河。山。之。變。遷。數。風。雲。之。滅。沒。燈。燭。酒。闌。騷。屑。偃。蹇。其。能。無。樂。極。而。哀。來。婆。娑。而。弔。影。乎。雖。然。季。子。伯。兄。宏。人。以。其。文。章。器。識。領。袖。羣。彥。仲。子。聞。夏。撰。述。英。多。一。時。屈。讐。與。予。兄。弟。交。十。餘。年。猶。兄。弟。也。季。子。出。而。玉。振。之。予。不。孤。矣。遂。書。之。爲。其。詩。序。

雜體詩卷六序一

吳門同學盟弟宋實穎既庭拜題

雜體詩之擬。始于謝康樂。盛于江文通。其言謂楚騷漢風。既非一骨。魏製晉造。固亦二體。然蛾眉不同美。而俱動于魄。芳草不同馨。而悉悅于魂。非性情使然歟。予友吳子漢槎。衛子冰清。謝家玉潤。翩翩雋逸。望者疑神仙中人。及讀其詩。則又氣體高妙。波瀾獨老。盧駱王楊之藻采。李杜高岑之風則。無不兼備。蓋擬議之迹化。天然之致勝也。使與北地信陽。並驅中原。尙當退避三舍。矧歷下長興諸公哉。今秋予過松陵。漢槎出擬雜體詩示予。聲情慷慨。格調悲涼。大有山河離別。風月關人之感焉。仲宣流連于漢南。子山羈旅于江北。帶甲滿天。笳歌動地。文人遘會其時。性情實有相符者。胡霜金柝之章。蕙草闌干之句。信可以鏘謝凌江矣。豈云團扇秋風。芙蓉綠竹。取古人之眉黛。代一己之萱蘇已也。酒酣耳熱。涼星三五。戲語漢槎。歲月不居。風流易散。後有作者。于宏人。研德。甫草。若文。俊三。武功。諸子。未知當作何擬。漢槎其操不律。以豁我愁乎。

雜體詩卷六序二

西陵同學弟陸圻拜譔

原夫河梁贈答。實肇風徽。鄴下歌謠。漸多辯麗。五言之盛。可得而言。然如子荆以零雨見珍。康樂以春草特妙。以至司空兒女之疵。延年雕績之累。莫不性取獨適。家罕兼善。譬之觀魏闕者。蘭錡之第橫陳。入越都者。繹繞之榮不愜。此言殊軌者。易爲工。而通方者。難爲巧也。乃若醴陵創調。雜體名詩。篋簧匏管。九吹之變。悉和橘柚。檀梨一啜之鮮。不御庶幾。力同賁獲。才甚驃騎。真天姿之備燉。人外之絕智矣。然世風代降。擬作爲繁。薛君采馳。聘嗣音。王弇州條列羣品。頗多虎賁之形。不失虞邱之貌。而今時如吳子漢槎者。辭爲南國之宗。名在延陵之季。遠隨羈宦。遇閣題銘。近同傷亂。當筵流涕。身賣油素。無不推其轡文。容比珊瑚。俱欲爲之作架。斯固三虎之稱偉節。八龍之有慈明矣。乃復以銷暑放愁。幽居綴藻。踵江生之後。綜諸子之長。循其時次。亦擬作三十首。上自宣城。下迄司隸。景物興會。仰溯曩符。神韻格調。取高前式。所謂雕組之文。本異杼而均炫于目。芳香之草。不同岑而皆襲于裾也。至若太元天監。旣不一揆。河右江左。亦又二致。居南服者。未識僇面。產北方者。不曉吳語。斯固物理之自然。實非品類之難協。而吳子形容著勝。阿堵之蘊。悉傳刻畫。中規縱橫之態。已極。狀如胡寬營新豐。而雞犬競識。仲謀捫屏上。而蒼蠅欲飛。斯已奇矣。後有作者。先河後海。則吳遜文通。祀近祿遠。則吳盛王薛。豈非記室之後勁。好事之深憂也哉。

秋笳集目錄

吳江吳兆騫漢槎氏著

卷一

賦

春賦

秋雪賦

羈鶴賦

蘭賦

萍賦

長白山賦

竹賦

陶彭澤無絃琴賦

卷二

詩一

秋笳集 目錄

曉發撫寧題逆旅壁

山海關

關上留別潘守戎

出關

榆關老翁行

次前衛

同諸公登中後所戍樓

錦州道中登海邊舊保障臺上有傳烽枯槔

塔山道中望海二十韻

廣寧道中作

登廣寧城望城外佛舍因同諸公却過

沙河道中

次沙河砦

瀋陽旅舍賦示陳子長

贈赤公

同陳子長坐氍帳中話吳門舊遊愴然作歌

同陳子長夜飲卽席作歌

將發瀋陽過子長飲愴然有作

撫順別孫赤厓劉逸民

發年馬留別瀋陽諸子

贈海南曾生

曉起

城樓曉望

過朝雞屯

夜宿陰溝關有懷子長

陰溝關

高麗營

五日阻水年馬河

贈陳心簡

四道嶺

黑兒遼河眺望

早發尼失哈

次了深河水漲不得渡賦呈方岡樓

七夕次喇伐朶洪

喇伐道中

小烏稽

大烏稽

交河山中夜行

過烏孫法曠

北風

雨雪

遼邏晚望

海邊獨眺

贈吳穉恭散騎

徑僻

曉雁

趙宮舊姬

沙林道夜行聞鶴

對月

北渚望月

空城中見棲鳥感而成咏

寄懷陳子長

寒食大雪

可汗河曉望

曉坐

同德惟及門人陳昭令遊北山

卞生過飲

夜行

沙嶺晚歸

過灰扒廢城

庚子至日書懷三十韻

賦得春風和方邵村作

送人之渾蠶

校獵卽事

憶舊書情寄陳子長一百韻

見離燕

書壁

辛丑七夕

過恭順侯吳公寓齋奉贈

贈故太常樂工申叟

人日過錢子

送巴參領

曷木迦邏曉發

送阿佐領奉使黑斤

許康侯總戎招飲城東江上

阿波道中同姚琢之馬上作

曉自沙嶺至馬耳河

七夕陪諸將飲

贈舊參領穆君

送人西行

沙嶺作

同諸公飲城東水次分韻得春字

海郎山靈湫神女歌

帳中夜坐

訓子長見懷之作二首

贈人

送人從軍

上巳同錢德維姚琢之飲江上

席上賦得吳郡

宮怨

七夕

過琢之齋

九月八日作

九月自木丹山歸過淨公蘭若

九月十六夜之密將訪馮侍御炳文

奉草園林園歌贈友

元旦

贈色君

祁奕喜初至留飲

木參領還自西域賦贈

三山道士工馬便射賦此贈之

送薩參領

贈張侍郎坦公次姚琢之韻

東錢子方叔

贈少年

贈吳興錢虞仲

早秋陪諸公遊密將山

送人

寄懷陳子長

寄懷孫赤崖

送人之梭龍

春夜歸自西郊不寐閱顧華峯舊所寄札

詠張侍郎齋前小松

送薩參領入都

贈人

瓜兒伽屯值雨晚過村叟家宿卽事書寄孫赤崖陳子長五十韻

宿混同江明日立秋

秋山觀姬人採花

送友人

重陽夜送人西行

九月十日雨雪達暮寄琢之

卷三

詩二

冰井曲

讀張司空所撰岱史奉贈

送哈佐領之朝鮮

曉登東嶺寄楊友聲次琢之韻

早春集錢虞仲齋

馬耳山中同姚琢之作

聽高小乾話秦淮舊事作

代姬人寄贈錢茂才方叔

送巴公子之京

送錢丹季之松花兀喇

少年行

山中晚行至阿波屯宿

張坦公侍郎齋中觀白蓮歌

早秋同錢子

秋夕同諸君飲張司空凭嵐閣

寄王總戎

送人至羌突里街

送友人還兀喇

阿波山中訪張子

自密將夜歸登舊寧古臺

黑林

郊行贈雁羣

夜飲色侍中宅卽事成詠

奉送大將軍按部海東

寄錢子方叔

張侍郎齋觀山水畫卷歌

卽事

上巳許康侯招同諸君禊飲江上卽席分韻得年字

阿波山中呈安都統

渡混同江

送人之粵東

咏隣姬

曉行

與桐柏山人

奉送巴大將軍東征邏察

秋夜師次松花江大將軍以牙兵先濟竊於道旁寓目卽成口號示同觀諸子

城東書感

曉望

送人歸遼東

寄友人

九月八日病起有懷宋旣庭計甫草因憶亡友侯研德宋疇三丁繡夫

九日

奉寄陳相國素庵先生

送使者之蒙古

與劉子良閱廣輿記因爲予話隴外地形賦此

奉送安都統安集海東諸部因便道閱松花江水軍

陪張侍郎坦公遊西嶺

贈孔叟

遊西山蘭若二十韻

送米參領

寺樓曉望有懷

聞溪聲有感

送姚琢之赴兀喇

同友人夜飲卽席作歌贈之

八月十五夜望月作

登樓

九日登東山憶甲辰此日同馮炳文侍御遊睡河上錢虞仲茂才以五言長律相贈今馮錢皆

逝溯懷時昔情見乎辭

野宿

寺樓雨望懷楊友聲

贈高生

山行有懷舊遊諸子

晚自雞嶺崖至天龍屯

寒食日作

芳樹

巫山高

銅雀伎

山中孺子妾

結客少年場

湘妃怨

長門怨

妾薄命

將進酒

採蓮曲

春曲

閨怨

與定之飲

早秋姬人有悲落桐者感而賦此

贈張繡虎

同陳昭令遊西山道院

寄琢之

山夜觀打魚

奉送副都統安公之烏龍江

與張繡虎飲

王定之過

置酒歌

登西閣

送友人

九日同德維雁羣兩同年西山登高

九月十二晚望回獵賦贈薩君

寄琢之友聲

一藍岡夜行

秋日雜述五首

贈友

贈唐副帥

題淨公房

送人之榆關

獨行城東循山至白崖

秋夜送下書記赴軍幕

同雁羣城南泛舟至白崖口

密將山晚歸東陳衛玉馮玉文

晚步原上

晚登天羅嶺東陳雁羣

西山閣晚眺

夜同諸君飲江亭

木丹山曉行

自木丹還城作

蒙古屯同雁羣晚眺

帳中示雁羣

冬至懷繡虎却寄

除夕

雞嶺崖與王定之別

觀姬人入道歌

山中

帳夜

寄贈姜京兆定庵二十韻

封祀長白山二十韻

西曹雜詩

卷四

詩三

戊戌三月九日自禮部被逮赴刑部口占二律

四月四日就訊刑部江南司命題限韻立成

感懷詩八首呈家大人

聞有家信遂成

寄內二律

偶成二律

秋夜寄計甫草

答贈丁繡夫二首

寄懷袁文生黃平子二子

有感三律次陳子長韻

送人還江南

送姚子上還荊州

九日同陳子長飲分得十五刪

卽席再用前韻答贈子長

再和子長

感寄

夜坐柬子長

白頭宮女行

秋雁篇

冬日同子長賦限韻立成

冬夜同諸子飲方坦庵先生齋卽席賦呈

夜同子長過方婁岡學士賦贈

送張繡虎南行和陳相國

戊戌除夕偕諸子集陳素庵先生齋卽席同直方子長賦

己亥正月朔夜同子長小飲口占

人日同子長賦

答贈陳子長

正月九日望月同子長

元夕同直方子長賦

春雪篇

感示子長

閏三月朔日將赴遼左留別吳中諸故人

秋笈前集

卷五

詩四

春日篇

金陵篇

長安道

洛陽道

塞上曲

塞下曲

紫駟馬

劉生

關山月

雨雪曲

班婕妤

銅雀伎

晚眺寄計甫草

寄楚黃王涓來

送人之越東卽席分得蕭字

雜詩同楊俊三作

白紵辭和宏人大兄

長安有狹邪行

漢武宮詞

開元宮詞

行路難和吳海序計甫草

子夜歌和顧茂倫

五日觀競渡因憶楚荆一百韻

美人篇和開夏二兄

金陵

夜次京口

揚州

登漢陽晴川樓時逆獻已陷斬黃

岳州

湘陰

君馬黃贈張九臨

東飛伯勞歌同計甫草趙山子作

秋夜同楊俊三作

冠霞閣同顧茂倫趙若干晚眺

秋感八首甲申九月在湘中作

秋日感懷八首

贈友

夜讌吳圓

送康小范之廣陵

寄侯記原

寄侯研德

哭友

秋夜篇和宏人聞夏兩兄

三婦豔三首

望遠曲十二首

贈祁奕喜

江樓晚晴懷丁繡夫

登穹窿山

贈宇三朱子

懷侯研德

寄遠

題穹窿道院

席上贈張子

上巳同丁繡夫禊飲

七夕贈車瑞香

秋日贈九臨和旣庭作

送人歸楚

寄懷姚子上

遺事

送甫草入都

贈舊李侍御伍戶曹李蜀人伍楚人也

題茂倫隱居

絕句二首

送字三歸楚

同旣庭敬生天一諸子及家聞夏集繡夫齋中時旣庭將有越行

九日舟行同旣庭繡夫兼呈敬生及家宏人聞夏

旣庭來江城忽爾臥疾詩以問之

偶成

送人還荊州

客夜有懷

送人之湖南

甫草都中歸賦贈

送人歸秦中

山齋晚眺懷朱子蓉

擬唐人送宮人入道

古意

春遊

柳絮

送宋旣庭之浙中

湘水曲效齊梁體

夜集贈余澹心

贈袁文生黃平子

與舊史

虎邱題壁二十絕句

擬古後雜體詩

卷六

詩五

謝吏部朏省直

王甯朔融遊邸

江記室淹楚望

梁簡文帝綢閨思

梁元帝繹述懷

沈特進約三日

范僕射雲貽友

邱中郎遲宴別

柳吳興憚擣衣

庾度支肩吾侍宴

何水曹遜示寮

蕭東陽子雲望春

虞常侍羲北伐

吳朝請均春怨

徐內史俳酬友

劉祕書孝綽歸沐

劉庶子孝威咏月

庾開府信咏懷

陳後主叔寶禊飲

徐僕射陵春情

沈侍中炯自傷

陰常侍鏗送別

張散騎正見汎舟

江僕射總羈思

魏特進收喜雨

盧武陽思道贈別

李內史德林消暑

隋煬帝廣塞宴

楊楚公素山齋

薛司隸道衡酬憶

秋笈後集

卷七

詩六

撫順寺前晚眺

經灰法故城

奉贈函公五十韻

送人從軍

贈秦州李生

陪諸公飲巴大將軍宅

送人之羌突里兼柬陳子

讀張坦公先生所撰徵音集却贈

張坦公先生談甲申歲河北討賊之事感賦
酬陳子長七夕見懷

浚稽曲

上巳奉陪都統安公遊飲西山十韻

贈陳生昭令

同林生夜宿淨公房時林來自咸鏡

送人還蒙古

冬夜伍謀公齋同錢德維作十韻

同陳昭令過西山蘭若十韻

與友人夜飲却贈

送金譯使之朝鮮

贈陳蓉旬三首

再贈孔公

長白山

上京

擬唐人謝真人仙駕還舊山

送人之平遠

王昭君

夜宿

沙林同友人登完顏故臺

會寧道中有古墟墓賦此弔之

送巴參領之掣洛

三月十二日河上口號

奉贈封山使侍中對公

贈滇令巴郡葉明德四首

咏鷹

奉贈大將軍巴公

奉贈副帥薩公

繭虎追和梅村夫子

猿鶴

蟬猴

贈陳昭令二首

觀獵贈陳昭令

獵後再贈昭令

都統郎公奉使塞外賦此奉贈二首

送人至鴉青江

送陳昭令之兀喇十韻

春暮江上凍解同諸君放舟至白崖口賦示十韻

奉寄安大將軍二十韻同錢德維作公以寧古副帥擢鎮奉天

寄顧梁汾舍人三十韻

雜感二首

讀古人詩有感

混同江

擬唐人御溝新柳

贈陳蓉旬十韻

郎公將還京師賦此奉送

奉酬徐健菴見懷之作次原韻

集成侍中容若齋賦得柳毅傳書圖次俞大文韻四首

春夜聞弦索限琴字

咏史

月夜

補遺

李侍御枉駕因留小飲

壽郭明府

送丁泰巖晉秩開府之任湖南二十韻

明妃曲

咏籠鷹應教

戲贈

登樓有懷成容若

和凱之送令兄侍中扈從之作

贈葉長民

秋笳集雜著

卷八

表

擬久旱禱雨天壇甘霖協應賀表

序

方與三其旋堂詩集序

孫赤崖詩序

慎交二集

書

戊午二月十一日寄顧舍人書

與計甫草書

又

秋笳集卷一

吳江吳兆騫漢槎氏著

賦

春賦少作

伊漢律之代謝。啟春序之繁昌。望山川之淑景。舒亭臯之艷陽。隄澗澗而烟渺。野萋萋而碧芳。絲繞枝以被麗。風轉蕙而承光。桐華綺岫。蘭葉銀塘。貽粉蝶於珍卉。隱綿羽於高楊。惜景光之易邁。念憂樂之無方。撫九春而永望。憶千里而增傷。故雖風物同候。而歡愁殊變。至若長樂深宮。昭陽別殿。節徒百華。晝餘六線。晶屏開鵲鵲之樓。珠綴下鴛鴦之幔。樹綺合而霏微。草星離而蔥蒨。花明太液。元飴初飛。柳暗宜春。流鶯乍轉。於是咸陽卷衣之女。扶風辭輦之姬。沈淪永巷。徘徊履綦。怨銅龍之屆晚。勞銀箭之更移。啟金鋪而凝睇。涉珍臺而蕩思。柘館空兮青苔積。蘭林寂兮碧草滋。望翠華而不見。聽風管而長悲。去復去兮春已暮。怨復怨兮君不知。若乃貴主芳園。徹侯甲第。西京青瑣之家。南陽綠綈之地。循碧檻而逶迤。俯金堤而容裔。引鮮飴於綺疏。下元陰於玫瑰。爾乃微霧縠。命雲翹。試羅衣而登菌閣。張黼帷而照蘭皋。游鑣乍倚。箏柱新調。駐流雲於歌扇。矜結風於舞腰。指景物之貽蕩。瞻池館之迢遙。翠袖揚兮絲管合。朱顏酡兮

羅綺嬌。至如承恩小侯。期門公子。更衣雕輦之傍。斷袖金屏之裏。亦復怡情暇日。遊目芳時。出蘭池而走馬。入槐里而鬪雞。結茱萸之麗帶。被蒲桃之賜衣。溫皋草淺。小苑烟霏。送珠丸於文羽。炤綠幘於春枝。遙指宜年。斜經鄠杜。開金埒而塵空。響玉珂而烟驚。陳王飾瑪瑙之鞭。衛尉碎珊瑚之樹。望芳郊之遠春。屆狹斜而欲暮。若乃女桑初展。條風始曛。煩陰曜景。細葉垂芬。則有燕關蕩婦。代郡佳人。學歌北里。習舞西秦。畫修娥而黛淺。梳墮馬而鬢新。念八蠶之已熟。知三眠之欲分。爰覩粧而命侶。漫提筐而嘯羣。瓊鉤宛轉。珠繩擾弱。條冉冉兮遠揚。葉飛飛兮稍落。袖淺摘而香霏。腕頻移而羅薄。值使君之迴鑣。逢參軍之行藥。請交佩兮目成。贈搔頭兮心諾。復如妾居洛水。君戍真顏。瑣窗獨掩。迷迭空然。罷流黃之夜織。晦錦躡之晨妍。草積墀而汎綠。花臨砌而含烟。玉關無極。金河帶天。貽待女兮何處。佩宜男兮幾年。自征夫之戍久。泣空牀之獨守。游塵晝飛。苔錢春厚。章臺之劍空存。隴西之鏡未有。悲橫笛於郭超。寄異香於韓壽。對深閨之落梅。憶關山之折柳。又若河陽愛妾。安豐字卿。珠寵去。貝錦譏成。徒悲蕙晚。空怨蒲生。掩羅茵而靡歇。撫玉軫而鸞驚。攬芍藥而生悲。采蘼蕪而沾臆。屏宛轉兮晝長。帳萎蕤兮春寂。愁縈玉燕。悵望青驪。雕胡薦兮誰御。溝水流兮不歸。君聽下山之曲。妾依織素之機。復有送客東門。傷離南浦。緹帳宵懸。金羈曉聚。度楚曲而增哀。對秦箏而獨撫。依依春草。浹浹春流。覆露桃於玉道。低烟柳於銅溝。蕙路長兮紫艾馬。蘭江渺兮青翰舟。去故鄉而遠逝。指往路而離憂。容與征軒。逶遲去轡。掩玉筋兮賓御驚。贈金鞭兮行塵晚。草懷夢而情長。山遂枯而客遠。知移柳之何年。信采蘭之不返。亦有飄搖海澨。流戍江潯。虞仲翔

則交州遠竄。趙景真則代郡長沈。莫不對落花而橫涕。聞歸雁而摧心。已矣哉。胡春物之暄妍。信芳年之
娟好。嗟余志之靡常。獨逢春而心悄。攀柳枝而涕滋。指棠梨而怨曉。潘中郎之徘徊明鏡。徒驚歲華。魏司
徒之遊獵春山。空悲年少。佩楚客之叢蘭。問仙人之別島。探五嶽而長辭。汎九烟而終老。乃爲歌曰。江南
芳芷兮色以陳。紅顏一去兮沾羅巾。歲歲春風南陌上。惟有垂楊踈地新。

秋雪賦

吳生旣竄旅於龍山之下。戚兮無惊。悄兮多暇。抱孤迹於寒郊。眷羈心於秋野。於是青要已屆。素商未闌。
熊环西墊。雁厲南翰。先冰濂而夜結。玉露皓而朝溽。爾乃眇懽緒。愴憂端。倚拂廬以淒日。對服匿而流歎。
憶江皋之餘煖。怨邊候之早寒。俄而九關欲黯。千里無色。魚雲斷山。雁沙鳴磧。天澆滂以將低。日曖曖而
如沒。瞽埃靄於遙空。積風威於廣隰。霰瞥屑而稍飛。雪翻颺而遙集。匪窮陰之窈鬱。起嚴氣之氛氳。乍連
山以轉霧。忽縈空以憑雲。始嬾娟以構霽。遂雜沓而橫氛。混玉門兮並色。覆金河兮莫分。於是遙峯失紫。
衰林掩黛。日冷金支。雲收羅帶。殺蟲響於陰崖。凍波文於元灑。薄涼忽兮增寒。入迅商兮振籟。淒兮瑟瑟。
奕兮霏霏。入帳凝華。悞鶴關之曙啟。停林結葉。疑鸞朔之春歸。綿烟壑以含縞。合雲海而通暉。迷征馬之
野牧。慘寒鴟之夕飛。悲青桂之爽節。歌黃竹之哀辭。旣乃燭龍將暝。城烏漸息。山返樵歌。林歸獵客。霜依
夕而彌嚴。霧橫天而轉急。壓土銓兮沈烟。灑瓊牆兮緣隙。飛六出而未成。翻三襲而爭積。助紅樹之秋聲。
韜絳河之夜色。望已斷兮還連。謂將開兮忽及。未睨柱而玉殘。似卷綃而珠泣。冒蓮衣兮墜紅。點蘆花兮

借白。磧何遠而非銀。臺何高而無壁。蕭條兮瑾戶。爛漫兮凝階。金笳寒而葉脆。鐵衣照而鱗開。逐邊風兮響蕭瑟。鑒漢月兮光徘徊。葉亂聲而競下。雁孤影而遙來。眇平原之曠莽。惟積雪之崔嵬。若乃氛昏半收。夜景遙廓。風斂天霄。雲澄海堦。月抱暈以東垂。河含星而西落。荒雞喔兮伺晨。霜禽嘹兮警漠。凜淒竊之凝嚴。鏡澄暉之昭灼。山千疊兮少人民。野萬里兮無城郭。氣憊慄兮侵衣。色晃朗兮盈幙。樽琉璃而不慳。攬褐衾而怨薄。笛吐哀以獨吹。泪承睫以雙落。鄉夢遠兮空歸。邊心憤兮交作。候已昧於秋冬。心何分於苦樂。撫秋朔之如斯。知天施之未博。彼夫南國王孫之墅。西京戚里之家。梧承檐以稍下。菊羅砌而初華。幕會軒以楚組。代織綌以吳紗。愛秋飈之送爽。憐秋夜之方賒。綺羅紛兮樂未已。簫鼓喧兮月欲斜。豈知江接烏龍。城遙元菟。飛雪嵯峨。曾冰迴沍。遷客之辛勤。塞垣之寒苦哉。悲來如何。摧心自多。援笳攬調。爲秋雪之歌。歌曰。邊風起兮朔雪飛。雁違寒兮度欲稀。關山遠兮誰與歸。心懷鄉兮空自知。龍沙雪色秋如此。腸斷高樓舊寄衣。

羈鶴賦

伊胎禽之皓麗。超羽族而擅祥。養南琛於火次。毓西氣於金商。性玉清而內蘊。儀瓊潔而外颺。能羽宣嶽。接翼歸昌。瞭元睛而燭月。皎素翰而凝霜。吐火齊於驥首。絳水澣於修裳。頰丹華於花映。鬣采而娟揚。矯矯高鶩。軒軒遐鶩。秣芝田而弄姿。飲溶溪而顧步。激曉唳於霜辰。婉秋心於烟路。指霄堦其何央。豈人寰之足慕。連軒兮紫蓋。馴擾兮青田。朝容與兮瑤岑下。夕棲時兮珠樹邊。還丹作帳中之使。挾彈驂樓上。

之仙。響橫秋而益厲。貌凌漢而愈妍。暫揚翻兮萬里。乍舒息兮千年。鄙白鷗之陋姿。嗤黃雀之弱翼。謂九
臯兮迴歸。詎一日兮我逼。仰雲嶠而猶飛。恣風翎而未息。豈知范機密賊。虞羅潛織。頓樂野之高置。理桓
生之輕弋。鍛僞翻於中霄。委微軀於下澤。碎霜衣之襜褕。摧藻質之淋滲。魂惓惓兮誰語。吭纖殺兮空吟。
屈此雲裔之侶。爲君塔下之禽。爾乃斂遙情。緘夸節。去寥廓。就樊絀。燕雀長偕。鸞皇永別。餐雁稗而未充。
共雞棲而任褻。悼故巢之星乖。悼孤雛之雨絕。對淒影而增悲。送哀音而沾血。華表集兮何期。琴絃響兮
淒咽。彳亍荒途。摧藏幽垤。頻驚遙夜之寒。空怨今年之雪。於是冬灰欲徙。秋箭將窮。露凋華薄。風勁寒樛。
幕翩翩而辭燕。渚沈沈而集鴻。視空塘之謝綠。睇迴林之罷紅。翹清趾而清叫。迅修毛而欲狝。抱新愁於
池畔。聽舊侶於雲中。情眷眷而懷歸。色淒淒而獨苦。旣傷肌於網羅。空托身於庭廡。憶妙舞之吳城。思仙
吹之洛浦。緬軒翥兮無由。惟羈棲兮遘侮。寵未遇於乘軒。殃何罹於碎鼓。感淒氣兮長懷。結悲風兮自溯。
霜蕭蕭兮夜庭。葦梢梢兮寒渚。形曜雪兮誰憐。志凌雲兮何補。彼東門海鳥。對鐘鼓而含辛。北風代馬。亦
戀土而傷神。矧茲鶴之清迴。乃摧落於荒榛。恐歲年之逾盡。怨雲霞之莫因。眷天邊之鳳族。羨沙上之鷗
羣。諒委軀於匪類。亦奚志於高髣。豈窮生之足樂。胡介性之能馴。倘更豐其六翮。當橫絕於九垓。

蘭賦

選卉族於幽記。惟斯蘭之獨靈。蘊澄華之秀質。含迴介之遐情。徵服媚於燕夢。擅奇芳於楚汀。芬入山郎
之握。種傳待女之名。詎競時而逞豔。每屏幽而自馨。爾其紺蕊懸羅。素苞切玉。舒碧葉之修靡。擢青跗之

纖縟帶含縹以冰鮮。花點頰而星燭。紛書帶之頻銜。森瓊枝之上聳。乍垂的以擢丹。不結房而吐綠。羅生
修坡叢被曾谷。鮮雲結陰。微颺送煥。旣芊蔚於溫泉。亦葳蕤於丹麓。並威喜之仙芝。邁曾城之靈木。斐披
媚景澹淡含烟。託山楹而延藻。蔭澗戶而垂鮮。溽露華而色淺。承日影而香傳。譬羣翡之棲岫。似明霞之
曜川。凌衆穢而未沫。操孤芳而自妍。於是璇閨麗人。金屏媚子。蟬鬢方梳。鳳琴罷理。煩炎景之赫曦。愛芳
花之旖旎。爾乃培以元壤。承以玉缸。柔柯不擾。修葉成行。布綺錢而增媚。列錦石以疏芳。茗粥沃而膏潤。
油檀蘸而恐傷。去巖幽之岑寂。來寫目於君堂。樓陰散暑。池彩迴涼。暖香風於珠幔。媢幽質於瑤房。及夫
日下窗梧。風低軒柳。倦理羅紈。未淹杯酒。下曲閣而蕩思。步修欄而垂手。愛青青之入佩。憐菲菲之襲衣。
屢綵環於纖指。長延玩於遙帷。香來輕重。影度參差。舉羅袖而淺摘。綴羽斂而半垂。付雲崖之微種。得移
根於玉池。雖荷君之擊採。恐零落之無時。愧未植於當門。亦何勞於翦伐。傷媵予之文魚。就摧芳之鳴鳩。
律中商而欲淒。霜賈寒而增冽。條摧曉霰。色瘁秋風。將隨蕭艾。孰辨芳叢。嗟國香之萎絕。竟莫異於孤蓬。
雖委根於中路。尙延憶於珠宮。於是逃虛處士。聞而嘆曰。秋蘭榮何晚。憔悴委嚴霜。新翠已無色。故畹尙
餘芳。早知青女能相負。悔不長垂湘水旁。

萍賦

步修渠兮俯澄波而游目。覽蘋萍之微植兮亦寄身於水屬。體汎汎而靡托兮色田田而自縟。同石髮之
鬢髻兮謝澤芝之靈躡。爾其幽茂湍中。澄羅水側。漠兮鱗被。菱兮雲織。表沈淫兮翠鮮。裏參差兮紫飾。敷

細葉而無根。吐纖滋而成實。巧憑浪以繁盈。輕從風而疎密。小圓文於莢錢。混微姿於蟬翼。三輔善其色。青。五月傳其華白。羌聚散而無心。乃沈浮而有適。瀾漫如拭。駘蕩還來。染金塘之細草。雜瓊岸之輕苔。垂織綸而半捲。泳修鱗而乍開。或值隈而斯滯。或觸物而邈迴。惟飄蹤之若此。亦何心之可猜。若夫灌木紅泉。幽篁元澗。餘霞始收。光風未轉。息細響於潺湲。靜文漪於凌亂。遂冒渚而烟稠。爰藻川而雲蔓。匝碧羽之叢叢。點細羅之片片。及夫烟生極浦。日黯長河。屏翳增扇。冰裔化梭。雨憑憑而激水。風騷騷而送波。川無憩鱗。林靡靜柯。乃競糾於渤滂。共紛擾於盤渦。錦殘碧荇。雪亂青莎。嗟質輕而易蕩。委鯨濤而謂何。復有白鶴翔羣。紫鴛擾侶。蘋鬣紅衣。翠綉繡羽。下斷岸之春陰。汎方塘之曉霧。競戲廣而灑珠。並浮深而浴素。牽藻差池。唼流顧慕。圓吭啄兮碧分。修領刷兮綠破。至如秣陵秋瀨。橫塘夜川。綠菱始發。紅蕖乍鮮。遠紫房而爭布。縈縹幹而駢田。逢姣姬之倚楫。值妖童之採蓮。沾碎綠於皓腕。亂浮青於綺船。龍文動兮開且合。羅衣拂兮斷復連。至其措形空水之涓。散跡荒江之表。任漂寄其何之。還雍容以自矯。乏纖莖以自持。歎孤生之易擾。似逐臣之去國。同遷客之辭家。漫銜悲於故壤。空騁目於浮查。萍托水而靡甯。士遠時而失據。嗟人物之異心。胡悲歡之同遇。睹斯草之所如。徒慷慨於予慕。彼夫茱萸美崑邱。血變淮南。流長劍之耿耿。美雲鬢之鬢鬢。乃好奇之殊觀。非幽人之所觀。與汀葭而並瘁。共池荷而詎慙。雖未繫於君廟。終呈潔於幽潭。

長白山賦并序

長白山者。蓋東方之喬嶽也。晉臣袁宏有言曰。東方萬物之所始。山嶽神靈之所宅。我國家肇基震域。誕撫乾圖。景歷萬年。鴻規四表。則茲山者。所以昭應皇輿。合祥帝室。與有巢之石樓。少典之軒臺。同焜燿於方載者也。皇上聖文臨宇。神武膺符。慶洽人祇。化隆海嶽。仰欽祖德。報禮神邱。爰詔侍臣。致崇禮秩。牲璧儷於羣望。懷柔及於百神。瑞檢雲陳。穹壇星麗。煌煌乎聖世之盛儀。埒虞柴而軼漢祀矣。夫南山薦馨。班固以小臣作頌。西嶽展禮。杜甫以布衣獻賦。草莽微臣。竊附斯義。乃作賦曰。

猗茲山之峻極。眇羣嶽而獨尊。體青瑤以出震。標皓靈而燭坤。揭龍荒而作鎮。類鵬溟以爲門。參二儀兮永峙。表三成兮莫倫。徒觀其大勢也。則巖巖替崑。穹窿峭峴。竊逸嶙峴。壇漫莽。覺迴漠漠。以橫波。嶮峽峽而極上。峽遼碣。驟朔堦。騎挹婁。睨朝鮮。亘喬基於千里。造曾椒於九天。赫兮無儔。嶮兮迴拔。嶺輪糾以爭互。巖巖巖而相峴。峯千仞兮縞曜。壁萬尋兮瓊潔。鬱騁險兮橫霧。諺負高兮墮霓。五結切。洵東極之神隄。詎西崑之可埒。爾乃循覽四麓。攷其周綴。爰有黑松巨林。馭蔓踟。遂狂天有極。祭地靡際。旣賄坂而連延。亦籠山而摧嶮。根攬崑以鱗羅。葉繞獵而羽翳。挈莖含髓。以鬱蒼。攢柯冒霧而叢倚。翳兮沈沈。霽兮甄甄。歛陰火於空心。盛陽波於槎爨。叶羊至切。乍頓道而欵臥。忽摧壑而側植。叶直吏切。信亥步之未跡。知禹築之莫暨。白山麓至半山。皆黑松林。亘三百餘里。不見日月。樹根相糾如網。地皆深淖。馬行七日乃畢。於是黛凝複嶂。烟暝虛嵐。森梢陬互。埒壘漸崑。景曖暉兮罕曜。塗溼澍兮增湍。市層陰於遙嶺。繫荒徑於修

楛杏慌罔兮晝含暮。儻寥窈兮夏凝寒。其中乃有黑鷗青鶴。蒼鷹素鶻。皎鷓碧鷄。迅鷗俊鶴。風騰猛腦。霜披勁鬪。哢吭輻輳。奮翰猶穢。或命儔於杪顛。或接巢於枝格。隣金眸兮高睇。厲青骸兮下擊。緇采頹輝。殊材異質。喧聒相驚。滄躍自鷲。鼓紫距以增響。毳羽毛而成積。極翔羣之詭錯。咸沸卉而斯集。若夫魁黠之儔。昆口之屬。伏魁長嘯。豪豨振于腐覆。昏影於積岨。熊彪睽踞於叢木。豺獫斷斷以猛噬。研縱驚透而紛逐。般首勁角。圓題從目。昏噪晨响。風馳雷蹴。慄林振壑。殷巖賦谷。至乃青驪黃駒。華貂文豹。挺修毫之溫潤。含雕采之煒烈。豆目賜睽。麥髯狎獵。棲迹曾冰。穹蹤盛雪。竄木末而騰趕。穴巖覆而競捷。羌托體於寒陬。疇効珍於華闕。伊奇類之夥够。嗟難得而殫說。爾乃林徑欲窮。遠蹊半墮。轉千盤而漸高。出九折而逾礙。紆蹇產。竦嶮峴。豁修渚。響湍瀨。縈濯龍之滄淵。飲納鴛之雙派。水名濯龍沽。大小納爲二河。殷雷地底。倒景天外。駭河流之凌薄。劃巖坳而匄磕。棧鬱盤於迴溪。路匪厲於嶮峴。澗凝空兮誰涉。崖踐虛兮儼對。於是豁開直裂。嚙噪如憑。抗術阡於鳥際。超軌躅於雲層。邈半漢以上躋。軼隆巔而究升。周步山極。肆目巖陘。曠若砥原。坦若廣庭。纖條不竦。殊榛罕莖。寒蕪莽莽。石道冥冥。何嶒峻外峙。而唐壇內平。山頂極平坦。無樹木。惟荒烟蔓草。滿目縱橫而已。爾乃羣巒結瑤。以峻起。千巖削玉。以攢立。頽冠合皓。以塔垣。崕崕縹素而叢襲。籊五色以相煥。綿百里而環羸。類瑤臺之偃蹇。宛瓊山之崩芳。石崖高七十丈。白如瓊玉。四瑣山頂。廣袤八十餘里。仰重霄兮可捫。俯下方兮無極。互陰晴於膚寸。攬星辰於盈尺。伏岑嶺而返眺。訝雷雨之下黑。爰有千齡之冰。太始之雪。嵌空峒窟。并凌摩岳。六尺皚皚。袤丈嶮嶮。迎素秋而競飛。涉朱炎

而自冽。嶮壑森淒。以月鑿。皎燭烟晃。而鏡徹。乍消長於新故。疇單究其融結。紛銜耀兮遠映。何吹律兮可
熱。從山趾至顛。高二百里。其上冰雪叢積。歷夏不消。爾其混同之本。鴨綠之源。飭爲神池。以宅乎其間。池
在山之極頂。形如豕腎。縱餘五里。橫八里。北流至松花兀刺。入烏龍。爲混同江。南流至朝鮮。爲鴨綠江。一
統志云。池廣八十里者。譌也。會瀾廣濶。靈液淪漣。振以曲碕之巉崿。繚以襄岸之駢田。含觀如拭。積明若
空。乍風披以激盪。條霞蒸而潰洩。鑿翠敗鱗湍之徑。躡雲構鮫人之官。爾乃疏隘隘。穴厥陸。跳潛沫。駭奔
深。汨潰阿而瀉瀑。霽冰巖而頽落。徂南驟北。趨渴聚飢。消靈源於千頃。淪神委於二江。叶姑紅切若其漶
竇之所潛演。穹廡之所復激。灌似碓投。洞若機疾。並騰傾而灑珠。遂奔揚而綴壁。羣流既傑。四派乃馳。灑
瀉崇岑。喧隘峻岐。颯沓雨集。澈冽烟飛。挂流會碧之表。淪波空翠之隈。倒銀潢而半瀉。矯皓蜺而迴飛。四
月間。池水及石罅凍泉先開。其所出之水。凡四派。穿白石崖而下。挂流百丈。聲若鶯雷。於是澹泞安翔。蜚
鱗四會。漾漾混濤。澎澎振瀨。抑魚龍之餘怒。集大坻而爲匯。澗兮永指。晶兮徐邁。出乎松花之陬。注乎烏
龍之外。四派之水。至龍墨龍呀庫。匯爲一流。以入於松花兀刺。所以宣天網之含布。壯朔野之襟帶。若攷
其瓌奇之所窟宅。珍瑋之所景彰。則夜珠流照於素波。賴玉摠采於青岡。人葭抗莖於椒陰。良楛挺筍於
松陽。人參生於椒樹之陰。石崖外。松林極目。其間瓊生栲矢。卽肅慎氏矢也。靈跂驂螭而容與。羽人撫鶴
而棲翔。畢山經以撰異。莫茲嶽之靈長。相傳其上有仙靈往來。擅射樂鹿者。卽雲霧迷徑。至其出納望曦。
懷吐雲霧。苞陰陽以靈祕。通元漠而神護。小衆山於整敦。眇七表於指顧。嶠嶽則千市未殫。縹碧則萬重

紛聚頓挺拔之地軸。俛巖峩之天柱。故能上當辰曜。仰襯帝居。抗基卓犖。翔勢扶輿。踞蒼門而表神宅。並青岱而開仙閭。赫彤雲之晝聚。焯紫氣之晨敷。孕造夏之玉宇。識臨代之寶符。啓潛躍於聖祖。臻景鑠於皇圖。藏瑤牒兮可俟。涌金精兮詎誣。瑞我清兮億載。永作固兮不渝。

竹賦并序童子時作

閒遊別墅。見有竹數竿。臨池獨秀。而托根荒徑。延賞無人。僕感幽質之飄搖。憐貞姿之蕪沒。乃設爲子桓季重之事以諷。其詞曰。

魏太子從容多暇。言遊西園。御華轂。靡朱軒。馳武賁於先路。托文學於後轅。爾乃遡惠風而揚葭。承清雲而轉旆。度蘅薄之邁迴。指蘭塘之如帶。於時池臺綺合。帷幙珠連。珍卉被麗。修竹嬋娟。繞亭皋而蔭景。夾曾閣而垂鮮。太子乃感湘流之怨歌。撫楚潭之逸曲。顧賓御而長懷。招季重而進牘。季重於是聽而稱曰。臣聞坤靈誕育。庶族繁生。見篔簹於幽記。表篔簹於祕經。結根水澁。晞幹山岑。抱偃蹇之嫵節。含萋萋之幽心。出炎洲而獨立。臨江介而流音。織桃枝之珍簞。傳雲母之怪琛。仙人掃陽嶼之石。烟客擅羅山之金。乍成船於百丈。或如甕於十罇。徒觀其黛色參差。翠筠窈窕。延華月而玲瓏。翳流雲而天矯。散空碧於元墀。下浮青於綺沼。旖旎無定。嫵媚自持。苞新潤粉。籜細含滋。積雪霏兮冬蒨。繁景麗兮春遲。若其抗莖公子之庭。列植佳人之室。上泠泠兮削成。下離離兮如織。於是未下葳蕤。初舒屈戌。瓊鉤卷兮臨花。綺疏空兮停日。見繡簾之森梢。對縹枝之乍密。輕颺蕭兮結元陰。暮雨封兮疎翠滴。復如幽茂山椒。宗生烟路。俯

碧澗之陰岑。交蒼匡之紆互。涼葉棲霜。修篁承露。鎖岫靄於冬春。嘯清猿於朝暮。紫花落兮無人。素筍抽兮誰護。結海山之珠實。青鳥空來。拂江南之石盤。洞簫時悞。若乃曲臺依夕。景昃明羅。白露警鶴。素月驚烏。寫薄暮於細箬。曳輕烟於綠柯。爾乃影亂珠擘。聲傳翠幌。橫瓊砌而增涼。拂金鋪而助響。秋徑夕兮猗靡。寒塘靜兮蕭朗。至其蒼蒼延秀。飄飄蕩姿。泛微霜於曉葉。聽歸風於夜枝。起騷人之獨感。動山客之相思。是以質謝暄妍。氣分秋朔。笑十蘭之徒芳。悲三秀之易落。送短羽之羣棲。望長離之永托。雖移根於玉階。終寄心於雲壑。太子於是綢繆浩唱。諷采妍辭。披廣殿。俯華池。出絳樹之雙曲。進翠羽之交卮。命吳生於密讌。長接席而不違。

陶彭澤無絃琴賦并序

山右吳公來蒞茲土。春流飲馬。還投瀨上之錢。曉閣觀魚。早辨沙中之獄。訟庭雀下。官舍松清。豈獨北地豪家。毀茲棗樹。遂使西川女子。棄彼芙蓉。况復從容多暇。儒雅怡心。吳季重之在元城。無妨文墨。潘黃門之居懷縣。不廢詩歌。追五柳之高風。撫一彈之遺操。爰進童子。用賦斯篇。愧非園令之工。敢薦正平之作。其辭曰。

伊有晉之徵士。永埋炤乎柴桑。緬長沙之遺烈。追義熙而自傷。斂鬱翮以卑棲。逝鴻羽以高驥。邈清風而獨遠。鬱明霞而不揚。願素琴兮興感。意飄飄而自昂。爾琴之爲質也。則龍門飛霰之枝。馬嶺崩霜之榦。托瓊嶽而孤生。據丹岑而絕漢。含繞梁之清哇。蘊號鐘之哀散。爰有離子之徒。王爾之儔。循山獨採。越壑相

求。剖陰莖以薦法。剪陽柯以雕鏤。采茲良質。制爲雅琴。以獻君子。其聲悱悱。豈知六朝逸侶。五柳高人。悼
廣陵之永絕。嘆田連之不存。棄八蠶而莫御。屏獨繭之橫陳。於是淥水空傳。流風徒結。旣收逸響。誰聽嚴
節。輟繁響於飛龍。斷游絃於明月。逍遙空撫容。與自怡。五色神蛾。不綵仙人之繭。一雙春燕。長辭愁女之
絲。荀季和之鳳凰。空含玉軫。李司隸之孔雀。謾飾金徽。信無聲而有意。何至音之可悲。若夫流鶯始飛。條
風乍起。芳林結陰。微波成綺。爾乃巾白袷。攜烏兒。命遠公於匡山。嘯宗生於江沚。拊茲琴兮娛心。豈操暢
兮睦耳。復如東臬晚晚。北戶迎秋。黃花夕秀。白露晨流。荊州唱野鷹之曲。玉關寄旅雁之愁。於是倚杖徘徊。
臨流顧步。見離獸之東南。睇歸雲之不度。悲哀彈於霜林。感遺操乎秋路。抱空質而長歸。收衆音於秦
素。豈知荆王曲裏。珠柱淒涼。趙后宮中。玉螭隱互。已哉。乃爲歌曰。春風澹蕩春水深。思君不見多悲心。應
知陶令遺徽在。栗里風流自古今。

秋笳集卷二

詩一

曉發撫寧題逆旅壁

長宵鼓角度嚴風。泱泱烽樓曙色通。客夢五更驚櫪馬。征途三月逐歸鴻。斷雲城堞臨邊迥。殘雪關山暝海空。莫道盧龍猶在眼。異時南望是遼東。

山海關

迴合千峰路塞垣。漢家曾此限中原。城臨遼海雄南部。地枕燕山控北門。寂寞雞鳴今鎖鑰。淒涼龍戰昔乾坤。高臺誰憶中山業。遠目蒼蒼白草昏。

關上留別潘守戎代方啓事作

塞天萬里送征鞍。意氣逢君欲別難。俠客軍中傾灌孟。故人門下識任安。望鄉臺迥邊雲斷。姜女祠空海氣寒。明發驪駒分手後。榆關風雪竟南看。

出關

邊樓回首削嶙峋。筆築喧喧驛騎塵。敢望餘生還故國。獨憐多難累衰親。雲陰不散黃龍雪。柳色初開紫

塞春。姜女石前頻駐馬。傍關猶是漢家人。關前有姜女留夫石。

榆關老翁行

榆關酒樓臨大衢。征人日暮行駐車。鹿裘老翁鬢成雪。夾轂相逢問里閭。乍聞吳語三太息。坐我樓頭話
疇昔。自云家世本吳中。住近張王舊宮側。少年追逐冶遊場。破產徵歌意無惜。沙家槍稍冠江南。學得梨
花推第一。技成好作關河遊。販繪幾度來邊州。燕姬十五芙蓉色。彈箏夜夜酣高樓。一曲紅綃醉中擲。囊
空典却千金裘。三載邊庭履霜露。飄搖裋褐誰相顧。途窮不忍到鄉關。却向軍中應征募。金羈翠牝繡螭
弧。名隸渡遼第三部。關前上將霍將軍。遣向松山守烽住。孤城接關無時休。鐵甲中宵帶冰臥。老邊牆直
長城隈。梯衝百道如山來。寧前列屯畫城閉。旌旗黯慘紛黃埃。雄邊健兒十三萬。鼓聲欲死弓難開。磧西
降丁最翹健。日暮分營夜催戰。吁嗟萬騎無人回。射盡平州鐵絲箭。曙光曛曛海生綠。戰血無聲注空谷。
嚴霜如刀箭如蝟。欲上戎鞍淚交續。堅城既墮將軍降。幾部殘兵向南哭。相隨散卒臨渝城。橫刀更隸龍
驤營。倏忽長安易朝市。關門不用防秋兵。從此飄零脫軍伍。種豆鋤葵學農圃。且將衰齒托雞豚。幸免微
軀飼豺虎。去年有客來燕京。傳道江南亦被兵。故國他鄉盡荆棘。窮黎何處還聊生。伊昔姑蘇城畔住。門
前小店臨江樹。半生鞢戍塞垣秋。夢斷吳關舊行處。今日逢君遼水北。被褐驅車欲安適。白頭邊語久侏
儻。重聽鄉音涕橫臆。悽惶嶺外北風哀。莽莽邊沙路何極。沽酒邀君君莫辭。天涯相見且相悲。莫嫌憔悴
窮邊叟。猶是吳趨市上兒。悽惶嶺在關外二里。旁有姜女石。

次前衛

落日莽茫茫。嚴城列雉長。地形環漢塞。山色接遼陽。風勁沙恆響。春餘草乍芳。關門今不戰。萬里盡耕桑。

同諸公登中後所戍樓

昔爲荒戍駐征軺。縱目烽樓埜色遙。萬里川原迷大漠。百年亭堠識前朝。平沙暮捲山頭樹。落日晴翻海上潮。倚堞却尋南首路。漢關迢遞已雲霄。

錦州道中登海邊舊保障臺上有傳烽桔槔

塞門東盡海天開。百戰猶存保障臺。偃革十年閒斥候。傳烽當日報蓬萊。龍山燒色連沙起。皮島濤聲蹴岸迴。却望元戎開幕處。斷垣零落使人哀。

塔山道中望海二十韻

馮高臨渤海。披遠瞰瀛壖。浩浩雄東極。茫茫控北邊。潮迴雲鳥失。浪蹴雪山連。空外應無地。波中或有天。稍分元菟郡。莫辨白狼川。洄洑連星拆。盤渦倒日懸。□□分萬里。宇宙失千年。樹隔扶桑近。津回析木偏。翳空鵬展翮。吹澇蜃飛涎。縹緲龜梁客。虛無鹿嶠仙。淚綃憐女織。驅石想神鞭。杳映陽霞紫。昏明陰火元。魚雲晴作市。蚌月夜揚鮮。萬象應難測。孤蹤任所牽。萍漂何倚托。梗斷孰延緣。征客槎空度。冤禽水漫填。欲沈徐衍石。難泛管甯船。鄉國思漁釣。關山愧播遷。金支甯可睹。玉佩竟誰捐。心共滔滔水。東流去渺然。

廣寧道中作

巫閭千嶂削芙蓉。走馬東來翠幾重。殘碣久迷遼日月。遼昔東丹王居此。毀垣猶記漢提封。射鵰舊俗爭馳獵。買犢新田早事農。共道廣輪今一統。朔雲十載罷傳烽。

登廣寧城望城外佛舍因同諸公却過

徙倚城頭極望長。雙林鐘磬遠微茫。淒涼古塞還僧寺。寂寞前朝只戰場。金井有基春草綠。石幢無字夕陽黃。却憐負羽邊庭客。重過禪扉意倍傷。

沙河道中

渡遼幕府已彫殘。傍海山川尙鬱盤。攻守十年誇保塞。廢興一代問登壇。營空鵝鶴青燐泣。冢失麒麟白草寒。露祭獨憐遺老在。秋風磧路哭戎鞍。

次沙河砦

客程殊未已。復此駐行裝。世事憐今日。人情怯異鄉。月臨邊草白。天入海雲黃。莫恨關山遠。來朝是樂浪。

瀋陽旅舍賦示陳子長

西風城畔夜烏哀。積雨荒庭黯不開。匝地關山千里去。極天遼海一身來。文如劉峻終無命。憤到嵇康始悔才。舊業凋殘歸未得。望鄉何處更登臺。

贈赤公

憐君杖錫欲何依。寂寂花宮一磬微。欲使邊城傳白拂。却教漢法到緇衣。燈然鹿苑諸天靜。杯渡狼河雜

部歸。知是隨緣無遠近。不將遷謫擾清機。蒙古人多稱弟子者。

同陳子長坐氊帳中話吳門舊遊愴然作歌

遼城四月春風來。黃鸝啼樹梨花開。陳生邀我郭南去。笑騎鞍馬雙徘徊。沙場黯黯日將暮。半醉歸來解鞍臥。氊牆誰撥鷓鴣絃。彈作商聲淚交墮。憶昨故鄉百不憂。命儔嘯侶吳趨遊。裁詩每題白團扇。縱酒欲賭青羔裘。沙棠之槳雲母舟。美人玉袖搗箜篌。金窗銀燭月未午。清歌窈窕無時休。就中少年三五輩。徐郎顧子稱風流。獨孤側帽傾士女。正平搖筆凌王侯。百年行樂竟誰在。淒涼邊地傷離愁。只今相對休悵快。人生苦樂猶迴掌。隴西將軍困醉尉。邯鄲才人辱厮養。古來憔悴多名流。吾輩何悲棄榛莽。君纔弱冠我盛年。可憐淪落俱冰天。舊遊一別已如雨。陰關萬里徒含烟。寄哀欲托庾信賦。賞音空憶鍾期絃。金樽有酒且沈醉。何須惆悵風塵前。

同陳子長夜飲卽席作歌

豪氣君未除。長嘯輕遠遊。雖爲遼海客。不識邊城愁。青絲玉壺銀鑿落。中宵坐我碧油幕。海風吹天星動搖。邊色橫烟月澄廓。倚笛頻驚出塞聲。銜林尙擬華年樂。黃龍東望沙茫茫。黑林樹色參天長。此行應痛永乖別。他時相憶徒慨慷。愛君且復飲君酒。庭樹搖搖挂珠斗。夢去難攀鶴市花。醉來聊折龍城柳。眼中萬事盡飄蓬。爾我安能日攜手。故園何處五湖濱。難後逢君意轉親。誰憐元菟城頭月。泣盡黃公壘畔人。將發藩中過子長。飲愴然有作

日暮離心共黯然。相看涕泗酒杯前。最憐去住逢今夕。轉憶情親是昨年。地入烏龍雲接海。人過元菟雪爲天。與君萬里同羈戍。無那孤蓬更極邊。

撫順別孫赤厓劉逸民

邊程不可駐。杯酒暫相親。共此羈孤地。還成去住身。中宵遼海月。萬里塞垣春。明發單車別。誰憐絕域人。

發年馬留別瀋陽諸子

辭君更東去。回首見重邊。塞盡秦時地。山開徼外天。長歌哀午夜。遠謫痛丁年。縱有高秋雁。蒼茫信豈傳。

贈海南曾生

憐君從役罷登臨。鄉思猶傳越客吟。卓帽塵生人未返。青山霜落歲將陰。玉關征戍悲蘆管。珠浦音書怨藁砧。我亦有家江水上。十年同恨塞垣深。

曉起

初寒山畔尙餘花。早起江頭未落霞。秋草郊原聞牧馬。曉雲睥睨度吹笳。書傳錦字三年淚。路繞銀河萬里槎。襦袴敝裘歸未得。幾回彈鋏歎無家。

城樓曉望

啞啞鳥啼起戍樓。劫來登望思堪愁。山橫雁磧皆東下。江劃龍荒盡北流。金甲日凝千帳曉。畫旗風急六臺秋。征夫絕塞蹤難定。腸斷尊前玉腕留。

過朝雞屯

連宵宿年馬。今日過朝雞。風壤行逾變。雲山望欲迷。沙虛留虎跡。樹暗聽烏啼。回眺懸鞍處。迢迢隔嶺西。

夜宿陰溝關有懷子長

信宿陰關戍。悠悠旅夜徂。春聲過磧冷。月色到邊孤。離夢還高枕。餘生且客途。蒼茫睥睨外。不忍聽啼烏。

陰溝關

重山千仞疊晴空。列柵當崖鎖鎗雄。牙帳別開龍磧外。岩疆更抱菟城東。數家烟火黃雲暮。一片牛羊白草風。去去敢傷荒徼遠。遼陽今已是關中。

高麗營唐太宗東征舊蹟

文皇昔日征遼海。此地高麗亦駐兵。想像六軍頻血戰。蒼茫異代尙殘營。黃雲磧斷行人少。白骨原空蔓草平。日暮江流風雨外。滔滔東去不勝情。

五日阻水年馬河

五日驅車度極邊。中宵移帳阻長川。波間不斷千峯雨。林上爭喧七澗泉。鐵騎風沙行戍日。錦帆絲管舊遊年。汨羅猶是江南地。始覺靈均未可憐。

贈陳心簡故深陽相公子也

白拾翩翩馬上逢。襟期憐爾尙雍容。王章有子稱遷客。李燮無家托酒傭。夢裏白門人萬里。愁中元塞嶂

千重。月高。毳帳悲歌發。醉攬邊笳對雪峯。

四道嶺

懸流溪百折。東嶺樹千盤。不度重關外。甯知此路難。沙聲連雨急。嵐氣逼雲寒。日暮愁征旅。前岡且駐鞍。

黑兒逆河眺望

長河渺難涉。歇馬暫躊躇。地隔三韓外。人看萬死餘。沙陰低遠幕。草色上征車。竄逐前賢事。飄蓬愧未如。

早發尼失哈

繞帳笳聲促夜裝。明星欲落霧蒼蒼。征途咫尺迷孤嶂。殘夢依稀認故鄉。雪盡龍山三伏雨。風嚴雁磧五更霜。據鞍却望黃沙外。此地由來百戰場。

次了深河水漲不得渡賦呈方樓岡

兼葭一水霧初收。欲濟蒼茫少客舟。樹合雙崖迷塞路。雨添千澗引河流。蕭條甌脫秋先到。嗚咽琵琶暮起愁。總是播遷京國外。不妨此地更淹留。

七夕次喇伐朶洪

駐馬平蕪外。徘徊旅思長。河流秋淼淼。邊色夜荒荒。畫角千峯月。羊裘七月霜。世途吾拙甚。不敢望銀潢。

喇伐道中作

平明吹角起征鴻。又逐戎鞍遡朔風。秋草關山人獨去。寒衣鄉國信誰通。龍沙迴出三邊外。鳥道斜懸萬

嶺中千載主恩良不薄。崔駟竄處是遼東。

小烏稽卽前史所稱黑松林也。

連峯如黛逐人來。一到頻驚暝色催。壞道沙喧天外雨。崩崖石走地中雷。千年冰雪晴還溼。萬木雲蘿午未開。明發前林更巉絕。側身修坂倍生哀。

大烏稽

朝辭石棧亂雲巔。暮宿蒼林萬仞前。灌木帶天餘百里。崩榛匝地自千年。棲冰貂鼠驚頻落。蟄樹熊羆穩獨懸。聞道隨刊神禹績。崎嶇曾未到窮邊。

交河山中夜行

晨征宵未已。側足此山臬。秋過交河盛。星當大磧高。邊程依草木。旅食寄弓刀。萬慮沙場裏。驅車敢告勞。
過烏孫法噫木石盡墨云雷火所燒。

北風

曉樹深欹壑。秋峯峻入天。尙遺燒劫火。莫辨赭山年。霧積梯崖仄。風驚棧石懸。挽車縈九折。歷盡轉悽然。
馬上北風哀。黃雲慘不開。寒摧龍磧斷。聲捲鴈沙來。驛騎衣空寄。嫖姚戰未回。何人吹篳篥。淚盡落鴈臺。

雨雪

際海塞沙平。連峯朔雪驚。三秋龍磧度。萬里雁山營。甲冷朝逾響。笳寒夜不鳴。兼裘猶恐薄。愁殺寄衣情。

逆還晚望

寒原渺無極。十里帶蒼山。落日雙鷗外。秋風萬馬間。滄洲何暇泛。屬國幾時還。惆悵滄河水。悠悠隔漢關。

海邊獨眺

海色莽無際。馮高望沈寥。九霄迷積氣。萬象變靈潮。神蹟傳分屬。仙期想射蛟。銀臺如可見。烟駕欲相邀。

贈吳穉恭散騎故恭順侯勳衛

白頭吳叟何龍鍾。先朝曾直華清宮。十年喪亂無人識。萬里羈孤泣路窮。憶昨西京全盛日。子侯年少承殊澤。門下金鞍慣射生。樓中銀管頻留客。油戟香輪陌上驕。佩刀日護紫宸朝。從獵別分都尉馬。奉車特賜侍中貂。山河舉目須臾異。荆棘淒涼舊東第。仙人已歎海生塵。侯家甯保山如礪。幾度天涯怨負薪。蕭條絕塞詎逢春。夢裏宮雲雕輦路。愁中邊草玉關人。玉關回首傷懷抱。短衣濁酒長潦倒。雀滿門前翟氏悲。羊歸隴上蘇卿老。日暮哀笳四野聞。黃榆秋雪正紛紛。馮高欲縱鄉關目。腸斷南歸雁幾羣。

徑僻

徑僻人過少。山空鳥度稀。亂沙寒不起。急雪暮頻飛。獨對他鄉酒。猶披昨歲衣。故山揚子外。漂泊未成歸。

曉雁

泱泱汀洲曙。征鴻帶月飛。霜淒聲自切。風急陣偏稀。顧影愁輕織。翔空惜羽衣。方塘春水綠。與爾共言歸。

趙宮舊姬

一從丹闕火，不復奉深宮。細馬經邊雪，修娥怨朔風。玉門何日返，翠輦舊時同。腸斷溫明殿，飄零白露中。

沙林道夜行聞鶴

空外皋禽渡，沙邊倦客行。那知遙夜唳，偏恨獨遊情。影落霜岑遠，聲傳月澗清。憐君霄漢侶，何事入遼城。

對月

暉暉明月迴，遙吐雪山岑。一片嬋娟影，千秋離別心。寒生青桂落，先入絳河沈。惆悵沙場外，蒼然霜露深。

北渚望月

徘徊臨北渚，永夜月華寒。願兔飛難定，金波瀉欲殘。風微頻泛灩，浪細不成團。惆悵佳人遠，含情只獨看。

空城中見棲鳥感而成詠

落日空城裏，無人鳥獨棲。幸逃纖繳慕，得任別枝啼。命子聲偏急，梳翎影乍低。微軀慚風族，不敢向金閨。

寄懷陳子長

毳帳風連曙，長河雪過春。一年頻臥疾，萬里獨懷人。世事文章賤，交情患難真。茫茫窮塞外，愁記別離辰。

寒食大雪

寒食邊庭雪，嚴陰鬱未開。遙憐戰場柳，春色幾時來。客淚沾笳吹，鄉心托酒杯。鶯花何處好，萬里夢吳臺。

可汗河曉望

長河泱泱抱孤城，河渚蒼蒼牧馬鳴。旌旆曉迷鴉嶺色，風濤春走雁沙聲。近邊亭障千年蹟，出塞星霜萬

里情。羈戍自關軍國計。敢將筋力怨長征。

曉坐

磻戶寂無侶。淒淒露尙垂。樓空秋氣早。林密曉光遲。蕪沒人三徑。蕭條海一涯。此鄉弓馬地。抱簡日低眉。

同德惟及門人陳昭令遊北山

積黛紛巖岫。招尋興未窮。溪聲連暮急。林色帶烟空。書隔邊烽外。秋生旅望中。自憐淹謫戍。俛仰愧將東。

卞生過飲吳門人

相見添新鬢。相悲話故鄉。那堪逢晏歲。俱是客殊方。搗酒荒臺月。征衣大漠霜。風波滿眼淚。對爾益增傷。

夜行

驚沙莽莽颺風隨。赤燒連天夜氣遙。雪嶺三更人尙獵。冰河四月凍初消。客同屬國思傳雁。地是陰山學射鵰。忽憶吳趨歌吹地。楊花樓閣玉驄驕。

沙嶺晚歸

寒溪不可涉。驅馬出平沙。半磧餘秋燒。千山只暮笳。驚心烽火急。回首塞垣賒。終歲愁奔命。何勞問海查。

過灰扒廢城

大漠何王國。行人此日來。雄圖一戰盡。廢址百年哀。魚鳥空橫草。麒麟已沒苔。松聲悲舊壘。水氣冷荒臺。伊昔龍庭日。曾傳狼蘆開。勢窺東海盛。部繞北關迴。候月瑠弓勁。乘冰鐵騎催。兩雄方齟齬。雜種遂紛猜。

登比徵祠祭。勳期開草萊。旌飛沙浩浩。鼓合雪皑皑。大敵全師會。孤城力鬪摧。兵聲殘百草。戰哭聚黃埃。韓近秦先舉。虞亡晉始恢。尙傳京觀在。誰嘆懾蠡灰。阨塞形空設。興衰恨莫裁。依稀營畔柳。惆悵笛中梅。叢棘朝晞露。崩沙晚沸雷。撫塵心倥傯。覽跡思徘徊。地遠何人弔。程遙我馬隤。淒涼懷古意。秋角滿長咳。

庚子至日書懷三十韻

舊國歸難定。他鄉節又遷。歲時仍玉瑄。雲物自冰天。漫喜微陽復。徒傷往慮牽。星行方轉次。灰死欲重然。浪跡龍堆外。回腸鯉對年。重闌時問寢。諸弟日隨肩。宴笑潘與樂。懽娛萊袖鮮。舉觴南至日。獻襪北堂筵。座擁緹帷燭。歌清玉柱絃。土風遺赤豆。庭誥續青編。節比元正重。家欽祖德傳。趨承猶記憶。門次已顛連。家遠三年別。愁深五夜煎。寸心徐庶亂。百口鄒公憐。薏苡人誰辨。申椒世所捐。含悽望鄉國。攬涕托旌旃。土室難淹久。氊裘失靜便。沙崩空磧斷。雪霽亂峯懸。尋眺非吳苑。生涯且朔邊。羈心黃鶴曲。歸路白狼川。敢道文章悞。翻慚性命全。夏羹愁寄食。作賦憶歸田。西笑何時釋。南枝只夢旋。有懷成十志。無處飽三鱣。舊已哀豺遘。今猶畏鶴拳。物情隨貴賤。吾道任連遭。鍛翻嵇中散。依人王仲宣。日遲元陸景。春隔紫臺煙。客鬢將三十。親庭渺八千。感時何限恨。腸斷白華篇。

賦得春風和方邵村作

春風日點蕩。遠近徧亭臺。傳響鶯先覺。縈空柳漸催。暗隨暄氣度。時逐薄寒來。甯有雄雌異。空勞楚客才。

送人之渾蠡

沃沮西候遠，君去駐旌旄。千帳凝邊色，孤城壓海濤。雪深車不度，風勁角初高。報盡平安火，誰憐吏士勞。

校獵卽事

錦袖臂鷹輕，分弓出柳營。飛身驕馬足，仰手落鷗聲。鼓合風林動，圍開雪野平。歸來金帳飲，一片畫旗明。

憶舊書情寄陳子長一百韻

絕域黃龍外，長城元菟邊。羈棲仍萬里，離別欲三年。天遠浮雲蔽，山深積雪偏。永懷心莫展，延眺目悽然。坐惜佳人渺，空驚迴路懸。迴腸頻雁帛，弔影只雞田。憶昨淹梁獄，當時盡漢賢。共嗟丞相繫，子長尊人素庵先生與予同在請室獨訝謗書傳。牘背侵周勃，裝貲枉馬援。逢君何磊落，向我各潺湲。乳贖心長怯，鳴雞志不悛。潔殮梧象側，贈縞竹囚前。黯黯皋陶廟，熒熒貫索墮。一言饒契托，十死共迍邐。撫事惟悲嘯，忘形且醉眠。非關交易合，直是道能全。命酒青觴並，催詩絳蠟燃。斯人哀木索，俗士笑丹鉛。共詫黃門寺，翻多白雪篇。勢猶居畫地，情擬問高天。賦筆摧鸚鵡，啼痕灑杜鵑。上台終不曜，庶女竟蒙愆。已自寬秦格，還誰辨楚荃。鋤蘭方倥傯，泛梗忽聯翩。雁磧嗟俱竄，驪歌竟我先。先生與予皆論謫塞外先生先予行廿日春風都市柳，曉日潞河烟。南浦難追祖，西曹黯獨煎。魂應隨去馬，膽尙畏飢鷓。屢抱繫人憤，何堪別緒牽。棘庭纒判袂，蓬轄條隨肩。去國崔亭伯，無家王仲宣。幸存餘齒在，敢論舊邱捐。客望迷山雨，征途亂野鳶。風沙橫地合，障塞極雲聯。白日陰遼海，黃塵度薊壩。關春榆莽莽，邊雪草芊芊。平郭無停軌，句驪更扣舷。相迎珠勒遠，予至滄子長迎予十里披對赭衣穿。暫喜冰天外，重看玉樹連。含辛談出塞，把臂話辭燕。款

款低烏帽。依依坐馬鞚。望衡時晤語。秉燭日周旋。夜席銜金盃。晴原簇玉鞭。劍歌何激楚。酒賦自纏綿。道
屈才還大。情深骨已鐫。久諳行役賤。猶得故人憐。仁祖能貽米。延之屢乞錢。相哀賦窮鳥。獨恨咏鳴蟬。方
健長棲並。甯知更播遷。倚闌心眷眷。沾軾涕漣漣。笛咽翔鷗曲。琴摧去鶴絃。晚風淒別幌。夜月澹離筵。無
復形將影。徒傷筭與弦。柳長空折贈。蓬轉任翻鶩。歧路嗟何及。關山各勉旃。無期知此別。有約憶同妍。桃
館消魂地。才堂送客廓。良游應已矣。吾道詎終焉。虎口殘魂脫。羊腸覆轍駢。雨昏江氣白。霧宿嶺陰元。經
迴程凡幾。投荒路渺千。烏稽封灌莽。紅鑪遶洄遊。邊人呼水在草中如淖者曰紅鑪水。絕壑橫豺虎。荒途
少術阡。雜花垂隰短。密樹倚山圓。靡靡連錢騎。軘軘服轄韃。未知窮月窟。竟似墜雷淵。躋險憑穿履。啼飢
想藁饋。混同秋漲急。甌脫暮雲騫。地接扶桑畔。人過槃木巔。銀河橫左界。珠斗直南旋。憔悴腸應斷。崎嶇
病莫痊。百程投所屆。萬轉盡洄沿。稍喜勞筋息。重悲累足胼。罪甯當畀虎。意敢望憐蚘。薤草蕪三徑。誅茅
得一椽。葛公蓬作露。楚客蕙爲楊。家遠安殊俗。身貧問治佃。浮生原瀆落。舉世自嬋娟。幾乞泉明食。仍殘
子敬瓊。負薪沙渺渺。汲澗溜涓涓。籬缺松枝補。牆欹柳葉纏。故囊無白袷。廢簞有青緇。漸覺詩書賤。奚嗟
習俗儂。懷人饒夢寐。就役怯戈鐔。欲命攀嵇駕。難招訪戴船。懸鶉看短褐。烹鯉讀緝箋。舊好悽心遠。新詩
照眼鮮。瓊瑤思友切。笙鶴禮真虔。子長貽予札云欲弄謝凡俗樓心仙道種草期園客蒸丹下偃佺椒庭
應咫尺。烟駕本高褰。緬邈銀臺藥。虛無玉井蓮。鮑焦空憤世。郭璞且遊仙。繫表深遐慕。區中謝廣緣。應知
龍却物。誰是未忘筌。夔屈賢人隱。龍馴靜者便。願言乘氣嶠。相見問真詮。跡滯愁難達。情乖忿詎蠲。廬山

春不度。青海凍猶堅。地脈通噓氣。天心合轉圓。未能期汗漫。聊復卜筵簾。

見離燕

紫燕雙棲好。年年綺戶深。那知金彈懼。相失玉窗陰。覓壘悲新侶。銜泥愴故心。吳宮舊巢處。漂泊豈重尋。

書壁

荷索何來此。沾衣獨念親。最憐今決絕。轉羨昔艱辛。出塞愁中路。趨庭夢裏身。祁連明月好。難照倚閨人。

辛丑七夕

拂廬雨過流華月。起視雙星乍明滅。塞外頻驚七夕來。閨中應憶三年別。寂寂深閨白露寒。鴛機遙夜綺羅單。空憐樓閣穿針好。不識關山行路難。

過恭順侯吳公寓齋奉贈

日暮巾車載酒過。青簾烏几共婆娑。年侵漸覺豪游少。官罷方知醉尉多。五國雲山凝旅望。九秋冰雪怨羌歌。那堪回首淮南郡。列帳青油擁玉河。

贈故太常樂工申叟

白首梨園叟。曾聞值御筵。千官丹陛側。百戲翠華前。喪亂悲銅馬。飄零泣鈿蟬。那堪關塞外。重對李龜年。

人日過錢子

天畔春生揚子亭。經過小騎慰漂零。曾無綵勝傳人日。虛儼羊裘是客星。遠磧雲陰春漠漠。孤城雪色海

冥冥柏尊相勸還沈飲。遷客由來忌獨醒。

送巴參領

蕭蕭鐵馬嘶。萬里出榆溪。戰氣隨旌旆。邊心入鼓鼙。磧荒青海外。驛斷雪山西。上將銘功處。殘碑待爾題。

曷木迺邏曉發

樹杪月猶見。城頭角已殘。荒途分五國。歸騎發三韓。野霧依山盡。春星落塞寒。鳴鞭及前侶。霜露滿孤鞍。

送阿佐領奉使黑斤

槽頭征馬鳴。將軍欲按塞。飛沙咽鼓鼙。長雲擁旌旆。持檄遙頒五國東。揮鞭直歷千山外。千山不盡海東陲。黑水兼天磧路迷。金環烏戶鷗爲屋。黑斤人。耳鼻皆綴以金環。其傍海者。以毳羽覆屋。石脊種人魚作衣。魚皮爲衣。曲棧荒林紛積阻。剝落殘碑味今古。冰雪陰崖青鶴風。麕麇亂木黃沙雨。巨鹿岡頭塞北門。千家部落若雲屯。破羌流盡征人血。好進溫貂報國恩。老羌屢侵掠黑斤非呀哈諸種。寧古歲山大師救之。康熙三年五月大將軍巴公乘大雪襲破之於烏龍江。自是邊患稍息。

許康侯總戎招飲城東江上

一石酒新碧。四月花始紅。陽夏許侯有佳興。攜賓日暮城之東。緹油小幕披華褥。錦袖金鞭照沙曲。烟郭風微晚樹迷。清江冰斷春波綠。雙魚撥刺紅肌鮮。銅壺作脣吹芳烟。客子欲題鸚鵡賦。主人自奏鴛鴦絃。班荆藉草青莎軟。雜坐高歌不知晚。且看懽笑玉山頽。休語風塵銀磧遠。酒盡高麗雙翠器。看君俊氣何

縱橫半酣忽躍紫駟去。落日南岡按海青。

阿波道中同姚琢之馬上作

長林亘修坂。迢遞抱雲迴。半壩雙流入。千崖一線開。阜鵬驚古木。白豹穴荒臺。去去慚關吏。鳴鞭意轉哀。

曉自沙嶺至馬耳河

海輪先晨聞。城鳥凌旦起。浮客心多懷。侵星戒徂軌。稍稍出烟巒。瀾瀾辨川汜。蘋末風乍颺。蓮房露猶泚。岑翠曳爲霞。林光靄初霽。望遠恒少惊。遊目暫爲美。龍邱徒流歎。雁門未雪騎。良游如可期。結軫從茲始。

七夕陪諸將飲

清夜高城載酒游。輕寒初換紫貂裘。雕弓夾帳空懸月。玉管登臺早入秋。獨向金風嘶戰馬。誰從銀漢問牽牛。年年此夕遐荒外。腸斷穿針故國樓。

贈舊參領穆君

珠勒翩翩白鼻騮。曾提長劍靖邊沙。酬功未見封龍額。突陣還教隸虎牙。羌笛恨餘青海戍。邊烽愁問玉門遮。畫圖今日誰麟閣。十載軍中只鬢華。

送人西行

風野喧征騎。霜筍引別愁。路分稽洛塞。部入骨都侯。駝帳邊陰暮。龍祠海氣秋。蕭條鹽澤外。日夜水西流。

沙嶺作

陟壑憑崖望未窮。塞天城郭暮雲中。征人乘障吹羌管。校尉懸旗下朔風。白雪長寒甌脫裏。青山不到挹婁東。從來閩左多征戍。未敢沾裳怨轉蓬。

同諸公飲城東水次分韻得春字甲寅夏四月二十一日作

數峯空翠照江濱。江水逶迤繞郭新。草色乍消沙塞雪。鶯聲已過故園春。壯心零落還驅馬。絕域巖棲且傍人。漫道物華堪歷覽。清尊相見莫辭頻。

海郎山靈湫神女歌山頂有公主登遺址

海郎山色倚巉巖。山半靈湫映曉嵐。公主舊臺餘翠岫。神女新祠傍綠潭。神女嬋娟艷瑤彩。霏烟曳月迷年載。怨入青娥憶漢宮。魂依白鶴長遼海。含睇凝情不可親。乘風颯颯如有人。虛無瓊琬空山雨。杳渺鸞驂絕島雲。和親當日悲登隴。遺恨千秋塵瀆洞。寶鏡何時別紫闈。玉衣無處尋青冢。松花檉葉小祠荒。總帳無人春日長。鴉翅髮垂宮樣髻。虎章腰結羽人妝。香粉長筵醉芳醕。巫女如花下靈語。踏霧時聞石馬嘶。騰波自共冰娥舞。一曲迎神蘆管愁。年年賽火海東頭。望鄉莫更歌黃鶴。紅粉魂歸塞雨秋。

帳中夜坐

虛帳風初霽。長宵露欲侵。銀河垂磧外。珠斗落峯陰。獨下聞笳淚。誰憐擊筑心。南鴻飛漸少。何處寄歸音。

訓子長見懷之作

寒城愁眺塞天分。歲暮懷人渺白雲。路絕紫關長望國。書來青海尙離羣。冰河雁陣霜中斷。雪積鷗聲夜

半聞回首秋風燕市裏。酒杯何日更同君。
館娃宮外石湖頭。桂槳蘭橈儼並游。豈意風塵淹絕塞。獨將花月憶芳洲。龍山雨雪征人淚。鶴澗笙歌故國愁。何日刀環尋舊約。春江作伴逐沙鷗。

贈人

韞帶雕韉馬上飛。白頭憐爾尙輕肥。勳遺左地新傳箭。恩憶前朝舊賜衣。秋雪金河千帳失。寒雲銀磧十年歸。劍鋒用盡劖痕在。愁殺松山夜突圍。

送人從軍

漢法弛刑徒。幽陵挽強客。一朝隸戎行。萬里輕沙磧。身賤功詎論。軍孤戰偏力。曉度旌旆寒。夜嚴刁斗急。刁斗聲中起控弦。混同江水動樓船。十年謫戍頭今白。猶著征衣更出邊。

上巳同錢德維姚琢之飲江上

江頭昨日氛埃霽。禊飲相邀出中沚。風景應嗟非故園。年光仍道逢元巳。我家遙隔吳江濱。細柳崇蘭此日新。金鞮小苑流杯客。玉袖高樓吹笛人。可憐徒旅天山下。不見春風吹四野。際海冰河見斷鴻。連山雪帳聞嘶馬。宿昔繁華夢有無。年年乘障挽螯弧。東哲何須矜博物。阮公終日哭窮途。

席上賦得吳郡

踞虎餘神跡。疏龍儼帝州。夫差於西山。疏鑿龍池。九途環綠水。萬戶夾朱樓。花柳先春見。笙歌入夜遊。誰

知張翰意，鱸膾動鄉愁。

宮怨

玉砌霜花薄，金鋪月影多。自從辭輦後，無復翠華過。

七夕

搖落逢佳節，空庭片月流。玉繩低拂樹，銀漢迴涵秋。客淚他鄉酒，羈心故國樓。悽然望牛女，萬里獨含愁。

過琢之齋

小徑帶芳洲，森然水木幽。倚風人獨醉，竟日客能留。江色偏宜晚，林霏欲入秋。滄浪如可去，乘月問扁舟。

九月八日作

三秋行欲暮，萬里坐含思。搖落驚邊塞，羈孤感歲時。淚沾吹笛伎，身逐控弦兒。明發登高處，雲山祗益悲。

九日自木丹山歸過淨公蘭若

千山鳥道出雲層，九日龍沙欲渡冰。征戍未歸榆塞客，經行空對竹林僧。深秋漁獵頻相命，絕域樓臺且共登。知爾浮杯心不著，憐予對酒怨難勝。

九月十六夜之密將訪馮侍御炳文

日暮山深少行客，四野秋風吹瑟瑟。黃雲垂葉暗孤城，白月生寒照空磧。磧裏沙昏野燒微，城頭霜淨戍烟稀。何處風前度哀角，可憐秋盡猶單衣。觸夜驅車還獨往，綠雲石磴嵯峨上。雉雊頻驚暮雪深，馬啼欲

渡秋冰響。冰雪連山歸不開。憐君遙夕思徘徊。征人應是知寒早。常侍誰言帶熱來。

春草園林歌贈友 丙午年作

昔逢楚臺客。爲說黔公園。樓臺照海水。花石亘山樊。十年南望紆長想。銅柱天涯未能往。忽漫披圖朔塞前。恍然置我昆池上。澹淡如聞碧澗流。微茫疑入雲林幽。葉榆川色常階暎。越蕩山光繞戶稠。歷歷巖巒分咫尺。陰陰亭閣毫間出。千樹烟綿綺榭深。數峯翠入珠窓溼。窗開面面俯垂楊。一片池陰繞畫廊。竹外射堂馳馬埒。花邊步障鬪雞場。鬪雞馳馬紛遊讌。指點繁華歎奔電。漢代升平故老知。侯家富貴當時擅。伊昔黔甯下百蠻。卓犖勳名湯鄧間。分券百年朱鳥社。建牙萬里碧雞山。一自烽烟暗滇海。朱門青閣知何在。鶴歸猶嘆市朝非。燕去甯論臺榭改。雨雪飄搖大漠昏。風塵誰識故王孫。空將吹笛思金谷。幾度聞笳怨玉門。憐君遷謫何時返。獨抱丹青意憤懣。東陵衰賤欲摧眉。南詔雲山如在眼。落日荒臺故國秋。六王茅土竟誰留。莫將鳴鶴園中賞。來作和龍塞外愁。

元旦

龍磧層陰雪未殘。又傳春候度辰韓。旌飛小隊晴雲細。弓倚嚴城曉日寒。自擁羊裘沾客淚。誰傳馬酒試辛盤。東風苦憶吳宮路。苑柳官梅繞玉闌。塞外元旦。必嚴列旌旗。城門徧懸弓矢。

贈色君

少將風流雅不羣。安東幕府獨推君。期門舊屬張公子。出塞新從霍冠軍。馬上錦裘青海雪。鵝邊銀鑕黑

山雲。翩翩家世通侯貴。不識龍城百戰勳。

祁奕喜初至留飲

清霜羸馬古城東。笳管聲淒帳影空。一別朱門瑤草後。相逢紫塞戰塵中。交游祇訝當時盡。尊酒翻憐此夕同。莫道朔邊冰雪地。遷人何處不途窮。

木參領還自西域賦贈

聞君昨向月支回。絕域關河抵掌開。楊柳自迎征騎發。蒲萄不逐使車來。眩雷塞絕狡猊坂。積雪山迴龍馬臺。千載西陲誇右臂。鑿空誰識漢臣才。

三山道士工馬便射賦此贈之

柘月新弓馬上驕。鳴鞭驚見羽衣飄。曾驂瑤圃仙人鹿。欲按金河都護鵠。白雪征行邊朔苦。紫雲歸路海天遙。何時更逐秦皇使。蓬島樓船試射蛟。

送薩參領

高楊城郭草初曠。翠帶風飄錦戰裙。五月混同獨白雪。單車甌脫只黃雲。射魚部遠人難到。市鹿軍回路自分。今日漠南無戰伐。不須鐵馬更嘶羣。

贈張侍郎坦公次姚琢之韻

憐君遊屐滿高峯。華髮南冠日引筇。幸免濁流沈白馬。何妨遠謫度黃龍。愁來獨倚邊城笛。老去頻思禁

苑鐘雄劍茂先悲尙在。誰將赤土拭芙蓉。公遭閹賊之亂。

東錢子方叔

垂楊千萬絲。東風弄烟碧。別君曾幾時。中宵夢顏色。聞君卜築小城南。野性由來七不堪。塔分紅藥過新雨。窗倚青山入曉嵐。寂寥隱几無塵事。細草萋萋滿苔地。絲履能彈劉向棋。練裙自草羊欣字。落日衡門怨索居。洛生新咏近何如。邊庭自昔輕儒雅。嗟爾長貧更讀書。

贈少年

十八海東兒。容華皎白雪。結束紫貂衣。翩翩事遊獵。豪鷹脫綠鞵。生馬嘶紅鬣。毳韉五石弓。金縷兩重甲。秋草山頭獵火燒。合圍飛騎北風驕。少年獨得嫖姚願。笑傍金鞍共射鵞。

贈吳興錢虞仲

邊頭七月清霜早。越客思歸怨邊草。歲晏頻傷朔野寒。秋來倍憶前溪好。君家閨閣傍前溪。公子風流白袷衣。銀燭夜屏羸女鳳。瓊鉤秋帳汝南雞。傾城名士俱年少。侍女新聲採菱調。倚瑟偏令紅袖憐。按歌不惜青衣誚。容與深閨樂未央。尊前歌笑鬱金香。共道冶遊羅綺盛。那知離別塞垣長。塞垣回首繁華重。闕幘西風供旅病。宛轉環留都尉刀。葳蕤帶結秦嘉鏡。鏡裏徘徊髮欲秋。年年驛使寄衣愁。玉管相思雞鹿塞。錦衾歸夢鳳凰樓。鳳樓雞塞三千里。遼水吳峯詎相似。應憐織素悞佳人。却悔從軍成蕩子。搖落關山慘客顏。故園奇樹更誰攀。遙知玉筍長沾臆。無那金鞍只未還。

早秋陪諸公遊密將山

招邀出郭門。青山殊未已。金鞍小騎何連翩。人影遙遙翠微裏。翠微一望延會巒。深松伏澗相風湍。飛泉半挂銀河殘。秋嵐散入芙蓉寒。石門黯黯金花裂。隔溪蒼翠時明滅。回風絕壁森畫陰。六月空濛見殘雪。西峯百尺寒崔嵬。振衣欲上觀蓬萊。黃雲泱泱動海色。樓船射蛟安在哉。松花江水流浩浩。千秋戰骨關山道。龍堆狼望空嗟峨。飛將勳名歸蔓草。昨夜秋風吹塞天。臨潢萬樹生寒烟。金笳玉笛起愁思。邊心四據空茫然。安得仙槎泛清淺。乘流直度支機前。壯士無家誰不憐。李陵已向陰沙沒。逢萌空稅遼東田。君不見徽宗埋骨空江曲。遺冢蒼茫走麋鹿。徽宗冢在五國城西。艮岳風流亦一時。黃沙玉柙無人哭。萬乘飄零且復然。吾生那更悲窮谷。擊筑高歌出塞辭。何如楚客吹參差。眼前有酒且不飲。迢遙漫作鄉關思。紫騮嚼啣當風嘶。爲君重進金屈卮。醉臥青山且莫歸。明朝秋雪吹人衣。

送人

宛馬柘弓鳴。邊沙毳帳輕。秋風玉關外。送客錦城行。錦城花柳何年別。塞草關榆幾回歇。刁斗征人長白雲。長白山在寧古之西。藜砧思婦流黃月。鄉路迢遙劍閣西。君行正值子規啼。跼鴛山瘴聞銅鼓。如馬江濤見石犀。尺書歸報蓮花幕。西南喜見烽烟落。蠻人不復閉昆明。漢使猶傳略印箝。盡日軍城檠戟閒。紅椒花發映旌旗。應將漠北羌笳曲。譜入天南蜀國絃。

寄懷陳子長

雪霽山城月色新。天涯憐汝倍沾巾。家殘已恨無歸日。道遠空憐夢故人。尺素三秋憑去雁。短衣十月歎懸鶉。傷心同是他鄉客。偏是相思隔塞塵。

寄懷孫赤崖

已是淹窮徼。那堪更索居。中宵頻夢汝。晏歲益愁予。多病憐青鏡。繁憂托素書。天涯知舊少。漂泊意何如。

送人之梭龍

落日嘶征馬。雙旌出塞門。犬牙千障合。虎落萬人屯。力戰原□法。弛刑亦漢恩。雕戈風雪裏。誰念度烏孫。

春夜歸自西郊不寐閱顧華峯舊所寄札

天寒轉玉繩。獨夜旅愁凝。野色延殘雪。春流響斷冰。檢書人獨遠。憶別夢相仍。磨滅三年字。因君欲撫膺。

詠張侍郎齋前小松同錢德惟賦

小松亭亭托幽徑。黛色凝階石苔靜。吐葉纔凌春草高。抽條已入秋霜勁。拂露搖烟影漸濃。寥寥輕吹度簾風。三鬣未垂甯似馬。九鱗欲起乍疑龍。偃蹇孤根矜得地。庭幕玲瓏映新翠。應知弱幹不勝梁。且共卑枝低繞砌。一別林樾幾幾年。寄君欄畔任君憐。何當更植丹崖外。天矯雲霞待僊佺。

送薩參領入都

畫角吹嚴霜。征車待明發。手持都護書。去謁承華闕。奉使偏輕萬里行。辭家又作經時別。磧裏春來草未生。黃雲荒戍度雙旌。行人馬首吹羌笛。客路鴻邊指帝城。帝城此日多懽賞。翠蓋驪珂自來往。春燕樓臺

照玉河。曙鴉宮殿輝金掌。如君俊邁許誰倫。入奏應知寵命新。封事倘傳青鎖闥。流離須憶紫關人。

贈人

瑯服翩翩錦帶鉤。珠袍輕襲紫貂裘。頻彈寶鈇將軍幕。獨倚銀箏少婦樓。磧裏按鵝沙欲暮。埽中調馬草初秋。龍庭亦是豪游地。海月邊霜未覺愁。

瓜兒伽屯值雨晚過村叟家宿卽事書寄孫赤崖陳子長五十韻

我行龍水外。雨過雁山陽。曠野無人渡。曾陰極目長。橫天風瑟瑟。匝地霧蒼蒼。聲捲蒸沙黑。烟沈遠樹黃。溪流侵磴瀉。嵐色鎖村荒。渺漫彌寒望。悽其斷客腸。熟梅思故國。泛梗怨他鄉。塞柳沾全重。山花溼罷芳。寒鴉迷灌木。牧馬失遙岡。膠漬難調箭。氈濡欲壓房。危坡愁徙帳。仄徑怯攜囊。虎跡平林畔。牛聲草舍旁。渡河兒跋馬。繞隰婦驅羊。殘靄收空壑。斜暉下短牆。逢人惟戍客。問土是巖疆。瓦缶參爲餌。蘆罌酪作漿。留賓登土銜。延叟坐繩牀。蠶切青絲菜。盤行赤穎梁。未秋聞割蜜。入夜見然糠。杯裏弓懸影。燈前劍吐芒。山川應異漢。兵甲尙傳唐。惻惻江南客。蕭蕭塞北裝。身方隨拜柳。心漫結垂楊。牢落知誰怕。羸孤敢自傷。莫吟青玉案。且任紫絲韉。謫遠虞翻枉。途窮阮籍狂。恨爲雞塞別。悔未鹿門藏。世欲鋤蘭畹。人徒佩蕙纒。斷紅悲少婦。垂白想高堂。夢繞三年月。愁新兩鬢霜。田園盡蕪沒。門第半傾亡。臣罪何當惜。天心詎可量。微生混牛驥。殘息傍豺狼。坎壤原吾黨。飄零亦士常。旅懷憂怛怛。離緒涕浪浪。消息遙江介。關山隔帶方。生涯應已矣。故舊耿難忘。共鬱青霞意。難希白日光。軍中滯孫楚。隴外竄陳湯。述憤歌慷慨。貽詩興激昂。

風流君未墜。險阻我偏嘗。空闕千年積。蒼茫百戰場。有哀傳玉笛。無處訴金觴。已自箴鷓鴣。休矜蠟鳳凰。曲成惟出塞。賦就異浮湘。宿昔曾投漆。招尋會裹糧。冷山風慘切。瀚海月淒涼。望望人何在。悠悠路未央。側身看朔漠。回首怨河梁。欲問離居意。天涯泣數行。

宿混同江明日立秋

孤帳長川畔。荒城大漠東。邊心淹夜月。客淚入秋風。磧冷鷓盤急。沙鳴雁宿空。明朝腸斷處。一葉故園桐。

秋山觀姬人採花

照野秋芳晚。攜筐盧女行。條縈纖手艷。花冒靚妝明。浥露沾衣重。因風委地輕。飄零邊候裏。採掇若爲情。

送友人

日落單車發。沙平迴路分。一尊頻送客。孤劍獨從軍。大野生秋氣。荒臺足暮雲。最憐俱絕塞。猶自泣離羣。

重陽夜送人西行

甫罷登高會。明星又別筵。憐予黃菊酒。送汝白狼川。永夜低銀燭。嚴秋勁玉鞭。征途殊未極。應恨去經年。

九月十日雨雪達暮寄琢之

短轅昨向西山別。一夕邊風動嚴節。戲馬纔傳九日臺。和龍已度千峯雪。千峯雪色正漂零。惆悵登高故國情。颯颯蒸沙驚大漠。蒼蒼苦霧失孤城。城角聲沈更漏永。開軒半霽星河影。朔氣偏生玉帳寒。清光直照銀戈冷。乘興期君匹馬過。霏霏秋雪奈愁何。憐將昨日紅萸酒。淚盡今宵黃竹歌。

秋筵集卷三

詩一

冰井曲

朔風吹合圓泉水。六尺曾冰凍清泚。皎潔偏臨壁甃明。峩亭已映銀牀起。嶠嶠銀牀影欲重。流霜鑿月共玲瓏。光凝雲母深含景。冷結琉璃半累空。可憐少婦爭朝汲。錦靴願步愁無力。乍照青蛾玉鏡寒。欲憑素手品闌溼。日日攜羣幽怨多。嚴陰不散碧巖峩。轉轡宛轉霜絲綆。泣向寒泉奈若何。

讀張司空所撰岱史奉贈

司空雅博物。愛撰名山志。冷然塵外鑣。自灑壺中字。採秀曾聞到石閭。抽毫已似窺金記。此日羈棲咏四愁。側身梁父憶前游。蒼茫日觀羣峯表。海色天雞瞰十洲。

送哈佐領之朝鮮

帽側溫貂繡袷紅。蹙金毳帶兩駢弓。平明車騎凌江發。大雪旌旗度漠空。菟嶺天分邊草外。熊津地隔海潮東。知君談笑遐荒靜。百戰甯誇苟彘功。

曉登東嶺寄楊友聲次姚琢之韻

雙峯霜淨削觚稜。倚馬高寒試一登。曉色迴添鵬嶺雪。春風不拆菟河冰。名汗久擬淪屠釣。身廢空憐有愛憎。鄉國茫茫徒極目。圖南誰道是鯤鵬。

早春集錢虞仲齋

晴雪層巒炤籬牖。文茵雜坐淹杯酒。徑荒空見沒蓬蒿。春至何曾識花柳。四座高談殊未休。徘徊片月挂城頭。醉憑服匿悲歌發。忽憶西園舊日遊。

馬耳山中同姚琢之作

薄暮巖林外。飛花滿綠蕪。已從青海戍。空對白雲孤。身世歸鞍馬。山河逸酒壚。尙餘臨眺興。未可慟窮途。

聽高小乾話秦淮舊事作

秦淮昔全盛。萬戶起江湖。燈火真珠舫。樓臺碧玉簫。黃塵愁北徙。白首話南朝。歷歷升平事。天涯夢已遙。

代姬人寄贈錢茂才方叔

妾家高樓臨狹斜。夾道金椎楊柳花。銀鋪曉日流蘇帳。綺陌春風油壁車。春風搖裔春光徧。征夫一去愁相見。裊裊遙憐邊地桑。飛飛獨對文梁燕。孔雀流鶯曉夕聞。綠錢生砌青氛氳。塵鏡金繩四龍網。空牀珠被雙鳳紋。離房寂寞長多暇。綺瑟瑤箏空夜夜。寶鬢絲綰罷新梳。翠眉連娟弛故畫。昨逢邊使自遼東。聞君萬里尙從戎。刁斗三年出元菟。樓船百戰度烏龍。烏龍絕漠征行久。離思徒悲笛中柳。紫壘秋塞君自知。青漆春樓妾空守。妾恨綿綿思斷腸。君行迢遞滯鸛鄉。空覓生香寄韓掾。空持團扇憶王郎。惆悵容華

正三五。年年紅粉坐啼妝。

送巴公子之京

識君幾載安東幕。虎竹家聲擅沙朔。朝逐黃頭出射堂。暮攜紅袖還鈴閣。塞上風光白雪霏。玉花小馬繡障泥。金盤屢進黃羊炙。錦帶雙飛青鼠衣。父任爲郎正年少。雅工漢語羣推妙。承恩擬謁蘭臺宮。攬轡初辭柳河徼。公子乘春上苑遊。如雲祖帳擁鳴騶。鳳城三月楊花滿。踐蹠金羈過御溝。

送錢丹季之松花兀喇

男兒好長征。結束事軍僑。鳴鞭欲何適。松花江路遙。山雪北橫漠。河冰西限遼。曉色帶歸雁。夜火驚鳴鵲。千峯萬嶺迷南北。送爾行行一沾臆。馬上驚蓬無那飛。笛中折柳長相憶。

少年行丁未年作

少年便弓馬。落魄無所愛。自矜紫臺客。愛作朱門遊。曾陪北部大都尉。新事西京博陸侯。三月春風滿京國。待詔期門執長戟。銅駝街畔臂鷹歸。金馬門前賜衣出。天書趣拜羽林郎。腰間鑲帶黃金璫。鸚鵡杯傳仙液暖。鷓鴣冠插翠綫長。歸來塞外驅駟馬。賓御如雲曜原野。落鵬都護揖車前。射雉參軍候鈴下。駢奔直擬徹侯家。貧賤甯憐舊遊者。海東健兒浴鐵衣。沙場幾度決重圍。有功不解謁權貴。戰如熊虎誰知之。

山中晚行至阿波屯宿

不盡烟巒裏。驅車日暮回。一溪紆嶺戍。十里及烽臺。獵火雲中出。征途樹杪來。甯知豺虎窟。稅駕欲徘徊。

張坦公侍郎齋中觀白蓮歌

高堂日暮收微雨。坐對蓮潭不知暑。簾櫳窈窕吹芳菲。召客看花酒如乳。玉壺綺饌當軒開。捲幔荷風面
面來。花枝入座香欲動。皎如月出臨瑤臺。庭影離離媚將夕。池光汎灩凝珍席。素裳欲逐鮮隨輕。粉態愁
侵晚雲溼。起坐高歌按採蓮。笛聲寥亮驚四筵。惆悵邊寒易零落。容華傾國誰相憐。我家池館臨江甸。灼
灼芙蓉照人面。羅袖風微蘭漿輕。金塘玉淑長相見。自從漂泊龍庭前。斗柄秋風幾回變。漾楫頻思滌水
洲。聞歌尙憶朱樓讌。舊國風流怨錦帆。殊方星歲悲銀箭。持觴酌我我豈遠。彈弦拂柱酣馳暉。碧雲遙遙
月初上。醉倚金鞍忘却歸。還憐公等京華去。此地看花更有誰。

早秋同錢子

客遊心易悲。巖棲秋早冽。與子涉蕭辰。含悽眺寥泬。寒波警洲渚。空翠收岑樾。盈盈散渚鴻。槭槭下林葉。
胡然淒序臨。坐令韶景歇。金膏空爾懷。瑤華詎堪折。履霜方自今。何以肆愉悅。

秋夕同諸君飲張司空憑嵐閣

淒淒素商邁。悠悠清夜遲。眷言命賓友。攀閣相招攜。微雲斂綺霄。陰籟虛丹厓。羃花烟稍積。沾條露始滋。
銀河耿遙景。金波淪素姿。馮軒獨緬邈。叩盤空悽漉。邊候旣已寒。秋華甯久輝。且盡綠樽樂。詎知元朔悲。
懽宴未可常。憂襟何由辭。

寄王總戎

出戍君何恨。新妝有莫愁。金鞍衝塞曉。玉袖度關秋。百戰餘紅粉。孤征已白頭。毳牆風雪裏。應按小伊州。

送人之羌突里街

颯沓黃驄去。秋風動玉珂。蒼茫元菟外。落日滿金河。故壘鳴笳少。晴原徙帳多。年年候烽火。愁唱破羌歌。

送友人還兀喇

輓轅余纔返。嚴車爾復回。愁將征戍淚。重對別離杯。山勢侵長塞。河聲咽舊臺。北風哀角裏。獨過白龍堆。

阿波山中訪張子

石門棲隱處。遙在白雲隈。一徑穿巖入。孤村倚澗開。秋嵐生薜荔。陰雪洒莓苔。爲問揚雄宅。何人載酒來。

自密將夜歸登舊寧古臺

清霜十里度烟巒。月迴荒臺立馬看。紫塞清秋增曠莽。絳河遙夜動波瀾。心隨候雁鄉關遠。淚入征笳道路難。肌力自憐乘障久。無衣不復訝邊寒。

黑林

黑林天險削難平。唐將曾傳此駐兵。形勝萬年雄北極。勳名異代想東征。廢營秋鬱風雲氣。大磧宵聞劍戟聲。歷歷山川攻戰地。只今旌甲偃邊城。

郊行贈雁羣

城北城南千樹林。斷烟衰草日蕭森。白山冰雪秋將暮。黑水風雲晝欲陰。龍笛三年吹客淚。鴛機萬里寄

邊心招邀漫極江皋日。憔悴終傷澤畔吟。

夜飲色侍中宅卽事成咏

列伎褰華幕。留賓啓畫堂。共彈盧女曲。莫厭次公狂。倚扇青蛾好。行杯翠袖長。今宵銀燭底。不信是沙場。

奉送大將軍按部海東

玉勒動珠幘。旌旗遠肅紛。鳴弓行積雪。飛蓋入邊雲。屬國鮫魚部。佳兵鵝鶴羣。海東三萬里。笳吹日相聞。

寄錢子方叔

蘋萍植洪濤。從風自糾結。之子在遐陬。驅車日登涉。君行若崇朝。織阿已三闕。托身非故鄉。敢憚長乖別。盛秋霜朔寒。嚴飈素肌裂。山高不可凌。况乃無裘褐。平沙邈無津。曾冰慘難轍。未知歸國期。且復履邊雪。盛年委榛莽。壯氣盡羈絀。一奏式微篇。空令心斷絕。

張侍郎齋觀山水畫卷歌

張公靜者流。蕭然寡塵慮。昨出名山圖。知愛滄洲趣。粲粲紈素色。歷歷烟霞峯。彷彿草堂上。坐對松巖風。樛枝龍嵒倚。山閣似有樵聲出。雲壑瑤草萋萋暖欲生。石華濛濛寒不落。澗邊接飲垂清猿。林上將雛引雙鶴。聞君昔憩嵩邱山。紫翠巖庭縹緲閒。手倚鳳笙坐磐石。雙雙玉女芙蓉鬢。榻來塵世空茫然。矯首仙城不可攀。却願丹青意愉悅。十載關山倦輪鞅。回崖疑入天壇松。懸瀑如聞石淙響。滿眼林泉故國遊。憐君邱壑舊風流。鄭虔漫自矜三絕。張載惟應擬四愁。

卽事

龍沙飛雪中夜驚。徼巡刁斗寒無聲。少年盜符出鈴下。關門未曉雞爭鳴。追騎如雲促嚴鼓。烽堠連天斷行旅。此去甯逢漁丈人。閒行且逐奴甘父。匹馬邊程百草枯。崎嶇何日達飛狐。應知天地容亡命。擊筑還過舊酒壚。

上巳許康侯招同諸君禊飲江上卽席分韻得年字

近郭林巒淨野烟。佳辰車騎徧晴川。乘蘭禊事仍三日。拜柳軍僑已十年。寒雪漸消貂去後。春風不在雁歸前。流澌處處滄江裏。欲泛清觴倍惘然。塞外以貂入深山爲雪消之候。

阿波山中呈安都統

暮雲巖徑遞巖峩。初柳山橋送客過。未見風沙開玉帳。漸看冰雪霽金河。春深絕徼歸鴻少。目下荒原牧馬多。欲逐車塵誇羽獵。書生無那怯雕戈。

渡混同江

江濤滾滾白山來。倚櫂中流極望哀。襟帶黃龍穿磧下。劃分元菟蹴關回。部餘石砮雄風在。地是金源霸業開。欲讀殘碑詢故老。銘功無字蝕蒼苔。

送人之粵東辛丑年作

高楊葉未齊。芳草色初碧。春風搖玉鞭。誰是南歸客。送君南去古交州。滇水遙連瀟水流。珠出雞潮長不

夜花明。鳶瘴未曾秋。征南將吏銅牙弩。君到玉門見歌舞。賜棗應知動越王。賦詩且復參蠻府。蠻府迢迢五管分。風流爭識沈休文。五羊城畔如相憶。好折枕榔寄朔雲。

咏隣姬

家臨苧蘿畔。生小艷蛾眉。嫁與沙場客。飄零逐馬蹄。金鈿空自好。玉筍只長垂。宛轉盤龍鏡。春來不忍窺。

曉行

五國城邊月已微。五國城中鳥未啼。野昏溪水荒霧積。天寒磧露明星稀。收馬前林踏霜徧。手結征衣赤鞅縮。澗底斧冰響伏貂。沙中捲幕驚鳴雁。躑躅孤鞍拂曙行。天涯何日盡邊程。長城回望三千里。一曲哀歌白髮生。

與桐柏山人

山人十年滯盧谷。潦倒黃冠日行哭。飛鶴徒憐托令威。射魚竟未從徐福。回首雲霞空舊山。蕭條邊戍幾時還。共嗟元朔冰霜苦。那得丹砂更駐顏。

奉送巴大將軍東征邏察邏察一名老羌烏孫種也

烏孫種人侵盜邊。臨潢通夜驚烽烟。安東都護按劍怒。麾兵直度龍庭前。牙前大校五當戶。吏士星陳列嚴鼓。軍聲欲掃昆彌兵。戰氣遙開野人部。捲蘆葉脆吹長歌。雕韃弓矢聲相摩。萬騎晨騰響朱戟。千帳夜移喧紫駝。駝帳連延亘東極。海氣冥濛際天白。龍江水黑雲半昏。馬嶺雪黃暑猶積。凍解沙飛山雪皆作

黃色蒼茫大磧旌旗行。屬國壺漿夾馬迎。料知寇兵鳥獸散。何須轉鬪摧連營。

秋夜師次松花江大將軍以牙兵先濟竊於道旁寓目卽成口號示同觀諸子

落日千旗大野平。回濤百丈櫂歌輕。江深不動鼉鼉窟。塞迥先馳驃騎營。火照鐵衣分萬幕。霜寒金柝徧孤城。斷流明發諸軍度。龍水滔滔看洗兵。

城東書感

烟際出雙旌。霜崖滑未平。邊寒生遠障。海氣隱孤城。插羽方催粟。傳烽未罷兵。白頭沙塞客。流涕問東征。

曉望

孤角荒臺上。寒旌獨戍間。雁聲秋滿磧。馬色曉彌山。霜雨淹時暮。兵戈滯客還。淒涼天畔眼。誰是玉門關。

送人歸遼東

送爾驅征馬。離亭葉已飛。雲山三歲別。風雨一人歸。磧晚黃羊少。關寒白雁稀。蒼茫望遼海。今日是王畿。

寄友人

遙憶離陵戍。西連吐谷渾。三秋兵未解。百戰爾猶存。關塞分珠斗。山河斷鐵門。北方如可托。且莫賦招魂。

九月八日病起有懷宋旣庭計甫草因憶亡友侯研德宋疇三丁繡夫

歲晚霜清木葉愁。病餘蓬徑愧淹留。紫臺一別悲蘇李。青草頻年哭應劉。歸夢關河長伏枕。客心天地各驚秋。明朝誰是登高侶。零落黃壇豈再遊。

九日

龍沙不見戍歸期。抱病頻驚節序移。白草征人千里恨。黃花故國十年思。雪晴大野鷗飛迴。冰薄長河馬度遲。欲上荒臺愁極目。雲山面是天涯。

奉寄陳相國素庵先生即用先生見寄原韻

昔歲從公別薊門。短衣涕泪日雙痕。誰憐阮籍居窮路。獨向平津感舊恩。空磧冰橫秋未妥。亂山沙起晝長昏。側身西望臨屯塞。滿目寒雲斷客魂。

送使者之蒙古

蹀躞青驪映紫駝。飛揚丹旆擁雕戈。離筵日暮簫笳發。絕塞年來戰伐多。天盡龜林通鐵勒。地從魚海入銀河。旂裘萬里歸持節。定遠勳名未爾過。

與劉子良閱廣輿記因爲予話隴外地形賦此

九邊險絕稱秦隴。抵掌輿圖此問君。天轉黃河深坼地。雪晴紫塞鬱參雲。千年形勝三城繞。一線關山六郡分。表裏莫談疆漢日。蕭條泣盡故將軍。

奉送安都統安集海東諸部因便道閱松花江水軍

雉尾高牙落日懸。雕韃精騎北風前。軍容直歷無雷地。戰氣初消盛雪天。款塞紫貂新屬國。浮江赤馬舊樓船。遙知緩帶行邊處。千帳饒歌擁玉鞭。

陪張侍郎坦公游西嶺

碧雲日暮春縹緲。林壑峩峩照春好。晴靄遙分雁嶺沙。風光欲綠龍山草。草色萋迷四野開。笑攜筇屐共登臺。烟霽碧潭芳樹暖。天清丹嶂夕嵐來。夕嵐彩翠紛瑤席。岸幘行杯醉佳客。北海何須怨子卿。東山且自陪安石。酒罷還傳洗玉觴。轡車歸路晚蒼蒼。欲將折柳羌人笛。吹入春風憶故鄉。

贈孔叟

孔叟俠者今白頭。橫戈曾事當陽侯。崇禎中。叟以副帥事楊相國嗣昌。十年困頓蠲蟻塞。五月不脫羔羊裘。征南幕府久零落。猶復雄名動寥廓。絕域魂銷白雁書。沙場力盡斑絲掣。擊衣不得心自哀。置鉛無成目空矐。甲申冬。欲刺李自成不克。可憐喪亂識鳧毛。敢道精誠生馬角。萬里蒼茫故國悲。側身天地何時歸。鄉夢已迷三楚道。蠻烟休望九疑祠。此日相逢把君手。倚仗班荆撫西缶。感舊應憐鬢上霜。悲歌且酌尊中酒。入關蕭永正漂零。思趙廉公已衰朽。半酣起舞何慨慷。俯眉斂跡空摧藏。丈夫失意會如此。君今那必哀窮荒。

遊西山蘭若二十韻

四禪分浩劫。雙樹啓香津。地湧龍沙古。宮開鹿苑新。寶鈴流塞雨。金刹照邊春。窈窕丹檀合。峻嶒碧嶂隣。下堂鐘送客。歸院樹迎人。仙梵消兵氣。天花灑戰塵。瀑泉喧月曉。山磬靜霜晨。咒食聞禽下。繡經見虎馴。果肥風破甲。松勁雪生鱗。座擬逢師子。林應集雁臣。南宗擅卓錫。西竺字函銀。香散冰天畔。僧歸沙海濱。

嘯聲疑藥老。碑製想王巾。共道城爲化。誰憐里是貧。白毫徒彷彿。卓帽自逡巡。已味生還日。空悲老去身。神人甯夢漢。逐客未歸秦。涕泪瞻慈像。皈依請梵輪。秣林誰抖擻。朔野此沈淪。何日吳中寺。長齋禮應真。

送米參領

詔書昨下麒麟殿。敕勒將車夜乘傳。五校初歸左地兵。單車欲罷前庭戰。送君萬里向樓蘭。赭汗生駒七寶鞍。腰帶辟邪金錯麗。耳衣舍利錦縫寒。青冥亭障千回轉。白草川原日將晚。磧裏吹笳烟火稀。雪中移帳關山遠。西望蒼茫使節過。野營求水任明駝。界標鵬嶺餘殘壘。路極龍沙見湫河。河塞遙遙逢候吏。百年甌脫誰爭地。乍道軍回遮玉門。須傳使者撓金七。瀚海蕭條正北流。浚稽山畔朔雲秋。遙知錦帳安西部。馬首爭迎博望侯。

寺樓曉望有懷

高樓簾幙俯江濶。□□□□□□□。鴉色半天凝磧曉。雁聲七月動邊寒。綠尊無處尋文舉。卓帽何人識幼安。消息中原頻斷絕。幾逢歸騎問桑乾。

聞溪聲有感

何處溪流瀉。潺潺聽未窮。數聲秋雨外。一道夕嵐中。甯復逢漁父。空憐作塞翁。扁舟何日去。腸斷五湖東。

送姚琢之赴兀喇

雪花昨夜度秋峯。君去單車磧幾重。八月邊程依白雁。千年戰地出黃龍。征衣卒歲何曾授。旅食囚人豈

盡供幕府只今勤遠戍。敢將離思問重逢。

同友人夜飲作歌贈之

江色凍修夜。雁聲斷清秋。相攜飲沙瀨。渺若凌滄洲。羯鼓逢逢動孤戍。懸火連延儼華炬。泠泠玉露搖寒烟。奕奕銀河挂遙樹。夜氣莽蕭森。徘徊霜溼襟。哀絃激西氣。促柱悽南音。南音一曲肝腸絕。憐君向隅淚承睫。蒙段鄉園隔瘴雲。混同邊路驚秋雪。賣瓜誰恤故侯貧。升輦猶悲侍中血。當年出入驅華旗。可憐今日行無車。一馬之田日蕪穢。數尺荒江身自漁。漁釣優悠且相樂。擊筑吹簫亦不惡。投荒聊復侶豺狼。有道由來在葵藿。一作任龍夔。陳情感舊酒頻傾。撫節高歌月將落。君不見五侯子弟半鉗奴。負薪乞食嗟何如。

八月十五夜望月作

大漠怨涼秋。征人悲暮節。日夕荒城思不怡。却攬羊裘步林樾。遙野寒雕驚古戍。啼鳥歇。如何遠謫心。獨遡清宵月。月出雁山中。徘徊遠近同。享亭初濯魄。靄靄欲盈空。戰場極目天垂白。蒼茫亭障凝邊色。影入鷹關路幾重。光連龍碛沙無極。候騎營空刁斗寒。明駝帳冷旌旗溼。一望旌旗亘朔邊。幾回離別恨纏綿。金波不夜空千里。玉塞傷秋又一年。秋塞沈沈歲將暮。盈虧屢向愁中度。明鏡蟾蜍只自飛。大刀龍雀徒相誤。謾道邊心托鼓笳。可憐客思淹霜露。盈盈應照去年人。望望還迷舊鄉路。舊鄉迢遞海雲端。朱門此夜正尋歡。纖手雕觴進浮蟻。小腰綺帶引驚鸞。銀閣烟花秋未素。玉屏歌吹夜將闌。玉屏銀閣關山隔。望

遠懷鄉淚頻積。良讌空教感舊時。清光祇自憐今夕。今夕天涯意轉悲。拂廬落月。鶴深輝。登高欲作劉琨嘯。裂帛誰將蘇武歸。

登樓

八月霜風早。寒笳聒曉愁。長雲橫塞晚。落日澹邊秋。意氣誰橫槊。蕭條只倚樓。空餘滄海思。十載滯韓州。九日登東山。憶甲辰此日。同馮炳文侍御遊。眺河上。錢虞仲茂才以五言長律相贈。今馮錢皆逝。溯懷時昔情。見乎辭。

蒼茫巖徑抱烟稠。落日攀登動昔愁。雁塞雲山低薄暮。龍沙冰雪亂清秋。銜杯彭澤仍佳節。吹笛山陽已舊遊。三載夜臺人不見。空將沈醉哭西州。

野宿

獵罷班聲夜磧空。千燈星亂擁元戎。金笳不動關山月。鐵騎長寒海戍風。自是嫖姚雄塞外。空慙孫楚在軍中。十年書劍長征慣。悵望深宵更倚弓。

寺樓雨望懷楊友聲

北風吹雨色。日暮徧江灣。木葉千山冷。松陰百里深。樓臺紛遠目。砧杵動離心。遙憶求羊徑。蕭條孰爾尋。

贈高生

高生家本宛溪浹。當年曾許工文史。五年漂泊塞垣秋。夢斷江關八千里。一戍天涯恨不歸。邊霜蕭颯摧

人肌金戈夜雪哀。吹角錦石秋風憶擣衣。落魄行歌空太息。養雞牧豕無顏色。賃春廡下不見收。斫屨山前詎能識。昨日逢君大道旁。頭須欲白神昂藏。藜羹不糝雜泥滓。短衣無緒蒙雪霜。豈無高門與大第。齷齪何曾稱人意。乞食難逢女子憐。望塵易盡詞人氣。日暮荒郊行負薪。歸來黔突欲生塵。憐君更灑楊朱淚。予亦龍荒放逐人。

山行有懷舊遊諸子

冰雪峻嶒帶遠川。北風驅馬夕陽邊。山晴曠望黃羊磧。歲暮崢嶸白雁天。少壯已過多難日。風流空憶昔遊年。悲歌不盡鄉關思。泣向沙場倍黯然。

晚自雞嶺崖至天龍屯

迢遞回岡抱塞長。暮雲歸路劇羊腸。馬嘶古磧寒沙白。鴉亂荒城落照黃。病後關河空涕淚。戰餘身世各蒼茫。客游不異松花水。日夜滔滔下北荒。

寒食日作

昨歲從軍粟末城。今年寒食尙行營。干戈秬益他鄉泪。時序偏傷故國情。雪霽塞沙堪射兔。天寒邊柳不聞鶯。年華已分沙場老。敢向春風恨遠征。

芳樹

春樹試春風。飛花澹蕩紅。縈烟垂砌外。揚彩入樓中。葉暗鶯啼徧。枝高月度空。有情憐蕩子。流涕向芳叢。

巫山高

白帝通巫峽。黃牛對楚臺。陽雲當日夢。暮雨至今來。樹色連冬落。猿聲接曉哀。高邱遺廟在。想像珮環回。

銅雀伎

愁殺望陵人。年年漳水濱。月沈銀海雁。春斷玉衣塵。理曲縈紅態。凝妝掩翠顰。殷勤羅綺意。猶是昔橫陳。

中山孺子妾

妖姬容易寵。得奉玉階深。荷妾鳴環麗。當君倚瑟心。腰纖嗤北里。鬢巧飾南金。持謝宮中伴。辛勤抱錦衾。

結客少年場

家世扶風里。英聲擅帝州。結交憑喜怒。馳俠辨恩仇。夜火藍田獵。春鑣素滻遊。橫刀千里去。羞屬富平侯。

湘妃怨

蒼梧渺何許。迢遞隔湘岑。帝子無還日。江流空至今。亂猿傳晚嘯。叢竹暖春陰。何限懷君意。悽其瑤瑟音。

長門怨

君王憐鬢髮。棄妾在長門。自謝平陽舞。難邀複道恩。塗黃思故愛。破粉怨新痕。寂寂流蘇帳。層楹又向春。

妾薄命

春色掖庭幽。飛花落御溝。可憐蟬鬢色。長作翠蛾愁。妾夢依塘上。君恩隔殿頭。下陳曾未及。誰信善篋篋。

將進酒

絃管鬱金堂。鳥棲夜有霜。玉羈邀上客。羅袖出名倡。漏促銀虬咽。尊浮綠蟻芳。明朝歌舞處。又擬向平陽。

採蓮曲

倚楫綠潭空。新蓮相映紅。折莖愁刺密。攬葑愛心同。錦纜明斜日。羅衣逐晚風。船回繁吹合。爭入館娃宮。

春曲

樹色迎韶月。風光徧晚春。柳迷調馬客。花醉鬪雞人。被水羅裙艷。縈山錦帳新。年年行樂處。長在小平津。

閨怨

樓外露初溥。紅闌夜欲闌。風微銀漏徹。月迴玉繩殘。翠袂浮香薄。羅衾裊淚單。空將擣衣恨。迢遞夢皋蘭。

與定之飲

憶汝城南別。邊頭兵正躔。那知烽火後。還共酒杯前。半嶺依殘照。孤城隔暮烟。但令長嘯傲。敢恨滯歸年。

早秋姬人有悲落桐者感而賦此

井梧妝閣畔。秋至欲披離。玉袖徒相惜。金飈只自吹。就衰悲晚葉。抽景憶春枝。縱抱咸池曲。凋零豈見知。

贈張繡虎

去年聞汝繫京華。忽漫邊頭度玉騮。昔去白衣悲擊筑。今來紅袖泣吹笳。斷腸水咽三秋戍。絕脈城遙萬里沙。誰道飄零非壯士。姓名久已屬輕車。

同陳昭令遊西山道院

新起琳宮俯北岑。秋嵐天半靄沈沈。疎松日冷瑤壇靜。清磬風微碧殿深。爲客久慚元鬢影。懷仙空寄白雲心。可憐百戰龍沙地。猶得相將物外尋。

寄琢之

驂驛鐵馬戰初還。又見征車度遠山。萬事總傷邊塞外。十年空老別離間。秋風穹帳松花戍。夜雪雕戈木葉關。一別天涯嗟歲晚。回腸幾度大刀環。

山夜觀打魚

東峯暮雲裏。巖壑紛坡陀。連山見野火。隔浦聞漁歌。榆溪秋半綠。冰合石梁夜深滌。鯉多巖下鮫宮百餘尺。椎冰張網那可得。娟娟秋風吹早寒。羊裘倚釣空愁立。

奉送副都統安公之烏龍江

安東亞將黃驄馬。夜發旌旗宿烽下。金笳吹雪起行人。銀鑄搖星照秋野。遙遙風旆捲平沙。磧路陰沈極望賒。百轉青林幡粟末。雙流黑水接松花。寒原獵火懸軍度。校尉行營在何處。倚月弓開雁陣高。連雲帳繞鵝聲暮。黑狐川畔驛亭開。射鹿崖前候騎來。此去關山秋草徧。行邊何日玉鞍迴。

與張緒虎飲

十載一相見。憐君氣未除。天涯今夕會。舊國隔年書。白髮邊愁裏。青山戰哭餘。不須悲異域。能醉卽吾廬。

王定之過

寒落穹廬外。憐君日暮過。雪聲空磧盛。沙氣廢營多。戍久愁橫劍。兵疲憶偃戈。十年關塞淚。南望意如何。

置酒歌

臨潢城頭暮吹笛。北斗闌干月將出。金吾置酒坐北堂。銀鞍召客何輝煌。織成罽幘芙蓉捲。紫氍新茵獸文軟。黃羊作饌堆金盤。青驪搗酒揮犀椀。筵前火照明星稀。疑笳急管紛相依。錦衣如霧聲絳縹。寶刀拂露光霏微。須臾月東吐。留賓坐撾鼓。還褰丹綺帷。更出紅妝女。金鈿曜紫貂。珠桂襲青鼠。的礫芳唇歌。便娟細腰舞。沈沈芳夜闌。惻惻北風彈。青蛾扇底蹙。素指絃上寒。哀絃聲屢闕。靈虬水頻咽。但願羅袖歡。詎惜珠纓絕。酒闌華幕坐欲移。徘徊落月秋河低。錦鐙車馬縱橫去。應照香塵繞路飛。

登西閣

高閣秋風蚤。馮軒曉色分。半空長白雪。極目大荒雲。久戍應沈命。孤征敢念羣。還憐豪氣在。長嘯學從軍。
長白山。在寧古之西。高二百餘里。夏有積雪。予時風鎖紅旗。

送友人

天涯方戰伐。爾去欲何歸。斜日傳離酌。初寒到客衣。雲從雕外落。霜逐雁前飛。惆悵衰楊色。行人折已稀。
霜後一日。雁即南飛。

九日同德維雁羣兩同年西山登高

落日一尊酒。長雲萬仞臺。寒聲隨雁去。秋色傍鵬來。烽火鄉書隔。冰霜旅鬢催。故園叢菊在。零落爲誰開。

九月十二晚觀回獵賦贈薩君

山晚初回獵。江寒早渡冰。風旗收萬馬。雪帳散千燈。拂劍君何壯。鳴弦我未能。莫言猿兔盡。側目有飢鷹。

寄琢之友聲

昨歲登高日。從君汎羽杯。只今千嶂裏。猶憶百年臺。風景人將老。江山客又來。殊方良會少。俛仰獨餘哀。

一藍岡夜行

亂峯斜豁月。曠曠。燿火微明隔嶺東。孤障旌旗寒。炤雪。嚴城刁斗夜臨風。鳴弓盡日隨邊馬。裂帛何時寄塞鴻。朔漠自來爭戰地。欲將書劍一論功。

秋日雜述十首錄五

軍城遙倚萬峯開。峯際浮雲繞堞迴。落日旌旗人出戍。秋風笳鼓客登臺。黑林險入重關斷。黃水深蟠入漠來。昨夜隔河新駐牧。平安火色到龍堆。

西山雜部古烏桓。東極三城屈馬韓。積雪四時常塞迴。河冰千里照關寒。種榆尙識秦人地。射柳空傳漢將壇。滿目沙場征戰後。誰將耕鑿起彫殘。

戍樓鞞鼓動嚴城。朔塞山川鬱戰爭。毛節未歸魚海使。羽書還下鐵關兵。月高亭障千峯出。雪照旌旗萬馬鳴。莫道瘡痍未起。廟謨今日重東征。

朔風毳幕擁旌旄。八陣營開筆策高。鐵馬兩甄橫塞草。水犀三翼動江濤。時大治水軍於松花江。以流人

之習水者，充棹卒。遷人未見征徭息，屬國微聞戰伐勞。漫道射鵰多健卒，只今文士習弓刀。役車歲晚未曾休，匹馬關河畫角愁。豈是邊人輕遠別，應知漢法重長流。海西雨雪移中監，槎表星河博望侯。總道故園戎馬徧，轉蓬何地不堪留。

贈友故祀丞

曾從郎吏侍瑤壇，羽衛森森扈玉鑾。一自橋陵成異代，翻從邊徼識祠官。金河萬里魚龍晚，銀海千年鳧雁寒。猶有遺弓當日淚，秋風沾灑在三韓。

贈唐副帥

唐公年少武且賢，十年部曲陰山前。握中鵠印桃花綬，櫪上龍媒杏葉韉。生少邊城誇任俠，珊瑚寶劍頻流血。挽強不數射鵰兒，入陣能攜畫眉妾。山頭草綠獸初肥，錦褶珠袍去若飛。筆策數聲秋磧裏，看君拋鞚合長圍。

題淨公房

淨公精舍紛蕭爽，花石橫堦構佳賞。芙蓉曙壑凝早寒，松栝秋巖激清響。寂寂禪扃掩北岑，泠泠疎磬出東林。定知習靜長趺坐，何必思歸動鳥吟。

送人之榆關

步君控弦兒，家世陰沙外。昔從弓高侯，西歎雲中塞。戎錦騰裝鞞鞞紅，魚文雙服鳴鵠弓。碧毛氍帳五千

騎詔書分遣隸安東。單馬曾穿白波壘。一劍能誇黑稍公。自從上將沙場沒。部曲分攜各南北。木根山畔不能歸。粟末營前更驅役。日逐何曾負口恩。段氏甯慙忘晉德。汗馬驂驪長苦辛。天涯轉戰白頭人。玉劍徒悲十年戍。鐵衣空盡九邊塵。今年奉使長城去。馬首重尋舊時路。河繞句驪候雁稀。關開鶉鶩行人度。清霜七月草初黃。筆築聲中磧路長。當時折戟秋原徧。一慟嫖姚舊戰場。

獨行城東循山至白崖

涉江企往蹤。尋山曉遐軌。孤遊豈不懷。繁悲亦已弭。宛轡遵郊岐。攀崖眺剌墟。曾陰鶴平皋。蒼烟引遙汜。林衣寒委綠。岩霏暮凝紫。遠鷗乍明沒。驚麇或騰倚。披覽興徒牽。逍遙思何已。軫此羈邊情。睠彼棲巖趾。躊躇我馬煩。將從叱羊子。

秋夜送卞書記赴軍幕

明燭映華纓。檀槽雜鳳笙。離筵開鬪幕。別騎動層城。四五金波夕。三千玉塞程。翩翩阮書記。名貴武剛營。同雁羣城南。泛舟至白崖口。

數里層城色。迢遙帶落暉。欲乘孤櫂去。祇訝舊遊非。江晚滄波淨。山寒翠鶴稀。微霜邊候蚤。愁攬薜蘿衣。密將山晚歸。東陳衛玉馮玉文。

獨往秋峯裏。寥寥遠度鐘。燒痕依岸盡。林影入江重。有恨空橫笛。無家且負舂。天涯烽火徧。吾道竟誰容。

晚步原上

柴扉猶返照。樵徑已涼風。暝色歸平楚。秋聲落早鴻。交疎知客久。身棄覺途窮。惆悵年華晚。吾將侶釣翁。

曉登天羅嶺柬陳雁羣

滄江碧嶂曉寒凝。莽莽雲山鬱幾層。貂狗四時羶白雪。魚龍九月蟄元冰。放歌絕壑頻來往。抱病窮邊獨寢興。多難漸看豪氣盡。愧將湖海問陳登。

西山閣晚眺

落日憑闌四望開。江流如帶抱山迴。雲林晴色秋橫野。雪嶺寒光晚照臺。萬里塞垣長放逐。百年鄉國未歸來。天涯此日無衣客。愁聽清砧處處哀。

夜同諸君飲江亭

秉燭邀賓到野亭。蒼烟白露滿前汀。金尊美酒還堪醉。玉笛哀歌不可聽。明月皎宮江漠漠。秋風漁火夜冥冥。却愁塞水多嗚咽。欲泛扁舟且復停。

木丹山曉行

滄江晶淼帶長纒。拂霧宵征路轉難。一片關城秋色動。半空旌旆曙光寒。阜鵬風急聞弓響。白雁霜清度角殘。十載從軍今未返。荷戈愁更出樓蘭。

自木丹還城作

蕭蕭征馬涉溪流。颯颯寒旌背驛樓。萬里獨來天北極。十年空逐海西侯。秋深城闕還悲角。老去關山只

敵裘日暮登臺瞻大漠。黑松黃草不勝愁。

蒙古屯同雁羣晚眺

磧烟山雪遠蒼茫。落日層臺雁幾行。殘壘迴連寒燒紫。穹廬遙壓暮沙黃。邊書亂後應難達。客鬢秋來各已蒼。漫道山川堪極目。登臨無那是殊方。

帳中作示雁羣

白草高原繞拂廬。長天凝望意何如。關山夜月悲龍笛。江海秋風隔雁書。搖落漫驚時序改。艱難空惜故人疎。只今轉徙隨羊馬。敢向長沙問謫居。

冬至懷緝虎却寄

憐君經歲滯臨潢。至日傳書怨路長。雪嶺幾時歸遠戍。冰天何處轉微陽。蕭條晏歲長多病。零落窮交各望鄉。總是寸心灰死後。難隨葭管一飛揚。

除夕

寒燈相對恨如何。攪鬢星星愧漸多。一歲尙憐今夕在。半生空向異方過。哀笳絕障虛傳警。濁酒穹廬且放歌。漫道春光明日好。塞天冰雪正嵯峨。

雞嶺崖與王定之別

不盡平蕪色。蒼茫到海瀕。烟生漁舍晚。花發戰場春。亂後輕僑客。兵餘重故人。那堪離索恨。回首見行塵。

觀姬人入道歌

龍沙女子善歌舞。紅顏的皜方三五。自憐薄命失青廬。欲問長生歸紫府。聞道餐霞生羽翰。明璫聲繞步虛壇。舊著錦裙嬌試馬。新吹玉管學驂鴛。盤龍鏡斂如雲髮。羽服襪襪曳輕雪。已裁菡萏戴瑤冠。尙掃胭脂開寶曆。降真火煖博山爐。竊藥還能托月無。白玉帳寒憐鬪幙。青岑醴熟厭醅酥。日暮然燈禮瑤席。清磬泠泠滿空碧。法曲能將漢語傳。隱文自用秦書譯。寂寂清關晝不開。駐顏何處望蓬萊。共憐飛雪金徽外。更有明星玉女來。

山中

山下長烟松檜林。山家往往住層岑。泉飛丹嶂秋嵐溼。葉下蒼溪晚徑深。折芰每憐人獨坐。采參時見客相尋。烟霞不少中原地。十載殊方愧滯淫。

帳夜

穹帳連山落月斜。夢回孤客尙天涯。雁飛白草年年雪。人老黃榆夜夜笳。驛路幾通南國使。風雲不斷北庭沙。春衣少婦空相寄。五月邊城未著花。

寄贈姜京兆定庵二十韻

昭代論才傑。先生實擅場。人宗瞻藝苑。鄉譽最巖廊。議國會焚草。承家本釣璜。夕郎青瑣闥。京尹黑犀章。望久兼丁孔。名今壓趙張。官曹連鳳掖。封域割龍荒。浪水侵遼綠。關雲帶闕黃。山川尊北鎮。居守重南陽。

共喜台衡逼。還看竹帛光。龍門延客峻。馬帳說經長。儒雅耽柔翰。風流凭隱囊。探奇興不淺。愛士勢偏忘。歲晏憐窮鳥。天涯恤翳桑。詩傳子卿塞。書到幼安牀。高義驅流俗。微生愧激昂。幸邀千里願。彌結九迴腸。恩重空銜涕。情深漫自傷。無家隨泛梗。有賦獻長楊。何日仲良覲。凌雲感聖皇。如能薦文似。矯首望楊莊。

封祀長白山二十韻

配極神山峻。修封帝命崇。金函新建嶽。玉檢此升中。咸秩遵虞典。昌期答漢功。星輶瞻二使。雲燎視三公。戴斗原承北。苞祇獨峙東。千年今值聖。萬歲昔聞嵩。地接輿龍近。天開蠹鳳雄。嵯峨分氣象。窈窕闢鴻濛。五時儀還陋。三祠禮自同。宗禋通肸蠁。展采契昭融。圭璧陳緹帟。駢駒襲錦幃。日華遙合扇。雲氣迴成宮。列嶂輝瓊雪。雙流亘玉虹。壯哉符寶勢。赫矣麗璇穹。仙靄凝巖紫。高霞鏡野紅。何須傳縱雉。已見永垂鴻。芝本祥侔岱。枌榆祀比豐。紫壇三望徧。絳節百神通。運喜逢文命。書慙獻所忠。聖皇長有道。靈秩慶無窮。



2189

秋
笳
集附錄
二



成集書叢

編初

者編主
五雲王

行發館書印務商



秋 笈 集

附 錄

(二)



3 0645 2002 0

吳 兆 騫 撰

秋笏集西曹雜詩卷四

詩二

兆騫邱樊幼生。菰蘆下士。弱齡有意。總角知名。才愧臨川。蚤擅芙蓉之譽。年同僧孺。卽傳芍藥之篇。漢代三君。長其聲價。江東二俊。許以追攀。旣而擢秀藝林。含毫鎖院。自慚庸薄。猥筵賢良。江頭艤榜。京尹問孝廉之船。道上鳴鑣。君王命上計之吏。豈知新粧始竟。便嫉揚蛾。嘉卉初繁。遽逢鳴鳩。孝子有撥蜂之懼。賢人生市虎之悲。直比朱絲。乃見嫌於曲木。貞如白璧。忽致嘆於緇塵。成是南箕。搆茲北寺。江文通之就吏。傷心謗缺之間。范孟博之拘囚。慷慨棘木之下。夏臺日暗。疇惜賢豪。貫索星高。竟災文士。望慈闈於天際。白髮雙悲。憶少婦於樓中。紅顏獨倚。絨冤情而莫訴。抱幽憤以誰知。嗚咽銀箏。空寄思鄉之調。淒涼石闕。難傳羈客之情。爰寄托於篇章。聊自陳其胸臆。南冠琴曲。泣鍾儀之土風。西陸蟬聲。庶駱丞之慨咏。詩成雜體。情比四愁云爾。

戊戌三月九日自禮部被逮赴刑部口占二律

倉黃荷索出春官。撲目風沙掩淚看。自許文章堪報主。那知羅網已摧肝。冤如精衛悲難盡。哀比啼鵲血未乾。若道叩心天變色。應教六月見霜寒。

庭樹蕭蕭暮景昏。那堪縲紲赴圜門。銜冤已分關三木。無罪何人叫九閭。腸斷難收廣武哭。心酸空訴鶴亭魂。應知聖澤如天大。白日還能炤覆盤。

四月四日就訊刑部江南司命題限韻立成

自嘆無辜繫鷓鴣。丹心欲訴淚先流。才名夙昔高江左。謠誅於今泣楚囚。闕下鳴雞應痛哭。市中成虎自堪愁。聖朝雨露知無限。願使冤人遂首邱。

感懷詩八首呈家大人

棘寺陰沈樹色長。故園何處淚沾裳。獨憐積毀能銷骨。無那含冤易斷腸。授簡圍扉思夏勝。上書梁獄泣鄒陽。金門咫尺招賢地。不得雄文達建章。

風塵日夕滿燕山。馬角烏頭尙未還。夢繞高堂憐白首。書來香閣泣紅顏。淒涼鈴柝悲風外。黯淡松楸落炤間。極目南雲何處是。羈心一夜度江關。

寂坐匡牀引濁醪。臨風愁聽角聲高。謗書何事騰三篋。壯士由來泣二桃。目斷鄉關空涕泗。心傷烏鳥自悲號。可憐一片江南月。永夜蒼蒼客夢勞。

涼風吹雨夜窗虛。木索嬰身獨起居。豈有姓名藏複壁。可憐涕淚滴衣裾。初明歸思通天表。孝穆哀情僕射書。惆悵慈幃新白髮。側身南望一愁予。

懷牆寂歷鎖莓苔。兀坐槐陰迴自哀。飛雪漫傳鄒衍恨。凌雲誰惜馬卿才。異鄉節物愁中度。舊國烟花夢

裏迴何日烏啼傳大赦。秋風重接故人杯。

青青杜若滿芳洲。迴首家山憶昔遊。父子文章推二庾。弟兄才筆說諸劉。那知眉黛悲謠詠。還使衣冠泣

纍囚。聞道江東花信好。五湖歸去看漁舟。

長吹玉笛到雞鳴。讀罷魚書泪滿纓。千里關河風雨恨。一堂兄妹歲時情。板輿奉母嗟潘令。鱸膾思鄉有

步兵。折盡柳條歸未得。中宵腸斷闔廬城。

殷勤尺素勸加餐。強引清尊且自寬。伏闕何人懷白璧。當門從古忌芳蘭。山頭晞髮孫登嘯。軍府彈琴楚

客冠。見說九重多雨露。擬披雲霧叩鴛鸞。

聞有家信遂成

遙傳江上信。八月到燕京。故國經年別。鄉書萬里情。秋雲低驛樹。夕照下關城。極目天涯外。蕭蕭旅雁鳴。

寄內二律

憶汝深閨裏。淒涼畫閣塵。有情憐蕩子。無語向尊親。明鏡雲鬟亂。芳襟玉筯新。迢迢今夜月。愁殺兩鄉人。

薊北秋偏早。江東客未歸。不知更歲序。長自泣羅衣。砧杵霜華溼。星河雁影稀。西窗明月在。腸斷是鴛機。

偶成二律

高秋寒氣迴。延眺獨傷心。欲餉秦嘉鏡。難爲莊鳥吟。客愁千里外。鄉夢五湖陰。苦憶登臨處。迢迢不可尋。

一自辭鄉國。漂搖類轉蓬。刀環徒有約。尊酒竟誰同。風急催寒角。霜空度早鴻。遙憐潞河水。千折到江東。

秋夜寄計甫草

槐樹沈沈鼓角催。愁看清露滿荒苔。金風入樹秋陰薄。璧月臨窗夜色來。獻賦未知聖主意。行吟還使故人哀。天邊鴻雁南飛急。悵望江南首重回。余部訊詩七月廿六日已呈御覽故有獻賦未知聖主意之句。

答贈丁繡夫二首

獨棹孤舟慘別顏。夢魂終日繞吳關。春來無限新楊柳。惆悵東風不忍攀。

昨歲昌亭酒。相攜向碧潯。誰憐一失所。惜別到如今。星漢三秋隔。風霜五夜深。傷心看候雁。何處寄歸音。

寄懷袁文生黃平子二子

二子今名彥。相逢意自親。金鞭曾試馬。羅袂共留賓。薊北雲沙暗。江東花鳥新。那堪思往事。回首欲沾巾。

有感三律次陳子長韻

燕山秋望迥。霜露晚來多。直道原如此。吾生可奈何。天寒驚歲序。親老泣風波。却憶談經日。淒涼橫笛歌。深秋西暑冷。兀坐意悲哉。笑傲應憐我。艱難孰愛才。異鄉嗟客久。故國少書來。不作窮途哭。誰知阮籍哀。欲盡平生語。艱辛敢自陳。已成鈎黨禍。莫忌獨醒人。名辱憐詞賦。時危聽鬼神。君門真萬里。流慟向青旻。

送人還江南

八月霜清木葉催。天涯惜別帝城隈。風塵作客三秋暮。鄉土驚心萬里迴。東府山川天闕近。南徐潮汐大江來。故園橘柚垂垂發。滿目商飈迴自哀。

送姚子上還荊州

御苑秋高樹色微。送君擁傳出王畿。青蘋風急催征棹。白雁霜清炤客衣。山接虎牙寒峽險。江連鷓尾暮潮歸。却憐憔悴幽州客。矯首空嗟兩地違。

九日同陳子長飲分韻得十五刪

太息今年重九日。羈棲無處望秋山。寒花炤眼傷遲暮。白雁低空獨往還。西署漫傳燕市酒。南冠頻泣楚臣顏。最憐舊日登高地。碧障丹楓未可攀。

卽席再用前韻答贈子長

北風驅雁度燕山。落日頽垣炤客顏。豈有絳囊傳令節。漫因黃菊憶鄉關。陳遵意氣誰堪並。沈炯漂零尙未還。無那少年俱落魄。祇應潦倒酒徒間。

再和子長

禁城秋晚雨如絲。把酒荒臺感歲時。已見清霜催旅鬢。那堪斜日上花枝。曲中風土羈臣淚。笛裏關山客子悲。莫道舊游星散盡。比來傾蓋愧君知。

感寄

荒庭獨坐起悲歌。抱病誰憐在網羅。歲晚冰霜生白髮。秋來書札阻黃河。李膺賓客飄零久。庾信文章涕淚多。忽憶去年高會日。紗絳絲管正婆娑。

夜坐東陳子長

明河如練俯城頭。節序驚心迴獨愁。月色遠連吳苑樹。角聲寒動薊門秋。鄉心萬里隨鴻雁。旅病經年繫鷓鴣。惆悵逢君多難後。不堪重說五陵游。

白頭宮女行

長安女尼妙音者。本崇禎時舊宮人。後出居民間。祝髮於北城之佛舍。與海昌相國居址接近。常出入相國家。述甲申三月及宮中舊事甚悉。又言宮中侍姬。都以青紗幕外約釵梁。自遭喪亂。香奩寶釧。悉爲人奪。惟存青紗數幅。猶昭陽故物也。今年戊戌。予以謗議械繫都官。而相國亦以他事下吏。因與其嗣君直方子長相見。酒酣耳熱。爲言妙音。予旣自傷謫枉。復聞妙音之事。悲紅粉之飄零。感羈人之淪落。乃連綴其詞。作爲長歌。以傳於樂府爾。

長安女冠頭似雪。曳地黃繩懸百結。手執金經淚暗垂。云是前朝舊宮妾。一朝充選入披香。倭墮新梳內。殿妝低鬟自惜青。蟲小繫臂愁看絳縷長。當年御極方清晏。宮中屢啓催花宴。雲母屏開見舞人。水晶簾捲低歌扇。歌舞年年樂事殊。森沈寶幄挂流蘇。北宮漫閱魚龍戲。東絹頻臨蛺蝶圖。圖史紛披開珠翠。深宮鎖日長無事。鵲顧書從女史傳。鸞雛釵向昭儀賜。昭儀明艷獨承權。促坐金牀倚笑看。燈簇九微長侍。釐粧成七寶。自凭闌。闌前羅綺紛成列。阿監才人幾分別。玉墀草細打毵高。珠箔花深吹管徹。景福宮前細柳垂。瓊軒不閉共追隨。繡鐙纏鬢嬌試馬。綠絳隱几倦彈碁。春花秋月年華換。掖庭寂寞腸堪斷。素手

繙書教小王。紅顏對食憐同伴。漢宮中自相配偶。謂爲對食。自從羽檄擾秦川。遂使官家少晏眠。五夜刺
閨頻報警。三春合殿罷開筵。幾載天顏慘不樂。中宵獨坐占芒角。燉火新開內教場。詔書屢下文淵閣。
門封事日紛紛。督撫潼關復覆軍。幾部黃巾殘豫楚。千羣青犢下宣雲。宣雲處處名城墮。倒戈自啟居庸
鎖。關下交馳告急書。殿前望斷平安火。軍鋒倏忽逼神京。一夜都人已數驚。內苑左貂羣揖盜。圍營飛騎
半翻城。城上弓刀爭內向。蒼茫無復蓬萊仗。獨御金鞭視九門。空頒鐵券封諸將。白馬青袍捲地來。君王
長嘆下平臺。口詔內人從避寇。手持愛子共銜哀。可憐十葉漢天子。海竭山崩竟如此。複壁甯教伏后藏。
佩刀自刺清河死。珠傷玉碎滿曾成。宮車無那赤龍迎。猶有黃門會殉主。豈知紫闥竟屯兵。自憐白首深
宮住。欲問家山渺歸路。潛脫霓裳出九重。却尋月徑依雙樹。一托香臺已十秋。每談遺事自生愁。室中漫
禮金仙席。夢裏還隨玉輦遊。惆悵生年遘陽九。戒珠持遍甘衰朽。仙家龍種尙飄零。賤妾蛾眉亦何有。我
來故國幾沾翰。摩娑銅狄北風酸。昭陽舊侍悲通德。長樂姬人識佩蘭。從古存亡堪太息。淒涼無處尋遺
跡。麥秀偏傷過客情。柘枝還下宮人泣。

秋雁篇

長安八月金風起。旅雁飛飛度龍水。共道連翩傍九霄。甯知迢遞經千里。千里隨陽道路賒。揚聲接翼向
天涯。銜蘆欲避金河雪。唼藻還依玉渚沙。沙頭日暮秋蕭索。夜火如星亂棲泊。江路由來足稻梁。雲間却
自多憎繳。憎繳連天何處飛。冰霜滿目未能歸。月冷關城哀響過。風迴汀渚斷行稀。可憐歲晚爭飛急。羽

翻摧頽去安極。拂霧宵傳紫塞書。驚寒曉雜朱樓笛。誰家少婦倚朱樓。忽見孤鴻淚暗流。玳瑁牀空紅粉怨。茱萸帶緩翠娥愁。愁心幾度音塵絕。擣盡寒衣向秋月。詎憐明鏡歇容華。却恨狂夫限城闕。城闕遙遙落雁低。青蘋碧石五湖西。何如長住吳江渚。不使年年有別離。

冬日同子長賦限韻立成

歲晚驅征雁。時窮泣鮓魚。漫憐同難久。還憶結交初。越石原無罪。文通未上書。白雲空在眼。腸斷望鄉餘。

冬夜同諸子飲方坦庵先生齋卽席賦呈

月落屠城雁度哀。南冠相對暫銜杯。天涯兄弟情偏苦。江表山川夢未迴。穿徑已荒庾信宅。思家莫上李陵臺。夜深何處吹羌笛。腸斷鄉關是落梅。

夜同子長過方婁岡學士賦贈

絳蠟沈沈炤眼紅。冰天歷歷度飛鴻。披帷莫厭經過密。把酒應憐患難同。夾巷鼓笳喧北寺。中宵星斗動西風。十年冠劍銅龍署。回首君門歎轉蓬。

送張緇虎南行和陳相國

經年西署相依久。忽送征車恨若何。嚴譴已嗟同放逐。餘生那更歷風波。新亭樹色臨江盡。京口濤聲到海多。萬里故鄉猶在眼。憐君重得暫經過。

戊戌除夕偕諸子集陳素庵先生齋卽席同直方子長賦

促漏催寒盡。官梅逼歲新。不堪今夜酒。相對異州人。竄逐存餘齒。艱難愧此身。傷心瞻北斗。明日帝城春。
己亥正月朔夜同子長小飲口占
條風淑景動皇州。孤客相逢尙滯留。萬里共傷多難日。三春誰記少年游。姓名讒枉悲青史。門次凋殘累
白頭。遙夜思歸不成寐。角聲吹徹五更愁。

人日同子長賦

支離棘寺逢人日。強進芳尊倍愴神。鳳闕綵花稀到眼。龍沙遷客自相親。人遙南國書難寄。律轉東郊柳
漫新。忽憶去年偕計吏。正驅鞍馬大河濱。

答贈陳子長

驚座聞名久。相逢卽故知。片言深契托。九折共艱危。伏闕書難上。懷鄉調自悲。帝城春色早。腸斷向南枝。
正月九日同子長望月

客心愁不寐。坐見月華移。只自臨遙夜。甯知異舊時。光連關樹迴。寒入苑鐘悲。遠憶金閨婦。翠蛾恨別離。
元夕同直方子長賦

寂寞圍牆少客過。聽殘更漏復如何。自將杯酒酬佳節。不爲艱虞廢嘯歌。月繞庭柯春色靜。風傳城角夜
聲多。遙憐燈火千門裏。繹繹雕輪度玉河。

春雪篇

此予童時所作也。今年浮繫西曹，見積雪綿旬，凝堦不散，因記憶錄出，以正素庵先生。然語多忘失，復爲點翰，以視向製，略更四五矣。先生及直方子長，皆爲屬和，遂併記之。

元隨吹不已，一夜起嚴陰。漸覺輕寒侵曉幕，俄驚飄霰逼春林。林端騁望光如曙，六出霏霏挺瓊樹。祇道尋芳鳳苑春，誰知吹雪龍山暮。龍山雪色舞空來，沾花拂柳自徘徊。金屏夜掩疑含月，綺戶晨開悞落梅。誰家小院湘簾溼，幾處高樓羌笛哀。數聲羌笛天如練，珠斗年光君不見。積聚遙含翡翠窗，凝暉深炤鴛鴦殿。鴛鴦殿裏耐春寒，少女粧成自倚闌。歌扇半遮憐粉薄，舞衣乍點惜花殘。海神昨日車輪度，雪花落盡長安路。玉房密坐進蘭尊，繡被薰爐分桂炷。桂炷沈沈樂未央，可憐春色半飄颻。翦成綵勝無顏色，夢繞梨花總斷腸。梨花匝樹春歸蚤，鱗亂空階愁不掃。班女何須怨白團，王孫空自思芳草。草色淒迷紫陌曠，那堪飛雪正紛紛。三時花月知何處，千里瓊瑤祇憶君。瓊瑤滿眼難凭折，黃竹哀歌自淒咽。已悲搖蕩任迴風，誰惜飄零在韶月。春晴日莫嘆蹉跎，白雪漫天可奈何。惟有東瀛雙玉馬，庭前依舊散陽和。

感示子長

夜靜危譙刻漏頻，客中對爾倍情親。非關刀筆嚴持法，自是聲名解悞人。獻弔湘潭悲宋玉，竄身遼海泣崔駟。南天望處堪腸斷，榆柳江皋已暮春。

閏三月朔日將赴遼左留別吳中諸故人

薊門三月柳堪折，玉關遷客肝腸絕。結束征車去舊鄉，矯首天南恨離別。憶昨胥臺事俠遊，才名卓犖凌

王侯黃童雅擅無雙譽。溫嶠羞居第二流。相將日向春江曲。闔廬墓前草初綠。綵鷁春風客似雲。珠簾夜
月人如玉。少年行樂恣游盤。夾道飛花覆錦湍。按歌每挾茱萸女。駐馬頻看芍藥欄。筵前進酒題鸚鵡。一
日聲名動東府。擬從執戟奏甘泉。恥學吾邱能格五。去年謬應公車徵。駿馬高臺幾度登。自許文章飛白
鳳。豈知謠諑信蒼蠅。蒼蠅點自由來事。薏苡偏嗟罹謗議。賦就凌雲祗自憐。投人明月還相棄。身嬰木索
入園門。白日陰沈欲斷魂。北燕漫說騶生哭。東海誰明孝婦冤。銜冤狂狴悲何極。慷慨陳詞對巖棘。幽怨
空教托楚辭。嚴威竟已口秦格。忽承恩譴度龍沙。邊草茫茫去路賒。名列丹書難指罪。身投青海已無家。
銷魂橋畔誰相送。一曲蘆笳自悲痛。阜帽慚非避世人。青山何處思鄉夢。鄉心日夜繞江干。江柳江花不
復攀。萬重關塞行應遍。十載交游見欲難。從此家山等飛葢。滿眼黃雲橫大漠。自傷亭伯遠投荒。却悔平
原輕赴洛。一向冰天逐雁臣。東風揮手淚沾巾。只應一片江南月。流照飄零塞北人。

秋筵前集卷五

詩四

春日篇

亭皋三月東風吹。匝道烟花豔綠圍。十里紅潮連翠岸。千重碧樹起珠帷。侯家別墅春如織。芳林繁囿連雲日。蘭沼輕波泛紫鴛。薰樓高影巢元鳳。樓陰架址碧嵯峨。窗戶玲瓏盛綺羅。日映翡帷銀蒜靜。風微珠綴玉鈴和。鈴聲隱隱花間起。榆錢雪落覆明水。數蝶低飛香草中。流鶯細囀垂楊裏。毵毵垂楊滿碧郊。遊絲百尺亂烟條。陌上繁陰臨玉道。隄邊香霧鎖虹橋。虹橋一望明于素。朱軒紺轡紛相度。錦障新開瀟水園。羊車近出長安路。長安此日正妍華。幾處樓臺映晚霞。翠鞵香細初調馬。繡袷風輕試問花。綠疇去去芳埃逐。油幕生光照平陸。帶織茱萸耀紫珊。鞍裝杏葉團紅玉。玉鞭時向狹斜行。弱絮繽紛綴道傍。鬪雞坊裏花初滿。走馬臺邊柳正黃。柳黃花滿相凌亂。由來此地稱華豔。日暮徵歌趙李家。夜來貰酒胡姬館。十五胡姬不解羞。低鬟輕倚鈿篋篋。私結紅羅邀上客。自矜脂腕整搔頭。年年歲歲爭遊冶。挾彈探丸空藻野。南陌方看千騎來。東皇又擲三春謝。三春風日自陰濃。落盡梨花鎖院中。聞道西園芳草路。羅衣迎暑送春風。

金陵篇

高皇昔日起西吳。手挾靈旗問獨夫。旣向龍沙開絕漠。遂來虎踞建神都。燕子二潮通海浪。鴻郎萬雉俯江波。江波去去無窮已。城中宮閣參天起。鵝鵲連延抗碧臺。鳳皇窈窕圍玫瑰。隱隱長橋水臥虹。沈沈華闕霞含紫。圓井春寒露索高。上林花隱風弦細。蘭綺鉤陳七寶鞭。深深紫袖寫便姍。晝靜烟花金殿杳。宵嚴鐘鼓玉珂寒。七校隊齊仙仗外。羣公珮響翠華前。日麗朱城百萬戶。氣迫皇圖三十年。文皇爲念邊城苦。欲臥燕山留北鎖。竟從鹿輅策關中。難仍牛首稱天府。一自宸旒去紫臺。遂令南內瑣青槐。玉女窗寒風斷續。景陽鐘歇月徘徊。銅溝不膩紅粧粉。金屋空餘烏韭苔。轆轤聲斷曉鴉曉。宮沙含日春秋早。獸環深閉寂難知。鈎盾蕭涼無復掃。時見朱櫻薦寢園。獨看碧草蕪馳道。列聖相傳海內平。侯家甲第起紅塵。十二重樓連鳳翼。三千複帳結鴻紛。香車半卷油幢暖。畫閣全傳水調清。舞愛弓腰碧纒轉。歌殘子夜玉鈎明。繡戶宵籠雲母扇。晶盤曉進月兒羹。旣傾燕尾臨芳沼。還問桃根向石城。石城年少如鷹撇。腰下吳鈎凝紺雪。挾妓酣歌玳瑁樓。揮鞭驕試金錢埒。檀槽撥軟貼龍香。絃絲斷施鸞血。獨來陌上恣矜趨。放犬呼鷹樂未消。醉拭芙蓉輕一諾。笑擲珊瑚賭百驍。絳衫香襲浮雲鞞。紫艾光承明月刀。明月高高照芳甸。秦淮宛轉澄如練。汀上銀沙寫露華。堤邊珍樹吹花霰。錦纜風迴榜唱微。蘭橈波細簫聲轉。簫笳清吹滿皇州。夾道芳塵掩畫樓。睡鴨香濃初按茜。鳴蟬梳罷學藏鈎。街喧蘭葉迎珠勒。隊簇桃花映綠鞵。綠鞵珠勒紛馳逐。誰知禍亂來相促。九逸驚從代邸來。三星更向東山簇。江表雖飛晉氏龍。中原已失嬴家鹿。

競傳寶雉集丹陽。南紀欣開司隸章。酒置新亭風已異。鑾回舊內日重光。瑯琊方擬戎衣定。仙人又進昭陽讖。馬控青絲自壽春。鷗銜黃紙沈江乘。聞道哥舒已棄關。猶矜監牧能行陣。宮門不見幾傳烽。君王還狩豆田中。淚盈秋雁開黃帕。艦列晨鳧渡阿童。鄭畋迎鑾思敵愾。傷心豈料成青蓋。較戰無聞朱雀航。負恩竟賣盧龍塞。拂廬廚幕遍京華。園廟蕭條擁塞沙。轅韞亂度臺城柳。劈策寒摧上苑花。可憐壞道哀湍急。墜門夜靜荒燐碧。雪暗焚宮泣玉牀。風酸辭漢悲銅狄。黃頭洗箭唱兜離。故老吞聲淚綆縻。仁壽鏡懸精衛怨。茂陵書去子規曠。金釵歌斷臨春閣。秋飈槐葉紛蕭索。已歎三千落劍花。漫期十八開蓮芍。回首南朝事惘然。月明麋鹿故宮前。獨有石頭春水碧。烟波夜夜送潺湲。

長安道

馳道春風晚。長楸落日斜。按鷹來戍里。挾瑟向侯家。紈扇平陽月。珊瑚宣曲花。君王方好武。新拜李輕車。

洛陽道

戒曉開平樂。華纓滿洛陽。風花低錦障。歌吹競紅粧。金埒新調馬。銀鉤學採桑。鬪雞殊未返。知是就陳王。

塞上曲

羽檄夜徵兵。嫖姚下柳城。邊烽連戰氣。隴樹聚秋聲。月落金笳冷。風高鐵馬鳴。歸來報天子。獵火萬山明。

塞下曲

萬里覓封侯。金鞍被錦裘。弓懸龍塞月。角度雁門秋。白草迷孤障。黃雲斷戍樓。應知漢都護。持節到涼州。

紫駟馬

蹀躞蘭池馬。鳴鑣出灞川。氣驕垂柳側。嘶斷落花前。鞭影懸絲鞚。衣香拂錦鞵。方隨驃騎去。羞向畫樓邊。

劉生

年少扶風客。驕行繡陌傍。期門新挾彈。長信舊爲郎。輕薄徵紅袖。矜趨脫紫韉。獨來春草獵。名姓滿咸陽。

關山月

明月照邊州。交河迴不流。五原征雁斷。六道戰雲愁。鐵甲寒生白。銅焦夜帶秋。誰憐樓上女。腸斷大刀頭。

雨雪曲

關山千里雪。客子事長征。銀磧雙雕沒。冰河一騎行。雲橫青海戍。烽掩白登城。辛苦金微外。嫖姚未解兵。

班婕妤

君王憐燕隊。棄妾似飛蓬。輦路苔文暗。簾鉤露彩濃。秋風傷擗素。夜月怯窺紅。豈怨成孤寢。私心託守宮。

銅雀伎

井幹倚清漳。朱顏送豔陽。繡幃春漠漠。陵樹月蒼蒼。紅斷閒裙蝶。鶯歸罷笛牀。遙思魏宮夜。歌舞奏名倡。

晚眺寄計甫草

夜色蕭條萬里開。愁人臨眺獨徘徊。浮空遠碧天邊盡。不斷荒烟樹杪來。孤障風高悲鼓角。春濤日落映樓臺。只今戎馬迷南北。且向袁絲問俠才。

寄楚黃王涓來

相思空唱梅花曲。夷甫行藏近若何。目極江湘千里暮。書傳關塞一鴻過。潯陽潮落笳聲壯。笠澤天高戰氣多。好去買山尋鳳侶。莫教風雨泣卷阿。

送人之越東卽席分得蕭字

平原春草莽蕭蕭。遊子乘春訪石橋。舟渡雲中觀海日。人從天際聽江湖。赤城東去霞標盡。閩嶠南開龍氣遙。倘過嚴陵逢釣叟。可能回首憶吹簫。

雜詩同楊俊三作

黃鶴凌風飛。翩翩橫九垓。秋風何蕭瑟。長鳴有餘哀。我生亦何爲。栖栖隱蒿萊。圓景依中天。繁星蝕其輝。朱華耀芳林。嚴霜瘁其菱。昭王久已死。誰起黃金臺。壯夫固有時。無爲長搶摧。周周顧羽毛。安知橫絕才。少年好遠遊。駕言適沅湘。廣川激清波。惠風蕩紅芳。走馬陽雲臺。流蘇何飄揚。天晴春草細。平原浩茫茫。飛身接雙兔。倒捉青絲韁。南楚多俠客。相逢大道傍。解鞍藉草坐。飛騎徵名倡。是時暮春初。新鶯滿高楊。絲管雜鶯聲。歡樂方未央。自擬今日遊。百歲可終常。豈意迅商來。吹我還舊鄉。棄彼繁與華。摧藏守空堂。青蛟競飲食。元豹擇文章。扶搖倘我借。矯翼凌扶桑。

上山採芳杜。岩阿多薄陰。東風媚春華。枝葉自相尋。之子渺不歸。歲月日以侵。憶君新婚時。相於同錦衾。今君遠行役。悠悠隔江潯。門有車馬客。云來自桂林。牽衣問夫壻。言阻湘水深。庭中有好鳥。命儔揚清音。

而我竟何如。紅顏坐泪零。寄君幸努力。無使妾傷心。

家世爲漢將。生長遼城東。秋高塞草枯。從軍出雲中。具裝懸吳鉤。雙龍捷秦弓。烽烟四面動。旌幟紛相從。列營砂磧閒。白日昏蒿蓬。邊聲薄暮起。肅肅生嚴風。黃雲合涼野。千里無征鴻。倚劍登高原。慘淡秋天空。漠南苟未夷。意氣難爲功。轉戰蘭干山。連摧燕支戎。天子坐建章。馳詔嘉爾雄。功成入西京。甲第何崇隆。嗤嗤草元者。鉛槧守固窮。

植蘭華池邊。微芳隨風宣。託身君子室。令德隨人妍。高樓有佚女。獨宿方盛年。年頗十五餘。蛾眉澹新烟。含情理修帶。垂手春風前。不怨盛年移。但期靈條還。豈學倡家女。河閒夜數錢。

白紵辭和宏人大兄

曲瓊半上朱筵張。蛾眉促坐調銀簧。月華燭燭光滿堂。爲君起舞樂夜長。七盤迅赴嬾服揚。香塵欲動江南璫。安歌進酒君莫忘。無爲向隅空自傷。高堂歌舞殊未央。鳥嘯喔喔催扶桑。

臨高臺。披重幄。博山燼委芳氣馥。還攜美子揚清曲。玉柱高張調何促。袖長管急消華燭。春風澹澹吹微波。豔陽欲去可奈何。忘情且任金叵羅。不見高樓春盡傷青蛾。

長安有狄斜行

三輔盛遊俠。逐逐長安中。長安何翕翹。冠蓋相紛浴。道逢兩驕人。叩叩問何從。答言少年時。結交槐里翁。二十屬期門。侍獵長楊宮。池陽宣曲閒。日夕陪射熊。家本俠者徒。賣漿非鳴鐘。一旦拜恩澤。罄折來羣公。

大息大長秋。小息右扶風。朱軒交華屋。賓御殊璫蔥。善宦自有因。矩步非所容。佳麗及春妍。歲暮難爲工。

漢武宮詞

戲罷魚龍幸柏臺。期門十隊翠華開。甘泉宮裏傳銀燭。聞道君王夜獵迴。

開元宮詞

春來水殿鎖潺湲。阿監傳呼召玉環。十部龜茲齊度曲。夜深歌舞到花閒。

行路難和吳海序計甫草

翩翩炎洲翠。溫理何娟好。羅家工射利。雲罕張林杪。凌霜觸雪辭故枝。羽毛瑟瑟如蓬葆。海鶴噉噉鳴雲中。顧此憔悴心煩忡。念君雖微同鳳族。胡爲戢翼羈雕籠。爲君捎網得歸去。相將飛入三珠樹。

漢武好神仙。五利爲通侯。爲言仙人好樓居。罽塵雜沓難淹留。不如雲臥向山去。文狸赤豹同遨遊。又聞山鬼方窈窕。幽篔含睇來相求。吾聞君言何太矯。人生立身苦不早。平原據地歌金門。安能寂寂長烟草。盛年易戢時易沈。秋風不駐紅顏好。不見濟南終子雲。上書十八乘朱輪。

文仲昔戰死。乃歌平陵東。平陵多松柏。一生悲風憶昔全盛時。侯家一何雄。父爲漢相子侍中。香貂翠羽交君宮。門前雙旌相照耀。領麾東郡驅遊龍。一朝彎弓雪漢恥。相從獨有陳家子。新都欲來赤鳳死。嗟爾慷慨徒爾爲。連頭且入陳都市。汝南小兒何齷齪。不歌義公歌兩鶴。

子夜歌和顧茂倫

儂傍大堤頭。問歡在何許。那得木蘭橈。載儂到歡處。
棄妾高樓上。羞看春草肥。蛾眉何用掃。夫婿已翻飛。

五日觀競渡因憶楚荆一百韻

佳麗蘇臺畔。烽烟郢樹邊。懷人空悵望。撫景自凄然。草木辭春晚。魚龍隱浪偏。天涯還戰伐。江左競譟闐。
射粉羌笳後。尋芳塞馬前。楚山雲黯淡。吳練水潺湲。爲憶三閩賦。翻悲五日傳。千門待女浴。萬戶命絲纏。
榴暖紅珠火。花明紫玉烟。水嬉仍舊俗。競渡又今年。鳳舸沙棠艦。鳧車文杏舩。古謂舟爲車。如水馬之類。
波輕飛盡檝。風急蕩淪漣。雜沓奔潮壯。蒼茫亂影漩。錦帆紛沼沚。絲竿倒盈川。擊汰淫簫鼓。橫流駭鮪鱣。
櫂歌聲的的。桡吹思咽咽。白馬晴洲合。黃頭麗服鮮。靈胥小海唱。九淖盪崖譏。繡幟凌風直。牙標映日圓。
輕響吹雪掇。跳沫激珠連。翼翼蛟初駕。滄滄鷺乍旋。飄搖首尾捷。宛轉舳舻便。直欲橫朱汜。何心遶鏡懸。
兩菴開黼帳。一徑駐華軒。蠻帶隨絲遠。香臍向客鳴。縱橫青雀舫。歷亂碧羅幃。蕩子金羈簇。佳人玉袖聯。
徵歌看決鬪。倚扇醉嬋娟。盡矢觀濤樂。徒誇拾翠嬾。傷心誰獨苦。招屈自摧煎。倏忽簫鉦歇。如同霧雨遷。
曲終江寂寂。戲罷瀨濺濺。對此原增憾。于今益惘焉。山陽思舊笛。水畔斷腸絃。荒莽湘皋月。蕭條漢渚荃。
峯青空七二。雪白渺三千。彼美遊無處。蘋花益可憐。昔予知子上。意氣遠同堅。萬里曾貽佩。孤懷願執鞭。
澧蘭香澹澹。沉芷影芊芊。神往都無隔。書來各勉旃。但期長梯駕。未共李膺船。是歲逢圍棘。家翁實秉權。
阿房求杜牧。麀尾識張元。辛苦梧桐咏。沈吟芍藥篇。帝娥方鼓瑟。令史早書氈。策奏蘭成射。人看玉笋妍。

門生袁氏貴。賓客衛家賢。夢斗還相次。登龍獨秀先。師資誠契合。風雅故便翫。西錦朱華燦。滄碑紫字鐫。向衰嗤伏氏。年少逼僧虔。粉署荀香合。華堂謝舞翩。才名矜藻麗。出入豔神仙。黃鶴晨停馬。青翰夜點箋。覲藩雲母隔。覓妓雪兒眠。綺席輕于蕊。羅衫薄似蟬。筆裁鸚鵡賦。身侍雁池筵。論議皆希逸。交遊悉仲宣。曲高雄楚國。文似獻甘泉。計吏車方飭。和門檄又遄。霓稍新市滿。月羽下江樅。畦固窺襄郢。尤來出澗躔。軫圍蒼七里。雉射陣雙甄。殺氣橫譙角。妖星孛翼躔。六塵俱麗箭。九虎競鳴弦。絕障軍聲斷。嚴關戍火延。登陴非棘令。逐寇失楊璇。無復金湯恃。空餘鐵騎駢。赤亭強弩散。玉壁戰樓顛。突豕彌達道。封狐騁陌阡。城崩寒日慘。野哭晚風羶。骨壘涔陽側。燐迷明月巔。映名在夷陵。王孫淪戮辱。荆有惠藩。甲姓困拘繫。恚叟山難罄。冤禽海易填。中原當板蕩。吾道此屯邅。惻惻遊燕客。靡靡正促鵠。望雲因思切。聞難遂言還。曉色臺城角。涼颿夢澤天。子上計偕至金陵聞荊州陷以母夫人在途歸。秋深恆慘黷。道阻屢迴沿。淚豈無家別。愁緣憶母綿。趙苞悲血灑。溫嶠泣裾牽。入里人皆異。窮途恨詎蠲。修陵防藕植。木末懼蓉寒。高蹈懷龍首。遐征致鷓拳。弋鴻羅蝨蝨。鈎貝網淺淺。壯節羞全瓦。克徒誓碎瑄。美陽胸自穴。酒士志寧悛。烈烈鋤蘭戶。倉倉擗蕙楊。江寒烟霧澀。波闊蜃蛟獍。徐衍終沈海。彭咸竟赴淵。魂辭蓼莪苦。身向汨羅全。霜色宵侵漢。虹光晝蝕燕。華亭存唳鶴。蜀道響啼鶉。視死君能定。浮生世尙湔。舊交龍戰盡。新事鳳歌捐。阮籍徒埋炤。靈均漫索筭。楓林哀易合。護草怨難痊。寂寞泉臺夜。飄零故國鳶。繁華今滿目。誰念大招篇。

美人篇和聞夏二兄

妾家近住石城東。掩抑高樓花作籠。參紅自澆邕家宅。約素偷施紅守宮。宮粉亭亭競初日。慵來卻掩珠
窻立。屈戍屏開夜影空。葳蕤帳捲春風急。春風畫閣倚新粧。麝月輕安待約黃。垂綬鴛紋裁繡被。飛襪龍
子點羅裳。羅裳玉袖朱顏好。櫻雲亂擁梳風早。誰持翠羽惜盈盈。羞期油壁同小小。烏曠白門楊柳春。絨
怨相將去踏青。上頭不見東方騎。小立還聽西曲鶯。西曲長千遊俠路。三三五五窺紅步。掩映珠袍花際
明。迢遙金絡林陰度。就中年少最閑舒。賣眼揮鞭指妾居。三條未剪連枝錦。雙烟先上合歡襦。看君看妾
多輕薄。相於兩兩微波託。貽我羅纓白玉纏。贈君銅鏡黃金錯。妾心對此倍纏綿。願約他時並碧絃。鳳皇
曲奏羞中夜。鸚鵡環留俟七年。年華倏忽芳菲歇。鳩媒謠詠佳期絕。聘望蘋花杳未歸。相思豈惹長離別。
離別休歌楊叛兒。羅帷原未侍恩私。飛飛自泣東南雀。叩叩空乖西北期。庭前落盡五桃樹。思君渺渺行
何處。謾勞桃雪助春娥。空拭紅巾垂玉筍。玉筍雙垂暗自傷。秦篝楚雨掩空牀。同聲自矢鴛鴦約。羞學侯
家弄狄香。

金陵

漢家居重兩京開。度邑龍盤實壯哉。黃屋切雲雙闕迴。朱門不夜五侯來。蕩舟桃葉迎鴛袖。邀笛梅花近
鳳臺。莫道江東非戰地。徐常曾負折衝才。

夜次京口

高城樓堞倚天開。瓜步鐘聲隔岸迴。夜月迴臨江樹遠。春星遙動海潮來。南徐士馬推雄路。北府風流憶

賦才回首桓公高宴處。短簫橫笛倍堪哀。

揚州

江南佳麗地。風月更揚州。花隱王孫殿。春還太子樓。舞衣低步障。歌榭出籃篋。日晚隋堤柳。烟條鞦紫駝。

登漢陽晴川樓時逆獻已陷蕪黃

雕窻繡柱俯高樓。檻外鶯啼杜若洲。麗日曉開孤島樹。晴雲春入大江流。鄂君青翰焚香臥。神女芳皋解珮遊。牢落不堪頻縱目。臨江烽火正淹留。

岳州

城頭山色倚嵯峨。不盡羣峯積翠過。地擁樓臺三楚麗。湖開南北五溪多。黃陵夜靜湘君瑟。青草春生夢澤波。欲向芳洲寨宿莽。美人無處奈愁何。

湘陰

二月逢寒食。三年寄短亭。山空春雨白。江迴暮潮青。芳樹連巫峽。歸鴻落洞庭。嚴城有刁斗。蕭瑟未堪聽。

兄安人曰金陵至湘陰六首皆家弟紀遊舊作也時年甫十三而境地便已爾爾才非康樂而

家有惠連諷詠未周爲之三嘆

君馬黃贈張九齡

君馬黃。臣馬蒼。君馬蘭筋。臣馬腫方。絡我白蜃珂。著我鐵褊襜。金堤十里春草長。鳴鞭蹀躞交輝光。君馬

雖不言，中心自摧傷。自念龍媒姿，呈瑞來咸陽。玉山有嘉禾，刈之爲餼糧。天子見我三嘆息，傳呼協律爲歌章。雄姿矯矯雪毛赭，肉駿律律桃花香。問君剪拂爲誰子，安陽秣侯來相當。須臾人事如轉轂，駿雄棄置遺空谷。傷心忽遇狹斜兒，玉鞭金絡相馳逐。君不見武帝宮中苜蓿稀，茂陵蕭瑟秋風辭。安陽旣去秣侯死，銜冤伏櫪空傷悲。

東飛伯勞歌 同計甫草趙山子作

纖腰麗女長裾后，流鶯乳燕春相守。誰家遙豔瑣窻前，調絃拂柱情留連。流蘇翠帳鴛鴦茵，明眸微睇羞自陳。可憐十五新嬌面，粧成婀娜遮團扇。東風綺陌冶遊多，狂夫猶自成交河。

秋夜 同楊俊三作

命儔出江郭，坐嘯臨層厓。涼颼發商氣，碧樹何霏微。皎月鑒幽榭，微霜散華墀。澹澹長河流，噉噉孤鴻哀。楚人怨遲暮，客子嘆露晞。含情易爲戚，念往空滋悲。絲桐自有音，女蘿自有枝。桂水渺無極，憂思徒自知。

冠霞閣同顧茂倫趙若干晚眺

香閣鬱崔嵬，登臨野色開。黃雲高古戍，落照隱荒臺。笛思迎寒切，砧聲入暮哀。蕭條天際雁，幾日故園來。

秋感八首 甲申九月在湘中作

楓林搖落迴蒼蒼，歲暮天涯黯自傷。永夜星河翻夢澤，高秋風雨暗瀟湘。三年作客清砧斷，萬里懷人叢桂長。憑眺欲尋西遊佩，數聲漁唱起滄浪。

楚望還登王粲樓。參差吹徹木蘭舟。風清桂嶺猿初嘯。雨歇蒼梧瘴未收。帝子怨深瑤瑟夜。美人心折白蘋秋。卻憐故國多芳草。幾度登臨賦遠遊。

西山陵闕鎖幽宮。羣帝神靈想像中。銀海雁寒虛殿月。玉衣香散夜臺風。天高朔氣妖星動。地入邊笳御宿空。禋祀萬年開北極。只今秋祭更江東。

楚宮八月下機槍。宗子誰傳帶礪盟。雲夢旌旗還去國。章華臺榭更開營。珠囊夜泣三湘雨。玉馬秋迷六詔兵。楚中諸王。避地黔粵者。半爲夷獠所掠。聞道至尊思叔父。蠻烟渺渺動皇情。

齊豫諸軍盡北來。淮淝山色戰雲開。九江潮穩飛龍艦。萬騎風高戲馬臺。殊錫競推王導貴。折衝空憶謝元才。先皇恩澤知無數。誓衆應多縞素哀。

遙傳陶侃駐江干。三戶兵戈血未乾。甲帳紫貂多縱寇。牙門青犢半登壇。左侯隱下。半係降將。時有賜蟒玉者。嚴城落日征烽急。絕塞迎寒畫角殘。共道楚軍工戰鬪。卻教鄢郢路常難。

千里平沙接大荒。襄中風物自蒼蒼。漢江暮掩孤城白。戍鼓寒沈落照黃。逐寇健兒驕玉馬。觀軍中貴擁銀鑄。可憐高蘇重圍裏。卻使君王策廟堂。

長沙寒倚洞庭波。翠嶂丹楓雁幾過。虞帝祠荒聞野哭。番君臺迴散夷歌。關河向晚魚龍寂。亭障凌秋羽檄多。牢落楚天征戰後。中原極目奈愁何。

計甫草曰。此漢槎十三歲時作也。悲涼雄麗。便欲追步盛唐。用修青樓之句。元美寶刀之歌。安

得獨秀千古。

秋日感懷八首

麗譙落日旆悠悠。一望中原動九愁。羌笛關山千里暮。江雲鴻雁萬家秋。咸陽羈旅傷王子。漲海功名憶少游。桂水只今新浴馬。懷人何處命扁舟。

獨夜商歌倚劍看。陸沈空憶舊長安。王孫江乘金轡去。公主清河玉袖殘。白露園陵遊月冷。黃雲城闕射雕寒。最憐京洛蒙塵後。戰血年年只未乾。

關河歷歷想雄圖。飛將旌旗更有無。紫塞風烟征雁斷。朱鷺驛路瘴雲孤。憑城早已亡羊侃。鳴鏑何曾畏邾都。卻憶故宮遊幸處。月明永夜照金鋪。

舊國樓臺極望中。蔣山松柏野烟通。烏曠玉樹陳宮靜。雲散金屏晉殿空。代馬長嘶愁曉月。邊笳遙夜動秋風。江流萬里投鞭斷。誰向西州泣謝公。

西來烽色炤神京。十載干戈在北平。劉氏黑貂空喪落。秦川白騎竟縱橫。種瓜誰識通侯貴。奉璽還誇僕射名。極目長陵秋色遠。金甌玉雁不勝情。

易京西去古雲中。白骨黃沙感慨同。皇甫度遼兵甲盛。慕容歸晉羽書通。兵殘馬邑頭空斷。箭盡蘭山恨未窮。最是將軍臺畔月。夜來猶自照滂宮。

花外陳家結綺樓。翠支甲帳侍宸遊。珠簾夜靜千門月。金井寒生六苑秋。建業山川收王氣。華林歌吹度

邊愁。翩翩不少歸朝客。猶向江南說黑頭。
萬木蕭森帶遠烟。吳峰吳水氣蒼然。孤城搗素秋風裏。遠戍吹笳落照前。東郡未忘丞相澤。涼州猶共永嘉年。故人嶺海知無恙。長劍單衫倍可憐。

贈友

朱華媚朝日。空景相澄鮮。浮雲覆長薄。迴風澹圓淵。駕言采三露。遊思泛五烟。靡蕪揚曾芬。清澗流潺湲。元猿坐長嘯。獐子爭接肩。舍此嘆息去。孰辨菰與荃。豈無蕙蘭姿。孤芳竟誰宣。運會有代謝。人事多推遷。苟非遭逢早。恐賤同棄捐。勗哉玉臺藻。明時幸相全。毋使秋節至。零落悲紅顏。

夜讌吳閩

涼飈起高樹。飄颻吹我衣。繁星耀中天。光景炤四垂。華鏡樂遙夜。歌舞歡相隨。清商發皓齒。妍迹揚元眉。吳客歌采菱。曲度何靡靡。綺麗盡今夕。沈湎忘所歸。愛人獨愁思。散步臨堦墀。金波澹欲落。河漢清且微。願隨晨風翔。一舉凌朱羲。安能坐長嘆。時往不可追。

送康小范之廣陵

吹笛離堂意自勞。朱軒繡軸映蘭膏。論文客路憑樽酒。惜別天涯脫佩刀。舊苑池臺江雁下。秋城笳鼓海風高。傷心莫問當年事。司馬墳邊半野蒿。

寄侯記原

吳城膠水路透迤。歲暮汀洲雁影遲。秋到梧宮人已去。書來桂嶺事堪悲。江潭憔悴空長恨。故國蕭條有夢思。何日重頒元朔詔。羽林躍馬備孤兒。

寄侯研德

相逢吳市賦彈箏。此日猶傳舊姓名。傭保已能藏李燮。酒徒何處問荆卿。悲歌草土黃金盡。落魄江湖白髮生。無那南來消息斷。珠厓烟雨倍傷情。

哭友

當時痛哭向秦庭。豈意風塵老歲星。報國陳豐還寂寞。破家張儉獨飄零。十年亡命烏頭白。千里思君杜若青。滿目山川爭戰後。遙憐何地更傷靈。

秋夜篇和宏人聞夏兩兄

八月清商下素柯。曲房閒館夜涼多。玉階窈窕流明月。畫閣玲瓏度絳河。絳河耿耿秋風裏。千門萬戶秋如水。霧斂銀牀蟋蟀催。涼生綺沼芙蓉死。芙蓉小苑照三星。玉繩泛豔夜冥冥。博山不暖黃金屋。寶瑟森寒雲母屏。屏風幾曲流空影。深宮此夜羅裳冷。秦女牀中漫卷衣。甄妃塘上思遺枕。枕獨牀空百恨生。遙遙魚鱗警層城。鉞樓羅綺霜華滿。甲觀簾櫳露彩明。露彩盈盈閉深殿。沈沈宮漏催虬箭。共俟羊車殊未回。遙聞鳳管愁相見。別有離人粧鏡臺。哀絲促柱夜徘徊。羅帳輕低聞葉墜。珠簾斜掩待螢來。螢來葉墜年華換。金釵棄置空長嘆。啓篋羞看舊舞衣。開絨祗益新邊怨。怨別誰家淚未乾。可憐夫壻滯皋蘭。關山

莫寄鴛鴦被。粧閣長悲翡翠環。翠環去去無消息。門前碧草遲行迹。旅雁寒飛只斷腸。牽牛遙指空沾臆。斷腸沾臆迴生愁。北斗闌干對桂鈎。征人紫塞三千里。賤妾紅閨十二樓。樓上銅龍聲漸咽。交河一戍同胡越。香綏蘭衾夢未成。寒侵蕙幌愁難歇。蕙幌蘭衾妾自傷。黃姑欲沒月低梁。思君空有刀頭約。誰念深閨秋夜長。

三婦豔三首

大婦理蟬鬢。中婦斂蛾眉。小婦獨無事。臨砌折花枝。風吹合歡帶。山開見紅暉。大婦調絃罷。中婦採桑歸。小婦好容貌。對鏡試羅衣。相將向南陌。日夕遲青絲。大婦掩羅幃。中婦弄鴛杼。可憐最小婦。盈盈私自語。斗橫花影低。抱衾向郎處。

望遠曲并序

望遠曲者。本陳君皇士題也。皇士身隱牆東。情馳天末。有懷難語。暫寄託于長歌。獨處含愁。惟留連于短翰。貞女子之不字。愆期十年。怨少婦之生離。于今八載。蘭橈桂水。尋郎未逢。銀洞珠宮。思歡不見。嗟乎。任天長而地久。流恨無窮。縱海闊而江深。銜冤何極。各成七律。聊代五噫。庶幾聞者動心。言之無罪云爾。

碧窻十二掩春紗。楊柳門前是妾家。笛裏新聲憐宋偉。鏡中好面問秦嘉。空塔鎮日銅螿靜。芳徑無人碧樹斜。拭盡橫波紅玉斷。狂夫猶自滯天涯。

粧成日日思氤氳。沈水香爐好憶君。蛤帳夜來空似月。瑤姬夢去自爲雲。佳期漫惜金蟲在。遠別羞看玉燕分。惆悵江南無限路。楊花只向曲中聞。

憶君南渡桂陽川。芳草天涯路渺然。夜夜愁心依楚月。年年消息隔蠻烟。八蠶絲盡流黃素。雙燕哀纏寶瑟絃。迢遞他鄉飛破鏡。空垂玉筍到花前。

寂寂紅閨漏水長。黛眉如結坐啼粧。茱萸帳捲春無力。玳瑁窻虛夜有霜。腸斷似憐琴上曲。愁多還蹙額閒黃。相思剩有青陵樹。賤妾何曾樂宋王。

瓊瑤深鎖斷經過。塵鏡朝朝掩黛蛾。豈有鴉雛粧薄髮。空持龍子映纖羅。青驄郎馬騎何處。碧玉情人恨幾多。曼臉已甘憔悴盡。不堪重唱永新歌。

鳴蟬無復去時粧。不捲羅茵掩畫牀。幽夢好憐珠被薄。離愁還怯鳳簫長。山頭朱履思公主。城外青砧泣女郎。誰念鴛鴦七十二。分飛依舊上君堂。

晴絲漂泊不勝愁。手綰明珠上鳳樓。待月半舒銀屈戌。隔花遙聽鈿箜篌。靈芸壺內承紅淚。卓女絃中怨白頭。欲薦彫胡誰更共。石城艇子自淹留。

誰家遙豔隔牆東。幾曲屏山笑語通。翠羽小釵能卻月。石華廣袖半從風。羊車人去春臺閉。鳳腦香銷夜被空。縱使金燈都化盡。一生還入楚王宮。

合歡芳樹鎖春烟。吹罷瑤笙意欲仙。婀娜魚車逢嶺上。躊躇翠蓋隔鱸邊。定情早贈琉璃匕。密意微傳白

玉鈿最是謝娘多薄命。卻教長恨五留連。
朝日簾櫳粉態新。羅衣如霧不勝春。殷勤連瑣知傳語。的歷珊瑚自溼唇。輦上誰看團扇妾。山前空問織
縑人。斛珠縱買芙蓉色。未必輕身屬季倫。
三星不動絳河沈。銀閣迢迢燭影深。明月窻開遺玉導。繁霜曲罷脫金簪。臺荒粉蝶三生別。隔浦單鳧五
夜心。卻憶繁家偏邂逅。素絲猶得結雙絨。
門前怕對玉驄驕。夫婿天涯歸路遙。堦草長時人萬里。庭禽啼後緒千條。綃紅夜溼鮫人淚。帶緩春消楚
女腰。何日團圞迎入室。鏡臺重整畫眉嬌。

贈祁奕喜

蘭漿春濤發桴謳。與來重泛五湖舟。胥臺麋鹿非吾土。江左衣冠異舊游。已見酒家藏李燮。誰從幕下問
王修。十年東府中丞節。雙戟淒涼淚未收。

江樓晚晴懷丁繡夫

西閣憑闌久。雲山望裏賒。斷霞江山樹。殘照野人家。草色迷春雨。鶯聲隔暮花。思君空極目。愁絕似天涯。
登穹窿山

茅君山館鎖崔嵬。曲磴盤雲積翠開。曉樹遠從吳苑合。春濤不盡越溪來。石壇清磬千崖靜。碧殿疎鐘萬
壑哀。見說仙人丹鼎在。只今何處是蓬萊。

贈宇三朱子

楚江三月柳枝斜。連壁風流自可誇。綠酒每彈湘女瑟。蘭橈曾泛渚宮花。十年避地音書隔。萬里思君道路賒。今日尊前重論舊。愁看郢樹在天涯。

懷侯研德

日暮相思谷水陰。故人消息任浮沈。督郵無事惟吹笛。園令多情自鼓琴。蘭藥池塘春雨遍。棠梨籠幙晚雲深。最憐高閣登臨處。夢渚湘山夜夜心。

寄遠

烽火頻年意若何。懷人遙隔洞庭波。碧雞奉使功名薄。銅鼓迴軍涕淚多。灘水瘴高迷楚望。湘山日落聽夷歌。最憐弟子南巡路。黃竹淒涼少雁過。

題穹隆道院

山靄微茫掩薜蘿。坐來岩閣望嵯峨。清霜碧澗松聲靜。急雨丹崖鶴唳多。銅闕千年空草木。瑤壇五夜動星河。方平去後仙遊少。欲問鸞車奈遠何。

席上贈張子

日夕山堂草木深。相逢偏作越人吟。尊前空盡新知樂。笛裏難傳故國心。玉壘宦遊思劍外。銅魚鄉信隔江灣。干戈十載成漂泊。矯首南雲淚滿襟。

上巳同丁繡夫禊飲

桃花曲水遶芳洲。筍屐尋春春事幽。遲日樓臺楊柳岸。微風簫管木蘭舟。天晴茂苑鶯聲合。雨歇橫塘草色浮。一自羽觴修禊後。風流誰憶洛濱遊。

七夕贈車瑞香

銀浦斜迴玉露團。短筵瓜果曲闌干。白榆夜色珠簾淨。碧樹秋光翠袖寒。取石幾年悲帝子。穿鍼此夕憶長安。漢家往事誰堪記。腸斷宮中賈佩蘭。

秋日贈九臨和旣庭作

憐君失意臥滄洲。品藻曾推第一流。張儉姓名傳北部。羊曇涕淚在西州。芙蓉玉露荒江靜。禾黍金風舊國秋。卻憶當時詞賦客。酒壚零落竹林遊。

送人歸楚

秋水樓船榜客歌。送君遙渡楚江波。仙人遺閣看笙鶴。神女荒臺怨綺羅。故國十年歸雁少。清湘千里暮猿多。洞庭南望蠻烟黑。武帳西風正擁戈。

寄懷姚子上

南沙烽色照江來。吳楚山川望裏開。白馬波濤當日恨。黃貂臘祭幾人哀。猿聲夜接巴中樹。雲氣秋高峽外臺。聞道渡湘曾作賦。漂零誰念賈生才。

遺事

夜雨挑燈到草堂。偶談遺事一沾裳。南溟日月蓬萊外。東海樓船牛女傍。甲帳惟聞椎晉鄙。滄洲何處哭田王。鼎湖龍去無消息。目斷神仙水一方。

送甫草入都

載酒江亭問客程。東風惜別故人情。天邊楊柳吹龍笛。日下雲山繞鳳城。花發御溝春駐馬。月殘宮樹曉聞鶯。侍中知有楊莊在。誰薦雄文似長卿。

贈舊李侍御伍戶曹李蜀人伍楚人也

草堂深住五湖閒。羈宦天涯尙未還。冠蓋幾人依逆旅。烽烟何處望鄉關。蠻雲不斷蒼梧郡。蜀道難通玉壘山。苦憶漢家全盛日。朱衣銀燭殿中班。

題茂倫隱居

顧歡高臥處。經歲掩柴關。雨色低春樹。雲陰散曉山。池荒侵草碧。簾捲映花閒。薄暮歌聲起。應知採藥還。

絕句

可憐鳳腦香。是君別時物。投著博山爐。青烟竟不滅。城北連城南。日夕望歡子。不及春蠶絲。纏綿爲君死。

送宇三歸楚

江南七月秋風飛。短亭尊酒送將歸。金蹕驛路吹橫笛。碧月江關照客衣。朱游別我故鄉去。五兩風輕向何處。鄉心空憶武昌魚。旅夢還隨漢陽樹。憶昔作客瀟湘濱。畫船寶馬驕如雲。黃陵廟前鷓鴣雨。赤甲山西莎草春。與君相見情傾倒。嵇呂交期何足道。藉卉頻傾銀酒鎗。看花曾駐金腰褭。誰料風塵鄂口城。華年行樂怨飄零。楚宮羅綺夷陵火。湘山草木下江兵。只今淪落江湖外。蘆中誰識投金瀨。對酒空悲舊事非。把袖還憐故人在。滿目山川恨若何。洛中遺事泣銅駝。陸機自草辯亡論。劉章漫作耕田歌。握手須臾又離析。秋水滔滔浪雲白。亂後相逢總斷腸。天涯惜別應沾臆。君云還乘下渚船。江花江草自堪憐。不知庾亮樓前月。猶有風光似昔年。

同既庭敬生天一諸子及家聞夏集繡夫齋中時既庭將有越行

銀盤絳蠟照金杯。深夜相逢綺席開。宋玉風情神女賦。丁儀文筆建安才。秋生海樹孤雲淨。木落江門早雁來。醉後不堪頻送遠。離心一夕越王臺。

九日舟行同既庭繡夫兼呈敬生及家宏人聞夏

夾岸蒹葭起白鷗。片帆斜照越江流。金風雁下空潭暮。錦樹霜凋野寺秋。九日樓臺堪極目。十年車馬憶同遊。龍山舊是登高地。綠酒黃花迥自愁。

既庭來江城忽爾臥疾詩以問之

西風吹葉到銀牀。行子秋來別恨長。自是言愁推衛虎。獨憐多病問嵇康。青楓客舍寒飛雁。玉笛高樓夜

有霜何事倦遊偏寂寞。音書一月滯江鄉。

偶成

眞珠簾箔杜陵花。倡粉盈盈襯曉霞。斂笑自低雙雀扇。避人還上六萌車。墨粧犀道傳宮禁。素手銀箏本內家。惆悵窈娘西去後。那堪重到玉鈎斜。

送人還荊州

不盡關山路。憐君襖被遊。冰霜增旅髮。砧杵亂鄉愁。雁下荆門晚。猿啼峽樹秋。十年羈宦地。回首仲宣樓。

客夜有懷

一燈愁獨臥。永夜客衣單。星月臨江靜。樓臺拂曙寒。悲笳霜外斷。清淚夢中殘。忽憶西園會。笙歌滿玉闌。

送人之湖南

一樽南浦外。惆悵是離羣。客路砧聲苦。江程樹色分。雁飛衡岳雨。帆入洞庭雲。桂水東流急。秋風不可聞。

甫草都中歸賦贈

白袷歸來倦洛塵。陸機詞賦未沈淪。共知開閣延名士。不向乘車問故人。毳帳風沙三市月。玉河烟樹兩宮春。卻憐原廟西山裏。石馬荒涼麥秀新。

送人歸秦中

離堂絲竹對銜杯。結束征車曉色開。海內交遊千里夢。天涯兵甲一人回。雲分華岳高仙掌。日落秦山見

紫臺武帝樓船還寂寞。秋風汾水雁聲哀。

山齋晚眺懷朱子容

多少懷人意。蒼茫獨倚闌。翠屏秋雨歇。錦障夕霞殘。草色含風細。鐘聲渡澗寒。芳蘭堪贈遠。無那隔烟巒。

擬唐人送宮人入道

十年歌舞屬昭陽。曾侍更衣鳳輦傍。忽洗翠娥辭柘館。還簪玉葉覓蘭香。碧壇笙磬春風轉。丹殿星河夜漏長。絳縷舊恩猶在臂。願隨武帝白雲鄉。

古意

虬水沈沈漏未央。博山火煖坐焚香。明河半落紅閨夜。旅雁遙飛紫塞霜。斗帳輕寒悲玉枕。藥砧微月擣流黃。可憐萬里征人夢。誰寄音書到白狼。

春遊

東郊行樂地。極目散春情。烟樹珠樓遠。晴雲碧幃明。玉珂調細馬。柘彈落流鶯。日暮揮鞭去。笙歌滿鳳城。

柳絮

禁柳花將暮。長楊絮欲飛。空濛疑雪聚。淡蕩逐風歸。只自依朱綬。誰憐撲酒旗。隋堤餘態在。偏豔晚春時。

送宋旣庭之浙中

樽中桑落酒。水上沙棠舟。謝公自愛剡中去。相如還作臨邛遊。城隅攜手與君別。楊柳凋殘那堪折。樹色

秋迴海岸雲。潮聲夜落江亭月。江亭南望惜離羣。一片孤帆下夕曛。商飈木葉西興路。愁絕清砧夢裏聞。

湘水曲效齊梁體

佳期渺何許。日暮湘山岑。翠華千載沒。江流空至今。蘭芳楚皋綠。雲起洞庭陰。欲識相思苦。瑤瑟有哀音。

夜集贈余澹心

浮雲如蓋俯林邱。良夜花明雜樹幽。綠酒銀樽催客醉。珠簾璧月照人愁。西園詞賦思高會。北里笙歌感昔遊。辛苦過江談士在。傷心誰數晉風流。

贈袁文生黃平子

鳳城二月柳枝黃。日日經過對羽觴。雅量自來推叔度。風流今喜得袁昂。玉河烟樹三春麗。金市笙歌五夜長。同是臨邛詞賦客。何時簪筆到明光。

與舊史

衡門蕭寂掩蒿萊。念爾行藏未易才。更始舊臣馮衍在。朔方遷客蔡邕來。望中鄉國空三戶。亂後文章有七哀。搖落清秋邊色裏。援筇愁上北風臺。

虎邱題壁二十絕句有序

妾劉素素。豫章人也。少隨阿母育於外氏。長姊倩娘。雅工屬文。刺繡之暇。每教妾吟咏。自是閨閣之中。屢多酬和。丁亥之歲。姊年十八。嫁于某氏。妾時十六。髮始總額。阿母以妾許聘于同郡。

熊生，生一時貴公子也。是年豫章大亂，妾隨母氏避亂山中。旣而北兵肆掠，遂陷穹廬，痛母姊之各分，念家山之久破，肝腸寸斷，血淚雙垂，薄命如斯，真不減土梗浮萍。今歲某從役浙中，彼人以戎事滯迹白門，因停舟吳閶門外，以俟其來，兀坐篷窗，百愁總集，因覓紙筆作絕句二十首，以寫其哀怨之思。夜半詩成，竊與侍婢泛舟虎邱，弔貞娘之墓，因粘詩寺壁，欲與吳下才人共明妾意。嗟乎，峽裏猿聲，鏡中鸞影，千古哀情，在此詩矣。

天明吹角數聲殘，百將傳呼上玉鞍。卻憶當時閨閣裏，曉粧猶怯露桃寒。
一別慈幃已十年，倚門消息有誰傳。莫嫌兒去增悲涕，阿姊猶堪在眼前。
愁對吳閶江水春，願憑蝶夢去尋親。遙知今夜南昌月，獨照高堂白髮人。
一身飄泊到江湄，淚落連珠那可揮。薄命不如春燕子，年年猶傍舊巢飛。
欲說相思已斷腸，多情卻逐野鴛鴦。他生願入天台路，流水桃花候阮郎。
氍毹貂帽捲風沙，紅粉飄零自可嗟。已逐烏孫成遠嫁，鄉心幾度怨琵琶。
自入穹廬已數春，香閨行樂付埃塵。黨家太尉真兪父，強炙羊羔勸美人。
回首家山似斷蓬，蛾眉欲畫怨春風。自憐憔悴無人問，惟有慈親入夢中。
遠隨邊馬到榆關，紗罩雙眸任往還。夢斷故園雲樹裏，可憐誰是豫章山。
昨歲從軍下武昌，征帆夜半過潯陽。起來遙望漳門樹，不得隨風到故鄉。

滕王閣下動飛旌。鐵柱宮前畫角聲。惆悵從軍星散盡。卻教紅袖落邊城。
暗把香綿拭淚流。相逢已分此生休。隴頭流水聲嗚咽。未抵蕭娘一半愁。
夜夜思君夢裏迴。朱門舊事總成灰。妾身已逐楊花去。孤負溫家玉鏡臺。
深深芳草葬紅顏。滿地飛花染淚斑。莫道貞娘多薄命。猶勝青冢在陰山。
滿目東風散柳絲。虎邱山寺獨題詩。吳下才人知不少。也應腸斷蔡文姬。
憶昔雕窻瑣玉人。盤龍明鏡畫眉新。如今流落關山道。紅粉空嬌塞上春。
鎮日思家自倚欄。朱愁粉瘦更誰看。相憐惟有湘江竹。抱箏抽篁淚不乾。
長將幽恨訴空王。一盞禪燈淚數行。死去縱教偕鳳侶。人間那得返魂香。
江行曾見豫章人。欲寄家書淚滿巾。我欲南行君北去。相逢空說故鄉春。
對酒難禁紅淚垂。天涯何日是歸期。愁心卻是春江水。日日東流無盡時。

擬古後雜體詩卷六

詩五

謝吏部朏省直

鴛鸞壯九重。鸚鵡拒雙闕。金莖麗綺霄。珠綴延華月。扶宮鳳吹揚。周廬虬水徹。高柳承檻低。珍卉映堦發。伊子荷薄弱。謬登建禮闕。鳴玉慚俊民。抽簪謝往哲。歸歟嗟滯淫。懷哉嘆遙越。何時返初服。山海恣遊陟。得性身自餘。服理物斯辯。初地旣容與。朱邱聊遊衍。芳草被蘭塘。鮮飈流桂殿。素波汎文禽。綺疏來早燕。雲陰散松涼。露華承蕙轉。空墀綠篠深。幽石蒼苔徧。遐哉塵外鑣。天伐從茲遣。

江記室淹楚望

驅馬出楚宮。逍遙望嶙峋。軌路遶江皋。巖巒俯城闈。雁下長沙渚。山入蒼梧雲。餘霞帶遠岫。曾暉媚遙津。氣清漢坻合。烟盡荆流分。佳期怨遲暮。羈孤傷美人。綺羅空徒倚。簫鼓奏悲辛。韓娥渺難作。徒令憂思殷。

梁簡文帝網閨思

紫臺君遠戍。青波妾獨居。共知離夢杳。詎信合歡疎。絃中悲別鶴。簾外聽懸魚。瓊鈎臨戶永。金漢度窻虛。

約素腰逾細。窺紅眉未舒。思繁歸燕後。愁劇擣衣餘。願托交龍錦。千里寄長榆。

梁元帝釋述懷

鄂渚樓船擁。荆門幕府開。麾軍占霸氣。拓地想雄才。風清朱鷺發。塵飛紫燕來。芙蓉依劍合。蘭葉映旗迴。別騎通明月。前驅下大雷。浮蛟三翼動。射雉兩甄催。扇憶顧榮略。笳分越石哀。幾時平日域。一爲寫雲臺。

沈特進約三日

新陽開上巳。淑景發皇州。修楊陰馳道。芳樹夾高樓。槐里盛遊俠。蘭池來子侯。宛轉銀平脫。縱橫金絡頭。宜春雜花發。小苑鶯聲流。珠袍映日轉。綺幃逐風游。鬪雞歸下杜。走馬出長秋。懽娛盡永日。薄暮還相求。翠釵時默笑。蛾眉詎含羞。結風張女彈。防露楚妃謳。但營九春樂。安知百年憂。

范僕射雲貽友

暮春事耕作。荷鋤適南岡。日夕巾車歸。桑榆暖頽陽。稚子前致辭。有客登中堂。旌車耀里閭。徒御盈道傍。華纓何飄搖。金羈自生光。物情忽明義。榮悴爲低昂。自非同門友。疇能願窮鄉。鮮柯無槁葉。寒谷有嚴霜。臨風播遠情。懷思徒慨慷。

邱中郎遲宴別

華鐘啓未央。鑾輿戒平旦。微風舉翠華。澄霞照瓊弁。林長羽騎疎。地迴鳴笳徧。天采散繁陰。綿羽流餘轉。聖朝重明牧。介弟臨淮甸。虎竹分壯圖。樽酒延皇盼。微臣愧作頌。明義詎能展。

柳吳興揮擣衣

閒房汎虛景。夕戶引離歌。珠簾浮素月。羅幌見明河。思繁幽怨集。枕獨夜情多。誰憐懷日逐。聊復理雲和。雲和淒以清。悲君尙遠行。鳳城宵露結。龍沙秋草生。遙榭聞花漏。虛堂掩畫屏。寒衣何處寄。刀尺自傷情。蘼蕪增永慕。芙蓉空掩嫿。君猶塞北衣。妾擣城南素。碧樹下涼颺。金荇凋白露。連娟斂秀眉。窈窕迴纖步。步帳肅秋陰。長廊叩夜砧。短衣催急節。繁杵散哀音。涼生紅袖薄。霜潤翠環沈。不念關山遠。安知賤妾心。妾心空宛轉。臨篋倍殷勤。連烟裁鳳子。細綺織鴛紋。坐愁金井葉。永睇玉關雲。九秋徒有恨。千里一思君。

庾度支肩吾侍宴

期門宵警蹕。輦路曉迴鑾。屬車開月羽。容衛載風鳶。曙色新豐遠。春陰太液寒。文鴛留綺樹。華桐媚遠山。珠旗花際出。瓊鋏柳中看。緹帷麗平野。綵吹震長楸。宛轉魚龍戲。紛陳爵馬盤。分禊羣工醉。賜醕萬方懽。徒知薦綠水。空愧頌猗蘭。

何水曹遜示寮

重巖嵐翠渺。荒薄烟光聚。晨月媚空波。落星帶江樹。的的洲迴帆。蒼蒼山寫霧。風緊曉猿悲。霜空孤雁度。漂搖行旅情。棲遲遊子慮。懷人思故山。撫舊傷往路。幽期旣已乖。賞心庶能遇。眷此平生懷。悼茲年歲暮。方謝金閨彥。去采瑤岑露。

蕭東陽子雲望春

蘅皋生薄陰。槐路耀鮮旭。遡野協幽情。臨高送遠目。烟柳暗春隄。風花盈霧谷。遊客影羅纓。都人馳繡軸。綺榭日華新。金溝波影綠。拾蕙自容與。采蘭性幽獨。一臥茂陵園。空想藍田曲。

虞常侍義北伐

漢家事遠略。飛將出遼西。遼西亭障遠。驚沙千里飛。邊秋橫殺氣。戎馬咸精肥。交河隴雁少。涼州塞草衰。黃雲斷烽火。嚴飈動鼓鼙。鳴鏑響空積。高旗動落暉。絕漠樓煩騎。陷陳羽林兒。胡霜金柝冷。邊月蘆笳悲。軍前獻當戶。鼓下坐闕支。揚旌高闕塞。振旅躡林祠。功成班再爵。塞靜脫戎衣。勳名詎終極。人事無長期。羅綺方娛樂。金石已潛移。蕭條瀚海外。萬古起雄思。

吳朝請均春怨

朝日下房櫳。微風蕩簾幙。百草媚芳春。孤妾長漂泊。蘭徑蝶雙飛。玫瑰花空落。含情羅帶賒。絨怨瓊梳薄。遊絲不繫愁。折柳詎行樂。悽斷玉關書。長悲金枕約。空梁有燕歸。虛檐見蛛托。燎絕博山爐。塵染葳蕤鑰。羅衣欲寄誰。鸚鵡徒自酌。春雁有歸音。鑒此平生諾。

徐內史排酬友

疎龍起漢闕。踐華表秦城。山川開險介。樓觀壯神垆。麗譙侵漢遠。崇雉入雲平。乘塘時絕目。西北見咸京。桂宮通複道。柘館抗飛甍。光風金爵舉。斐雲露掌明。三條躍飛燕。九市揚華纓。少年負豪俠。結客飛英聲。五陵爭博進。三河習射生。思逐嫖姚戰。羞邀劇孟名。何當逢漢主。負羽出幽并。

劉祕書孝綽歸沐

逍遙出瑣闥。還願望曾宮。鬱鬱迎風觀。繁樹遠青蔥。滄池含宿霧。微道隱長虹。檠戟分平右。冠簪入鏡中。梅落文梁迴。蓮披藻井空。咨予羈薄宦。弦望已三終。塵纓愧方結。初衣嗟莫同。幸運司隸舉。寧思武騎通。美人盛文藻。作賦儼雕蟲。時厭承明內。言訪瀟陵東。據地憐方朔。好事慰揚雄。還期命芳醴。折芰奏絃桐。

劉庶子孝威咏月

城烏嘯未歇。顧兔已飄颺。只自臨遙夜。寧知隔兩鄉。風輕榆未落。露溼桂無香。寒入哀笳斷。光侵雁柱涼。征人鬱朔苦。思婦鳳城傷。斂恨低珠箔。含嚙掩玉觴。破鏡空相憶。刀環莫暫忘。倘遇交河使。知妾日霑粧。

庾開府信咏懷

公主思鄉館。將軍出塞臺。共此關山別。誰憐舊國哀。歸路胡雲斷。羈心羌笛催。南音終日操。北雁幾時迴。玉椀無消息。珠簾有劫灰。唯餘灞陵岸。王粲獨徘徊。

陳後主叔寶禊飲

春芳開禁苑。佳麗啓層城。柳弱銅溝暗。花舒綺殿明。廣場陳曼衍。遠樹出干旌。景移金埒馬。風度石城鶯。蘭雲隨舞聚。桃扇倚歌輕。列侍紛紈綺。雜坐盛簪纓。吹雲鳳管合。激水翠樽盈。懽洽追南館。樂闋指西清。

徐僕射陵春情

春歸嚴氣解。草長豔陽還。銀箭傳遲日。香篝減薄寒。蟬扇迎風淺。羅衣入晚單。織柳分黃約。倡桃學錦檀。

年芳窻際度。花勝鏡中看。殷勤懷蕙草。留取寄闌干。

沈侍中烟自傷

中郎來北海。班生返玉關。舊京方改步。行子已凋顏。花疑狼望雪。樹隔隴頭烟。猶鷺鳴鏑騎。空拊大刀環。澤葵棲廢井。衰楊望故山。甲帳空零落。金輿遂不還。悠悠建鄴水。徒自送潺湲。

陰常侍鏗送別

理舳臨南浦。停鑣送北征。可憐遊燕地。還作別離亭。草歇吳洲晚。潮歸揚子平。蕭條隨去雁。悵望抗行旌。新知空復樂。遊子正含情。明月金樽掩。春風蘭槳輕。思君憐楚調。寄遠托秦箏。悠悠千里別。應悲李少卿。

張散騎正見汎舟

仙郎初賜沐。上客事行遊。試出千金堰。還登雲母舟。蘭橈迴枉渚。錦紵向芳洲。雨歇花疑暮。風歸雁帶秋。碧澗文虹飲。丹岑夕景收。未曾繡被擁。先聽采菱謳。

江僕射總羈思

麗譙秋引霧。睥睨晚棲鳥。瘴烟生桂水。蠻雨暗蒼梧。簾疎山靄合。帆斷海雲孤。平野歸遊騎。長天落遠鳧。望鄉深別恨。作客泣窮途。莊舄徒思越。盛憲尙留吳。還悲洛陽殿。無復女珊瑚。

魏特進收喜雨

清陰生石礎。繁雲上夕峯。湘東爭起燕。膠西未刻桐。苔滋全汎碧。花潤半舒紅。風細虬簷靜。涼輕翠幙空。

滴沼文漪散。霑樹遠烟重。自解吳王戲。寧勞漢掾功。

盧武陽思道贈別

車令持金馬。王褒祀碧雞。何如乘漢驛。千里撫關西。赤車矜使遠。綠酒送將離。曉月函關路。春雲華岳祠。青門臨玉道。素滢合金隄。槐疎餘舊里。蘭衰蔭廢池。灞岸行迴首。林光起弔思。塞迴看旌度。山長聽馬嘶。聊持陸賈劍。還開隗氏泥。勞旋奏明主。應見賜青驪。

李內史德林消夏

冰臺聊暇豫。露觀暫經過。輕颺流綺樹。繁陰下素波。高窻清薤簟。幽檻動織羅。才人絡雨緘。苑女采蓮歌。晶屏交扇薄。玉袖倚簫和。畏此沈陽麗。晞髮下山阿。

隋煬帝廣塞宴

旌驅元菟塞。輦下白狼川。魚雲開毳帳。雁磧斷胡烟。骨都空候月。金人罷祭天。獻壽琉璃酒。承恩瑪瑙鞭。還嗤漢武帝。十載事祁連。

楊楚公素山齋

卜築謝罍塵。棲山樂所乘。礪石結春陰。磴道澄烟景。雲歸松徑清。日夕蘭泉靜。宵露流素暉。新桐發疎引。清猿鳴樹幽。風篁臨砌永。綠綺有哀音。美子無還軫。偃仰空山中。樽酒誰爲飲。

薛司隸道衡酬憶

念子三秦役。愁予千里分。吹簫還獨息。對酒已離羣。離羣日以遠。玉孫殊未返。碧草盡芳菲。綠波春晚晚。春晚歷芳洲。相望空悠悠。日麗蓮花影。天清竹箭流。流年不相待。忘憂無復采。長懷白首期。還睹素衣改。

秋笳後集卷七

詩六

撫順寺前晚眺

亂山殘照戍城東，立馬蕭蕭古寺空。
接塞烟嵐天半雨，背人鷓鴣晚來風。
遼金宮闕寒蕪裏，劉杜旌旗野
哭中。俯仰不堪今昔恨，欲將空法問支公。

經灰法故城

雪峯天畔見荒城，猶是南庭屬國名。
空磧風雲當日盡，戰場楊柳至今生。
祭天祠在悲高會，候月營空想
度兵。異域君臣興廢裏，登臨幾度客心驚。

奉贈函公五十韻師廣州人故太宗伯韓公之子也

蒼茫龍塞謫，蕭寂虎溪遊。
白拂真詮遠，青山道臘優。
風銛譚滾滾，霜暎髮影影。
問訊師當日，東南與儻流。
尚書蒼玉珮，公子白氍毹。
士譽烏皮几，家聲龍頷侯。
門方參許史，才欲駕應劉。
衆目爭看駿，孤懷早狎鷗。
寧知纓冕貴，祇覺鼓鐘愁。
茂齒遺家室，良時遯海陬。
崇禎中，師集諸生，入羅浮山爲僧。
買山心自迴，作佛
志偏遒。猿猱遙峯晚，松杉野寺幽。
座看多寶出，園許布金稠。
入定巖花變，棲禪澗雪留。
隨緣辭越嶠，傳法

過吳州。夜磬牛頭寺。春帆鵲尾洲。折蘆波汎汎。持鉢路悠悠。途值軍鋒滿。時當王氣收。邊塵蒙鳳翥。戰火入龍樓。慘黷逢遷鼎。開關濟法舟。緇衣空掩泣。青蓋竟貽羞。野瘞王琳骨。桁梟袁粲頭。問誰歌玉樹。遂爾缺金甌。怨矣殷頑事。傷哉曹社謀。已移劉氏臘。空愴薛談謳。石闕悲三日。金甌哭一坏。裁詩祠教鬼。續些弔靈修。淚盡平陵柏。哀纏原廟楸。自難忘舊德。何敢賦幽憂。徒下遺民泣。還來弋者求。志原甘鼎鑊。身遂落罟罟。割體非歌利。囊頭及比邱。篋輿何激烈。岩棘屢呼囚。豈是然身誓。應嗤繞指柔。恩仍赦樂布。罪竟放驢兜。空法原無住。窮荒任所投。狼河雲漠漠。馬窟雨瀟瀟。掃雪開禪徑。披沙問幘溝。一乘馴鐵騎。半偈化韋韞。白雀飛仍集。青蠅弔可休。半生遼海月。幾度朔邊秋。已道禪心靜。寧增客思不。大師勤囑累。賤子却夷猶。玉悔荆人獻。金疑直氏偷。掇蜂方見惑。飼虎遂蒙尤。異域山千疊。孤生海一漚。逝將歸法喜。愧未息紛糾。玉塞哀淹泊。珠林乞庇麻。津梁疲燕雀。身世感蜉蝣。願托傳衣侶。從公問白牛。

送人從軍

刁斗聚嚴城。高旗出五營。雪開金帳色。沙亂鐵衣聲。磧斷山迴合。軍孤戰死生。開邊天子意。何敢怨長征。

贈秦州李生從征老羌有功不叙

挽強天水客。結髮屬幽并。獨負雙鞬勇。長隨五校營。功遺畫麟閣。力盡戰龍城。惆悵甘延壽。平戎賞不行。

陪諸公飲巴大將軍宅

佳興南樓月正新。森沈西第夜留賓。圍爐捲幔初飛雪。擊劍行杯不起塵。四座衣冠誰揖客。一時參佐盡

文人褐衣久已慙珠履。不敢狂歌吐錦茵。

送人之羌突里兼柬陳子

朔風邊騎逝駸駸。落日沙場送客心。負羽久從關外戍。吹笳空怨隴頭吟。銅龍塞迴雲陰斷。有網龍長數尺許。形模怪偉。偃臥江上。土人祀以爲神。石馬山寒雪片深。幕下只今誰健筆。飄零不復問陳琳。

讀張坦公先生所撰徵音集却贈

一編遺事淚潺湲。變徵聲中慘客顏。轉戰幽并軍縞素。側身梁楚路閒關。邱墟敢咎王夷甫。詞賦空哀庾子山。惆悵白頭荒徼客。龍胡當日杳難攀。

張坦公先生談甲申歲河北討賊之事感賦

風塵銅馬帝城昏。痛哭孤臣出薊門。俠客濮陽藏季布。義旗河朔奉劉琨。烏號異代徒餘恨。龍戰當時豈報恩。赤社旣移終不復。空憐心計盡中原。賊購公急。賴張蔡二俠士以免。

酬陳子長七夕見懷

毳幙寒生聽雁過。一尊遙夜恨如何。空憐令節催愁切。無那窮荒惜別多。笛裏風霜哀朔塞。橋邊機杼望明河。淒淒白露松花水。千里相思只浩歌。

浚稽曲

浚稽山色青崔嵬。翠蓋香輪夾道開。天畔銀河公主第。邊頭金帳單于臺。烏孫千馬親呈聘。鸞雛九女爭

來賸舊匹由來締賀蘭。和親詎是因婁敬。築館王庭奉義成。葳蕤綠綬耀丹纓。自有威儀尊鳳女。特分湯沐在龍城。蛩蛩鹿幕開行殿。紫駝白豹窮歡宴。金笳激調劣吹簫。珠帽流光罷遮扇。從官新給羽林郎。挾彈鳴鞭繡轂傍。旌飄蘭葉銀平脫。馬簇桃花錦繡襜。射生女騎何輕利。翠羽紅粧映天地。窄袖鴉青綬。北珠輕鞞鴨綠裝。西園羌管秦箏晝夜喧。貂袍三襲不知溫。自矜帝子金鄉貴。不羨名王玉塞尊。名王舊是呼韓裔。尙主中朝稱愛婿。好獵頻徵鳴鏑兒。酣歌偏惜琵琶伎。琵琶小伎珊瑚唇。歌舞朝朝粉黛新。祭馬每陪青海月。射鵰常從雪山雲。可敦嬌妒還猜忍。同昌無復犀蠲忿。帳下纔驚一騎來。杯中已見雙蛾殞。短轅不了恨驅牛。腸斷狂夫淚莫收。自甘斃面哀紅袖。不念同心歎白頭。荆棘滿懷相決絕。雙垂玉筍帶襟血。龍種寧同蔥薤捐。燕飛欲作東西別。妾意君情各自流。鴛鴦文綵掩衾裯。却分蕃部西樓去。別是秋風北渚愁。黃沙深磧連天色。可憐相望誰相憶。千里金河怨別離。經年銀漢無消息。八月穹廬白雪高。玉花寒枕夢魂勞。販珠何處求朱仲。綠幘寧聞侍館陶。海西沙門術何祕。白馬迎來布金地。畏吾字譯貝多經。龜茲樂奏蓮花偈。灼爍禪燈著曙明。仙梵風飄夜夜聲。黃鵠歌中思故國。青鴛塔畔懺他生。粧殿何心理殘黛。空王皈禮應憔悴。已分猜嫌任狡童。誰憐調護勞諸妹。弱妹盈盈隔瀚源。黃雲千騎擁朱軒。判翼每嗟戀鳳侶。回腸偏繫鵲鴿原。錦車銀磧何迢遞。姊妹相逢自銜涕。爲嘆姮娥奔月來。却教須女驂星至。相勸殷勤向玉真。莫將濁水怨清塵。苦辛應憶回心院。嬾婉須諧結髮人。故人歡愛從今始。五色羅襦織連理。重畫修蛾待粉侯。休吹別鳳悲簫史。願作流蘇結不開。屠蘇雙勸合歡杯。五部大人齊入賀。萬年公

主竟歸來。從此歡娛莫相棄。上如青天下如地。入貢還修子壻恩。降嬪莫負先朝意。伊昔先朝草昧年。旌旗北望阻柔然。欲將玉女傾城色。遠靖金戈絕塞天。絕塞西來平若水。三朝屢訂施襟禮。異錦葡萄出帝家。名駒首着通邊市。今上彌敦兄弟歡。迎歸旌節徧長安。龍首貴宮申綺宴。螭頭中禁並雕鞍。千秋天屬恩甯歇。賜予年年下雙闕。沁水園中詩吹塵。祁連山下甃氈月。甃氈寶幄暎重重。貴主繁華樂未窮。莫道芳菲邊塞少。春風弄玉在樓中。

上巳奉陪都統安公遊飲西山十韻

假日雕鞍出。乘春綺饌開。相要藉草去。不見乘蘭來。五法元戎旆。三重上巳杯。倚弓憑絕障。吹笛俯高臺。野入蒼茫迴。江連睥睨迴。關山消白雪。城闕鬱黃埃。愴怳餘寒在。踟躇落景催。殊方還令節。久客且娛哀。共識分符貴。徒慙入幕才。公如寬禮數。長願忝遊陪。

贈陳生昭令

軟裘修帶日翩翩。管記風流擅朔邊。趨府直登蘭綺內。賦詩時向射堂前。陳琳筆健元名士。丁掾才多自少年。譯罷石經還躍馬。秋鷗原上試鳴弦。昭令善國書。

弱年憐汝滯陰關。回首南雲涕泗閒。每向詩書聞漢語。作漢語者。惟晉儕數人耳。漫從圖畫識閩山。昭令。國人黃衫舊侶空。漂泊。卓帽高人自往還。猶有荔支鄉思在。時時歸向夢中攀。

同林生夜宿淨公房時林來自咸鏡

八月霜清塞草枯。上方十里接平蕪。客來海右譚元菟。僧本江東記赤烏。幽咽蘆花秋磧遠。蕭條蘭若雪峯孤。夜深月出聞清梵。不信天涯有戰圖。

送人還蒙古

松花江水寒如練。七月吹霜滿郊甸。行子三秋初憶歸。邊頭萬里今無戰。君家部曲海西涯。此去王庭路正賒。駝首山長通碎葉。龍鱗川盡出流沙。流沙天北征途絕。陰磧荒荒欲飛雪。馬色秋開氈帳雲。雁聲曉落金笳月。黃貉之裘青兕韜。具裝結束去翩翩。射生知爾誇身手。好佩驛弓事右賢。

冬夜伍謀公齋同錢德惟作十韻

人閒塵事屏。溪晚華門幽。笑共披裘侶。言尋秉燭遊。倚欄霜乍溼。捲幔月初流。燐火遙穿徑。川冰迴映樓。玉繩寒歷歷。銀箭夜悠悠。佳設逢羊曼。清詩得隱侯。未能依白社。空自夢滄洲。澹淡河如瀉。嶢嶢歲欲遒。嘯歌行寄傲。情話坐忘憂。寂寂烏皮几。橫琴共爾留。

同陳昭令過西山蘭若十韻

禪房新雨後。步屣暮山中。落日精藍好。遙烟積翠濛。枳籬崖半繞。蘿磴逕微通。汀樹收殘暑。山鐘落晚風。樓開鼻渚北。人到虎溪東。虛牖飛珠瀑。迴闌避石叢。藤陰籠捲入。嵐氣坐來空。作佛慚靈運。安禪問朗公。幽期那可負。佳趣偶然同。月出緣溪去。山山聞候蟲。

與友人夜飲却贈

玉靶雕弓鐵補襠。從軍曾拜漢中郎。未封燕領家先破。纔識龍顏國已亡。終古恨深銀海月。餘生夢老玉關霜。南朝舊事休回首。濁酒明燈泣數行。

送金譯使之朝鮮

眞番天外與華同。走馬看君使事雄。獲菟鑿關通極北。句驪負海出安東。魚鹽肯給邊人費。冠服偏存漢代風。莫道好文矜此地。尙煩重譯衛王宮。平壤有衛滿故宮。

贈陳蓉旬

白石蒼苔小徑春。飄飄野服淨無塵。知君名在遺民社。愛著陶家漉酒巾。無諸臺畔霸圖分。幕府曾傳轉餉勳。莫話永嘉南渡事。邊頭誰識舊參軍。石上丹經小篆文。求仙早事紫陽君。螢芝採罷心無事。獨倚青崖看白雲。

再贈孔公

竇人昔下牂牁東。雙鞬騎象君最雄。收兵屢出銅柱外。分麾欲建珠崖功。白骨吁嗟徧原野。百戰誰能留漢社。一夜軍聲散鐵橋。三年王氣收金馬。問道崎嶇西洱濱。橫刀猶護屬車塵。王孫無復餘三戶。從者誰憐只五人。海水浸天不能渡。辭君淚盡烏蠻路。天邊何處托王琳。市上空傳哭纛布。漢祖山來赦吠堯。投荒恩重頌興朝。夢繞朱鳶鄉國遠。路迷元菟塞雲遙。南冠憔悴何人識。賣畚時時向城陌。壯節甯看羝乳時。締期敢憶烏頭白。盡日蓬蒿坐掩門。縞衣猶記舊時恩。何當更化蘇耽鶴。萬里常依蜀帝魂。

長白山

長白雄東北。嗟峨俯塞州。迴臨滄海曙。獨峙大荒秋。白雪橫千嶂。青天瀉二流。登封如可作。應待翠華遊。

上京城臨馬耳河在寧古塔鎮城西南七十里三殿基址皆在殿前有大石壘國學碑猶存數十

字有天會年號禁城外有蓮花石塔微向東欽石佛高二丈許在塔之北

完顏昔日開基處。零落荒城對碧流。赭馬久迷征戰地。黃龍曾作帝王州。荒碑臺殿邊陰暮。殘碣河山海氣秋。寂寞霸圖誰更問。哀笳處處起人愁。金太祖破遼乘赭白馬先行徑渡混同江水止及馬腹既濟使人測之其深無底焉。

擬唐人謝真人仙駕過舊山

真人冲舉後。遺跡在青山。雲壑何年別。鸞輪此日還。鸞歌去天上。鶴語問人間。殘窳丹猶伏。虛壇草自斑。徒悲蓬海變。獨對翠峯閒。寄謝區中客。驂螭詎可攀。

送人之平遠朝鮮屬道

沃沮南繞溟江遙。雪棧霜林下使輶。屬國敢愁征調急。行人應喜戰烟消。麒麟石在山侵塞。魚鼈梁開海接遼。誰道扶桑天外地。兵威猶自話唐朝。朝鮮人相傳天降麒麟馬。以迎朱蒙王。王珥石而上。遂乘之以升天。今平壤府東門外有麒麟石。

王昭君

昭君巫峽女。奉帚玉階下。徒自恃傾城。翻令悲遠嫁。前殿辭君去不還。龍堆空望漢關山。愁雲朔雪摧珠袖。淚入邊雲損玉顏。玉顏明鏡看銷歇。夢到深宮轉淒咽。下陳曾未識君王。絕國何堪捐賤妾。夜夜毘穹青海隅。月明非復舊金鋪。不知甲帳承恩者。曾有蛾眉勝妾無。

夜宿

獨宿但清夜。淒其戍角長。營開千帳月。城壓萬山霜。我夢還魚鳥。□心合虎狼。莫將疇昔意。歲晚怨龍荒。沙林同友人登完顏故臺

廢磴盤紆嶺色迴。與君登眺暫顏開。單車絕塞雙蓬鬢。落日清秋萬古臺。蕃劍擊殘歌自苦。吳簫吹徧調。偏哀最憐酒半凭闌處。蕭瑟江山只雁來。

會寧道中有古墟墓賦此弔之

落日孤鞍古戍邊。殘碑下馬拂寒烟。獨來玉劍埋魂地。愁聽金笳薄暮天。搖落關山龍戰後。蕭條城郭鶴歸年。祁連起冢凋殘盡。荒外何人尙夜泉。

送巴參領之挈洛

吹角鳴笳徹野聞。碧油麾盡儼星分。詔書特徙真珠部。使節先馳浴鐵羣。路繞黑江三丈雪。天圍白道萬山雲。奚車習騎三千帳。檄到爭看屬護軍。

三月十二日河上口號

三月歸鴻滿塞天。流嘶日暮尙凄然。自從身逐烏龍戍。不識春風二十年。

奉贈封山使侍中對公

翩翩貝帶御香衣。幾載承恩在紫微。銜詔暫從雙鳳出。奉車還傍六龍飛。彤墀日月開仙仗。白岳雲霞護帝畿。應是臣心長戀闕。夢魂頻向禁垣歸。

贈滇令巴郡葉明德

回首岷峨限百蠻。羈離十載出兵閒。譙元頭髮傷心白。杜宇鄉園戰血殷。數口幸逃銅馬賊。一官空到碧雞山。益州耆舊今餘幾。簾肆淒涼老未還。

錦城山色接昆明。猿鳥聲中戰鼓鳴。自著白衣來閒道。却垂黃綬逐行營。崎嶇虎口心猶折。慟哭龍髯氣未平。今夕一樽重話舊。瘴雲蠻樹不勝情。

閱盡干戈復塞門。完顏臺畔戍烟昏。家沈浩劫疑兵解。君族姓十口皆死於賊。免者惟同產二人。及妻子而已。身歷窮荒識主恩。乞活漫傷遷客賤。寄書猶喜故人存。穹廬風雪天涯夢。腸斷巴猿挹淚痕。

滄波一曲繞溪新。移柳栽松托隱淪。王烈自成遼處士。嚴遵元是蜀遺民。鷓冠送客風簾晚。濁酒看山雪磴春。共道餘生疲戰伐。杖藜聊復憩邊城。

詠鷹徵應使者貢君座上作

玉爪凝殘雪。金眸暎落暉。可憐沙塞翻。欲傍翠華飛。

奉贈大將軍巴公

珠旗錦繖照吳鉤。玉腕花驄金絡頭。元塞舊傳朱鷺曲。彤庭新賜紫貂裘。磧開萬幕邊聲合。境拓雙城戰氣收。欲畫南宮誰第一。功高獨有冠軍侯。

奉贈副帥薩公時專鎮寧古

彤墀詔下拜輕車。千里雄藩獨建牙。共道伏波能許國。應知驃騎不爲家。星門晝靜無烽火。雪海風清有戍笳。獨臂秋鷹飛鞚出。指攜萬馬獵平沙。

繭虎追和梅村夫子

薰風粧閣問鉞神。五日符懸辟厭新。不見赤刀傳粵咒。還從綵勝識雄寅。黃衣綴就金仍燧。白額描來繡未真。莫訝使君能化虎。繭絲元是負嶠身。

養鶴

玲瓏玉骨倚風疎。莫向綸竿怨豫且。散雪豈能伴皎鶴。凌雲何意起枯魚。身餘刀俎腥猶在。寵待軒墀翅自舒。誰道波臣非羽駕。琴高赤鯉亦騰虛。

蟬猴

自許孤高飲露盤。求林誰作野賓看。只憐風外吟枝穩。那識雲邊嘯侶寒。無口詎露巴客淚。有綏宜著楚人冠。君身可是孫供奉。一賜金貂認欲難。

贈陳昭令

葉葉紫貂衣。秋風錦鞞飛。長圍不肯入。獨臂海青歸。
欲逐狐蹤去。回鞭萬仞岡。笑攜雙白羽。射殺兩青狼。

觀獵贈陳昭令

颯颯旌竿雪未休。弓聲霹靂徧林邱。馬嘶秋草搖珠勒。鵬掠寒雲下錦鞬。挾彈自矜文士健。揮鞭不逐漢兒遊。少年樂事南山獵。誰羨家聲曲逆侯。

獵後再贈昭令

金笳馬上北風哀。獵罷爭傳鸚鵡杯。愛射黃羊重插羽。欲呼蒼隼却登臺。邊雲壓地霜旌捲。營火連山雪帳開。明日沙林還逐兔。酒酣更起刷龍媒。

都統郎公奉使塞外賦此奉贈

清秋驛路淨氛埃。落日鳴笳使者來。早拜千牛陪鳳輦。新驅駟馬出龍堆。旌飛楊柳城陰晚。帳擁芙蓉劍色開。多少冰天遷客淚。待君歸奏建章臺。
柘弓斜月綠弦鳴。珠服如星照玉纓。穿禁久分中貴寵。趨朝爭識小侯名。每調生馬期門出。獨輕輕鵬傍輦行。知爾羽林誇健手。肯教馳射數邊城。

送人之鴉青江

蘆管淒涼鴻雁天。北風空磧暮蒼然。鴉青江畔重移帳。回首沙場又十年。

送陳昭令之兀喇十韻

野館驪歌咽。晴郊騎置行。悽心看往路。屈指問嚴程。曉帳甞牆重。春衣錦帶輕。雲峯馬上出。雪澗鳥邊明。林間貂餘跡。江空雁度聲。年光寒食近。邊色旅愁盈。楊葉遙分塞。松花曲抱城。甯同隴頭別。早擅幕中名。露布推書記。風流想步兵。不知驚坐客。何似棄繻生。

春暮江上凍解同諸君放舟至白崖口賦示十韻

晶晶流漸盡。悠悠放艇孤。驚心惟節序。遊目且江湖。鳧雁光初汎。魚龍氣欲蘇。青春生水際。丹景豁天隅。瀨淺聽偏響。波平望或無。不知風帆駛。帆一作去聲。杜詩。浦帆晨初發。祇訝雪峯趨。旅眺還增嘆。江謳亦自娛。人應尋弋釣。家本在菰蘆。浩蕩滄洲思。艱危絕塞軀。莫令悲負羽。從此問乘桴。

奉寄安大將軍二十韻同錢德惟作公以寧古副帥攝鎮奉天

今日須頗牧。維公翊禹湯。九重頒虎節。萬里拜龍驤。自北雄天府。居東本帝鄉。官因留守重。才是折衝長。銅獸申軍法。金貂襲御香。權兼趙京兆。威著杜當陽。開幕珠旗月。行邊鐵騎霜。令嚴師自肅。政簡物皆康。坐運中黃策。行消太白芒。士心依大樹。海氣淨扶桑。舊內虛鳩鵲。新城扼鳳凰。鳳凰城在鴨綠江上。遼之南境也。直令三輔謐。那用五兵張。營有蔓菁種。車無薏苡裝。每嗤卿食雁。不入馬如羊。澆俗潛應改。仁風邈已翔。丹青應早畫。赤白遂空囊。籍甚功書竹。懷哉淚染裳。寇君甯復借。賈父耿難忘。途遠重關外。心悽

昔座傍。揖容長孺倨。哭怒嗣宗狂。一別頻元燕。千山恨白狼。尙思乘月嘯。久罷卷波觴。衣敝鶉鷩挽。書騰雁幾行。報恩腮未曝。述德臆偏傷。窮鳥哀元淑。無魚憶孟嘗。何時射柳騎。重過浣花堂。公望方調鼎。予生且賣漿。沛宮雲正紫。遼隧草初黃。努力登三事。從容靖四方。誰知擊壤代。有客慟龍荒。

寄顧梁汾舍人三十韻

昔歲家吳會。諸公間越盟。逢君髮未燥。入座目俱成。倒屣才名早。披襟意氣傾。高文何粲粲。雅論各觥觥。攜手慚連璧。同心喜報瓊。時邀山館醉。每愛水樓晴。夜月褰珠箔。春風敞繡楹。花迴青翰小。柳繫綠驄輕。麗曲能調管。新詩卽譜箏。漏隨銅史促。杯爲玉人擎。但任嵇生誕。那知許邵評。譽方推二妙。語不數三朋。往事星霜改。新愁關塞縈。予悲元朔橘。汝謝赤墀櫻。老去餘華鬢。書來自素誠。恒恒詢謫戍。款款話平生。跪讀烹魚字。悲吟別鶴聲。風流如在眼。雨泣颯緣纓。末契嗟何托。良儔歎莫并。栖遲成北叟。浩蕩寄東瀛。暮齒家何在。窮荒歲屢更。將同溫序夢。幸似宋人盲。軍府以予短視。特免田租。世事隨殊俗。生涯共老僧。鬢龍徒奮采。鷓鴣恐先鳴。漫說逢楊意。前歲侍中對公。以予長白山詩賦進呈。偏難召少卿。舊遊憐轉燭。今賤愴聞笙。舞鶴鄖邊水。和龍塞外城。三秋空漠漠。萬里獨怛怛。道遠懷瓊樹。宵長望玉衡。如蒙子公力。終到漢西京。

雜感

甌脫蕭條塞路微。阿疎城畔柳依依。邊開駝鹿山初鑿。江到牛魚嶺漸稀。戰士中宵看堠火。米船六月寄

征衣。冰霜今歲寒。應早。屈指諸軍解甲歸。每歲出師。戍黑斤諸部。至七月中。河冰將合。乃歸。
娥娥紅粉。暎邊霜。細馬豐貂滿路光。朱幕漫傳翁主號。黃眉爭識內家粧。空憐拂鏡凝花態。莫爲無禪笑。
粉郎千載奉春遺策在。玉顏那更怨龍荒。時以婦女賜海東諸首領。邊人謬以皇姑稱之。其俗男女皆不著禪。

秋風吹磧起鳴鵑。磧路西迴限二邊。鴉鵲廢關仍抱塞。鴛鴦殘灤不通潮。千年城闕人誰識。百戰河山世已遙。窮徼可憐無故老。難將遺碣認前朝。

讀古人詩有感

山川滿目恨滄桑。撫舊悲歌淚幾行。翟義豈能肩漢祚。貫高原不負張王。朱鳶別後非吾主。白馬歸時是國殤。寂寞天涯今夜月。大招何處問瀟湘。

混同江

混同江水白山來。千里奔流晝夜雷。襟帶北庭穿磧下。動搖東極蹴天迴。部餘石碛雄風在。地是金源霸業開。欲問魚頭高譙處。蕭條遺堞暮潮哀。

擬唐人御溝新柳

春光開上路。柳色吐韶年。掩暎金溝遠。參差玉道連。倚風條尙細。覆水影初圓。輕翠銷宮雪。微黃嬾禁烟。畫眉空自好。學舞欲呈妍。倘得承攀折。依依翠輦前。

贈李旬十韻

昔爾探三錄，尋身到赤城。已窺三景祕，欲掩八公名。家本陳安世，師逢寶子明。顏依金竈駐，身度玉壺輕。翠水餐雲正，鴻天印月行。問年枝不汗，卻老樹驚精。方術誰同傳，仙才自屬卿。好將山石煮，莫歎海塵生。去去憑餽，參寥度。塗。洪厓如可拍，直欲上瑤京。

郎公還京師此奉送

西風吹雁滿山，愁見蕭蕭匹牡還。橫笛清秋繁客恨，衰楊明日爲君攀。紫臺霜露催征騎，丹闕星河啓曙班。極目長安，奈遠離心空望五雲閒。

奉酬徐健庵贈之作次原韻

金燈簾幙款清關，把臂翻疑夢寐閒。一去塞垣空別淚，重來京洛是衰顏。脫驂深愧胥靡贖，裂帛誰憐屬國還。酒半却嗟行戍日，鴉青江畔度潺湲。

集成侍中容若齋賦得柳毅傳書圖次俞大文韻

落日金羈上客過，畫簾燈火九微多。當筵誰共抽毫素，一幅吳綃夢楚波。鮫館龍堂素練光，停杯與爾話錢塘。玉顏自昔多憔悴，莫向涇陽怨小郎。年年沙朔掩蒿萊，橘社包山夢屢回。吳中洞庭山亦有柳毅井，今日雨工圖上見，却憐儂亦牧羊來。洞庭雲氣曉憑憑，寫入銀屏照錦燈。惆悵紅粧千萬隊，酒闌何處問巴陵。

春夜聞絃索限琴字

星轉天街玉漏沈。何人中夜撥胡琴。不須更奏伊州曲。說著邊關已溼襟。

咏史

豈是騷人怨。難忘舊國恩。蕭條湘水上。誰弔楚臣魂。

月夜

月華深夜下金波。綺榭沈沈露彩多。極目天邊雙桂樹。清輝萬里共婆娑。

補遺

李侍御枉駕因留小飲

涼秋紫塞謫官多。三徑蕭條侍御過。海外聞君名已久。長安別後事如何。且將濁酒澆胸臆。莫爲悲笳廢嘯歌。放逐幸同堯舜世。儘拌身世老漁蓑。

壽郭明府

紅蕖玉澈映晨霞。百里江皋早放衙。風偃訟庭聞綠綺。日長仙閣有丹砂。共看香令衣如繡。欲問神人棗似瓜。今日試聽循吏頌。知君清譽滿京華。

送丁泰巖晉秩開府之任湖南二十韻

湘漢雄風地。岫壘大火峯。芝旗松子宅。茅社竹王封。十載司藩翰。三吳薦鞠凶。傷魚垂戢戢。哀雁失嚶嚶。羽檄飛難定。軍儲困屢供。戈船宵並濟。井日夜無春。望望爲霖切。穰穰覆露濃。千家收玉粒。半壁鄣金墉。絕塞催歸騎。公門獲拜龍。相依星改歲。多幸日長冬。屬郡謳歌載。明廷服命庸。列臺森梓柏。開幕展芙蓉。青草流千曲。蒼梧樹幾重。彼郊忻迓郭。舊域恨徵熊。玉瑄陽初轉。金塘凍始溶。去旌看縹緲。征鐸響春容。扶杖人爭送。攀轅路盡壅。愛碑留石篆。鑄像寫金鎔。江冷鱸應憶。峯迴雁可從。荆揚如一派。仰沫待朝宗。

明妃曲

妾本良家女。奉帝掖庭中。椒閣香消悲曉月。玉墀花積閉春風。春風寂寂君恩絕。薄命還教辭漢闕。乍可深宮罷玉顏。誰堪遠嫁啼紅頰。一向天涯去不還。風沙遙望白狼山。鏡中玉筍消春色。馬上檀槽怨朔寒。可憐元朔寒應早。蘆管淒涼沙浩浩。白雪疑飛桂苑花。黃雲不散蔥山草。草色連天甍帳開。蛾眉憔悴妾心哀。夜夜屠蘇青海上。那能重見翠華來。

咏籠鶯應教

黃鸝何睨睨。牽弋下遙岑。不惜雕籠住。承君綺閣深。身微空曉翻。嚙巧自春心。已免韓嫣彈。何須更擇林。

戲贈

承恩楚殿前。綠幘自翩翩。著粉春姿媚。參紅雪態妍。情深陪射兕。寵極織輕蟬。却笑纖腰女。新粧只自憐。

登樓有懷成容若

雨餘宮樹迴含烟，獨立高樓思渺然。
遙憶關山人去遠，不知何處駐香鞭。
和凱公送令兄侍中扈從之作

玉輿避暑出黃華，千里霓旌映塞沙。
爲問帷宮誰珥筆，馬卿詞賦爛如霞。
廣庭花月自幽閒，一曲驪歌悵度關。
應識鶴鴿原上意，長依龍武輦前山。
贈葉長民

錦水桃花暖，銅梁杏葉禱。
看君西去日，何似馬相如。

秋笳集雜著卷八

表

擬久旱禱雨天壇甘露協應賀表

伏以龍旂風細。九霄沛天子之恩。翠蓋雲迴。萬國仰聖人之澤。蒼后飛泉以界道。早徧春晴。青嶽懸水以行空。爰滋曉陌。慶已通于霄路。懽遂洽于坤輿。臣等云云。竊惟桑林致禱。殷宗自薦于犧牲。雲漢稱歌。周王用罄其圭璧。啓泰山之玉檢。漢號乾封。帶嵩岳之金霞。晉當秦始。隴西女子。產旱母而驚心。河北神人。降火光而駭目。慨赤衣之司令。致黑蜮之不來。泥人矯掌于中庭。實文人之誚語。土龍驥首于元寺。亦茂宰之矯誣。眺山上之金蛇。何時布影。望臺邊之玉女。幾日披衣。空駐問于綠叢。漫吞聲于赤炬。豈東海有銜冤之婦。乃旱三年。使南山有戴笠之夫。偏傷六月。茫茫青畝。難逢渭水之牧羊。滌滌黃輿。不見湘川之飛燕。未有塵慮彤廷。潤土膏于一日。誠迴蒼極。布觸石於三吳。如今日者也。云云。蒼龍啓瑞。碧鳳承符。功已邁于大風。祥自呈乎甘露。鴛鴦殿裏。玉階敷三秀之華。鳩鵲樓中。珠綴結五雲之氣。偶以天心之微戒。遂煩帝念之焦勞。九重綈几。悉陳鄭俠之圖。三殿瑤封。盡繪商風之什。爰命屬車而啓路。乃臨郊殿而祈天。隊簇桃花。步青塵而不動。旌開蘭葉。溯淑氣而悠揚。陋漢代之祈年。非關民事。笑唐家之昭應。豈謂田

功。翠華方賁于甘泉。蒼壁已通乎帝座。于是封姨嘯樹。豐隆啓塗。灑潤齊城。豈俟樂巴之酒。森寒石礎。已同張協之詩。涇陽雨工。對良疇而降澤。華山肥蠶。見和氣而全消。山川悉載其恩膏。禾黍並除其螟螣。臣等術謝檄風。人非作雨。幸際攀鱗之會。謬居拜手之儔。慕刺史之丰裁。隨車致雨。思學士之文采。志喜名亭。况屬天地之交孚。益快神人之篤慶。有心浴日。敢效歌風。伏願勅咨國計。軫念民依。未央夜月。聽虬箭而儆心。上苑春風。視雉媒而動色。奠元圭于水土之後。揮朱絃于宵旰之中。則麥秀三岐。誦聖主無疆之福。禾呈九穗。拜君王有道之祥矣。

序

方與三其旋堂詩集序

僕聞長雲接塞。將軍傳龍雀之悲。細雨滴簾。客子下鷓鴣之淚。山含秋氣。寫幽恨于銀虬。水咽春聲。托邊情于金雁。番禺南望。柳花之絮無多。張掖西來。葵子之根已少。由來才士。半泣飄蓬。自古羈人。偏多篇翰。論輸左校。曾聞楚石之談。緝管營州。亦有隨珠之嘆。撫長松而掩袂。攬橫竹而登車。一曲龍吟。因思公子。數聲魚沫。爲憶家山。中上漂搖。尙含毫而絨怨。客堂離別。猶援牘以抒哀。况乎絕塞長征。殊方遠戍。竄景真于關外。逐亭伯于遼東。南雁無憑。北梁已遠。白狼堆外。畏懸度之難行。黃鵠歌中。怨關河之甚渺。已作窈停之種。能無侘傺之辭。是以毛光祿之在赫連。自述降羌之痛。李都尉之居朔野。亦流望漢之歌。豈獨

越石悲吟。淚盡扶風之馬。子初雜曲。心摧鄆水之魚。已哉。方子與三。才爲藝苑之宗。名在傳流之右。庾子山之文采。父子無慚。劉孝綽之才情。弟兄兼擅。方翔勁羽。忽中長罟。坐京兆之全家。嶺頭齊竄。爲李豐之同產。隴外俱投。慷慨辭家。淒其出塞。地經絕脈。向天畔而何之。水號斷腸。上隴頭而嗚咽。紆于落月。故園之夢空歸。勅勒浮雲。異域之程何極。拂廬夜靜。能不椎心。服匿晨持。每看沾臆。邊霜似雪。蕭條鐵磧之聲。塞草如烟。淒咽金笳之韻。曲中風土。自操南音。笛裏關山。空吹北部。於是開繪寫怨。流翰陳絃。客路山川。塞天風雪。或車中之贈別。或馬上之行吟。以至真番土風。鮮卑國語。無不調成金石。麗錯瓊瑤。名曰其旋。都爲一集。寄羈臣之幽憤。寫逐客之飄蹤。怨入琵琶。隕烏孫之涕淚。哀傳刁斗。感雁臣之苦辛。允爲傳世之篇。聊當述征之作。僕三年久戍。萬里無家。掩泣江頭。已同女子。銜啼帳外。幾類官奴。幸並謫之逢君。遂同衣之容汝。相攜塞表。似長羅之共蘇卿。羈旅關中。等子淵之憐沈炯。凡茲華製。半屬分題。爰贅語于簡端。志悲懷于塵末。庶使咸陽城畔。人傳山水之謠。廣武亭邊。客記落花之賦云爾。

孫赤崖詩序

蓋聞纏綿湘吹。以去故而增悽。慷慨燕歌。由送離而結歎。是以舊山旣遠。促管流音。異國無歸。繁絃繁臆。房陵一去。君王有山木之謳。軍府長羈。伶官有土風之操。執珪懷越。尙藉悲吟。公子留秦。亦傳哀唱。由來志士。避此窮途。未有不憑柔翰。以消憂。托長歌而申恨者也。况夫金河轉徙。銀磧羈孤。水千里而斷腸。塞萬重而絕脈。陳子公戍邊不返。空望長安。移中監還漢何年。傷心遙海。慨其嘆矣。能不漣而。孫子赤崖。弱

年擢秀。盛齒知名。才爲談士之宗。人擅藝林之俊。江東二陸。共識清河。鄴下雙丁。先推敬禮。乃以拾塵之惑。違從棲火之嗟。靈璫難陳。遐陬遂謫。飄零阜帽。遼海空來。襦襟素衣。吳關長謝。士思迢遞。托黃鶴以俱飛。客夢徘徊。指白狼而難越。然而蘭山箭盡。篇什偏工。桃館尊空。風流未沫。劉越石栖遑于河朔。詩體清剛。庾子山留滯于關中。賦才宏麗。雖丁年坐老。而子夜堪歌。于是娛志縹緲。寄情嘯咏。登高搗藻。攬物揚葩。紫雲亭堠。興乘障之悲思。白雪關山。激從軍之壯志。寒鴉睇野。夕雁橫天。怨起衣單。魂銷筋脆。氣沈雄而莫展。心侘傺以誰知。及夫臺上瞻鄉。山頭送遠。鶴鶻不見。鸞酌徒傾。曉花月於曩遊。偷風霜于今別。莫不播之淒響。緯以妍辭。發言而瓊樹相華。命調而銀箏並咽。捲蘆清吹。譜爲蔡女之文。截竹哀音。綴成邱仲之曲。豈徒伯鸞南邁。惟聞五噫。中郎北遷。願成十志也哉。僕舊托攀嵇。近同遷賈。黃壚遊譙。久限山河。紫塞軍僑。更分鄉縣。攬淚痕于河上。空訴篋篋。鬱愁氣於車前。甯消梧酒。北部之貧已甚。南館之會徒乖。永念生平。彌嗟弦括。却題短引。爰寄沈悲。嗚呼。蘭忌當門。痛煩寃之何已。蓬悲出塞。憐飄寄之安窮。西氣驚商。將聽君詩而隕涕。北風干呂。誰披余製而傷神乎。

慎交二集

蓋聞盧郎八米。雅重南朝。魏氏雙珠。見推北海。江頭折柳。遺斑管於名流。石上看松。飛羽觴于公子。若夫攜履蒼龍之閣。早識安豐。迴車朱雀之航。爭觀孝綽。並以盛年馳譽。弱歲知名。白拾文人。烏衣貴選。張廣武瑠車之日。步兵嘆其奇才。王山陰總髮之年。僕射驚其明慧。是知英華靡絕。端藉羣賢。領袖將來。還歸

吾黨爰集邑中之秀。以追河裏之遊。客盡懷珠。座同割炙。少長咸集。方典午之蘭亭。詞賦無雙。擬睢陽之鶴渚。布蕙肴而肅駕。願荷衣以過從。

書

戊午二月十一日寄顧舍人書

別我華峯二十餘年矣。江皋塞表。超忽萬里。每一懷思。淒泣彌日。昨歲三月。得華峰丙辰臘杪所惠札。并見懷二闕。頃初二日復從驛。使得四月望日札。及彈指集。綱繆之思。溢于毫素。出入懷袖。如見故人。午未之交。知兄宦遊京邑。遙爲雀躍。弟時苦徭役。未遑緘寄。至于解組南轅。則天涯遊子。邈若夢中。嗟乎。我兩人契托。正復何等。越禽代馬。各在一方。僅從一紙音書。敘廿年離索。人生到此。能不淒涼。弟朔漠羈蹤。兄定未曉。今略書梗概。俾兄知之。弟以己亥夏。出榆關。抵瀋水之陽。海昌相公欲留弟共居一年。瀋帥不許。瀋行時。其令子子長。贈我車馬衣裘。六月廿一。渡松花江。時暑甚。因浴于江。遂得寒疾。著氍衣。騎馬。行大雨中。委頓欲絕。抵大烏稽。送吏以弟垂篤。特憩三日。同行者皆謂不起。忽夢準提而愈。七月十一至戍所。戍主以禮見待。授一椽于紅旗中。舊遷客三四公。皆意氣激昂。六博圍棋。放歌縱酒。頗有友朋之樂。然一軍飄寄。囊空半文。賴許總戎康侯。孫給諫汝賢。解衣推食。得免饑寒。癸卯春。弟婦來。攜二三婢僕。併小有資斧。因以稍給。甲辰春。幕府以老羌之警。治師東伐。令流人強壯者供役軍中。文弱者歲以六金代役。於

是石濠村吏。時聞怒呼。無昔日之優游矣。乙巳。以授徒自給。其夏。張坦公先生。集秣陵姚琢之。茗中錢處仲。方叔。丹季。兄弟。吾邑錢德維。及鄙人。爲七子之會。分題角韻。月凡三集。窮愁中亦饒有佳况。其後以戊役分攜。此會遂罷。戊申。蒙恩紳袍。特許優復。弟遂得爲塞外散人。寧古自辰己後。商販大集。南方珍貨。十備六七。街肆充溢。車騎照耀。絕非昔年陋劣光景。流人之善賈者。皆販鬻參貂。累金千百。或有至數千者。惟吾儕數子。以不善會計。日益潦倒。然弟亦不能捐棄筆墨。與酒削賣漿。逐錐刀之利。短褐藜藿。任之而已。庚戌。諸徒皆散。而歲復早霜。米石十金。副帥安公。雅重文士。憐弟之貧。以米相餉。而合肥先生。及葑溪玉峯。復有見貽。於是鬻桑餓人。幸免溝壑。癸丑。大帥之子。相從授經。館餐豐渥。旅愁爲解。丙辰春。大帥移鎮兀喇。遂失此館。然執經者亦不乏人。所以僅供薪水耳。弟年來搖落特甚。雙鬢漸星。婦復多病。一男兩女。藜藿不充。回念老母。笑然在堂。迢遞關河。歸省無日。雖欲自慰。祇益悲辛。課徒之下。閒有吟咏。正如哀雁寒螿。自鳴愁恨。安敢與六代三唐。競其優劣哉。前歲原一札。來索鄙製。云欲刊布。弟深感其意。特寫致之。可三百餘篇。塞外之亂。蒼黃中失。五古七絕二種。悵惜殊甚。今當再抄一冊。于四五月閒。寄覽彈指集。如靈和楊柳。韶倩堪憐。又如衛洗馬言愁。令人憔悴。兄筆墨如此。少遊美成。更當何處生活。別兄二十年。對此如重觀風流。弟出塞時。未攜詞譜。今得此集。便當按調爲之。正恐壽陵之步。未易相學耳。弟悲怨之深。雖三峽猿聲。隴頭流水。不足比我嗚咽。穹廬愁坐。極目蕭條。夏簟冬缸。淚痕潛拭。安得知我憐我如華峰者。與之促席連牀。一傾憤臆乎。弟患難之交。陳子長最篤。但隔在遼海。不得相見。此君風流文采。不減

華峯意氣亦復相類。惜其無命。流落而死。爲之痛心。龍眠父子。與弟同謫三年。情好殷摯。談詩論史。每至夜分。自彼南還。塞垣爲之寂寞。錢德維議論雄肆。詩格蒼老。山陰楊友聲。鐵面虬髯。而詩甚清麗。若中三錢。才筆特妙。不意大者有山陽之痛。而小者復爲濮陽之匿。姚琢之詩。如春林翡翠。時炫采色。陽羨陳衛玉。善諧笑。工圍棋。亦嫵秀可喜。弟時與之奕。今弟之棋。視丙申五月。在澄江與華峯賭局時。可高六七子許。張坦公先生。河朔英靈。而有江左風味。雁羣與弟。情致特深。唱酬亦富。未歿前數日。卽屬弟在其榻前。作行狀。人琴之悲。至今猶哽。敝門人閩中陳昭令。名光啓。秀而嗜學。北州少年。此爲之冠。與弟居止接近。擁爐啜茗。靡夕不共也。此皆弟塞外文章之友。因兄垂訊。聊復及之。前者婚約。爲李姨所阻。深用悵歎。承復有幼女之約。極荷雅意。果得生還。則我女。兄之子婦也。又何他云。嗟乎。此札南飛。此身北滯。夜闌秉燭。恐遂無期。惟願尺素時通。以當把臂。唱酬萬里。敢墜斯言。震修兄弟。近况何如。念之殊切。凡我舊好。幸俱致相思。南望雲山。可勝淒咽。塞鴻殊便。無忘得音。

與計甫草書

三年執別。萬里傷離。故國音塵。殊方羈竄。飄蹤如線。惋悵何言。塞外苦寒。四時冰雪。陶陶孟夏。猶著弊裘。身是南人。何能堪此。每當穹廬夜起。服匿晨持。鳴鏑呼風。哀笳帶雪。蕭條一望。泣下沾衣。嗟乎。故人應爲淒咽。弟自出塞以來。萬端都謝。如泥中花蒂。無復芳菲。而懷友之思。未嘗棄懷。每憶曩年游好。輒便傷心。邯鄲宮人。嫁身廝養。而春花秋月。尙夢深宮。區區鄙懷。庶同此耳。昨歲冬至。巴公入都。曾勅長札。并排律。

三十韻奉寄兩兄。而此絳竟屬浮沈。可爲悵惘。龍荒絕遠。非人所居。夙昔知交。音問殆絕。謫此三年。止得公肅舊冬一札耳。少陵云。親朋滿天地。兵甲少來書。諷咏此詩。益增我勞結。弟久沈異域。語言習俗。漸染邊風。大雅惜惜。磨滅盡矣。方欲控弦試馬。作健兒身手。何堪尙與青雲故人。論疇曩之誼。述詩文之樂乎。高堂白髮。幸邀浩蕩。得還里門。弟雖滯冰天。亦當不恨。若得雞竿再下。早賦刀環。召李白于夜郎。還蔡邕于朔野。葛巾野服。返迹邱園。與我兩兄。促坐言哀。銜杯道故。此亦再世之樂也。嗣皇在御。才士畢升。努力良時。勿以故人爲念。老伯暨老伯母。應俱萬福。茲因程年兄歸南。勒此布心。相思之深。非筆所悉。遙瞻南斗。涕泗何云。

又

離別三年。關山萬里。冰天凜冽。積雪嵯峨。索處穹廬。軫憂終日。遙思我友。勞佇如何。去年遭難。吾兄屢顧我。若盧之中。銜涕摧心。慰藉倍至。等公孫之奔走。似田叔之周旋。愧荷深情。猶在心骨。廣陵佛舍。向與疇老杯酒終宵。班荆笑語。何圖此別。遂隔死生。永念曩游。寸腸欲裂。弟形殘名辱。爲時僂人。垂白衰親。盛年昆季。吁嗟何罪。相率播遷。旣無子幼。其豆之辭。而有文淵薏苡之痛。已同雀暉遼海之竄。而復坐李豐隴上之條。生世不辰。遭此奇酷。身流絕域。名入丹書。雖視息猶存。而已同枯骨。每一念及。忽不欲生。向在故鄉。意氣豪上。嘗歎庾子山。沈初明。以如許才筆。羈旅殊方。雖篇翰如新。而平生蕭瑟。每讀哀江南賦。及通天臺表。未嘗不掩卷欲絕。豈知今日。身丁枉濫。百倍斯人。魍魎爲鄰。豺虎同界。煩冤侘傺。誰可訴語。卽復

生平故人亦復棄如糞壤。視同腐鼠矣。不弔昊天。一何至此。昨歲出塞時。長安諸公哀其窮乏。餉以百金。稍得整料衣資。支離道路。及屆瀋京。便已懸磬。賴陳子長解衣推食。事事周全。揮涕贈金。情款綢繆。既將東發。復贈我鞍馬。以濟崎嶇。塞外之路。險甚蠶叢。紅鏞烏稽。十步九折。若非驥足。已委溝中矣。弟曩年知契。幾徧三吳。嵇阮之交。亦頗不乏。及遭患難。轉徙窮途。乃初無一驚款之人。周我涸轍。此古人所以致重于窮交也。放廢以來。萬緣都廢。惟雕蟲一道。猶尙纏綿。塞天無事。寂坐荆扉。斧冰炊稗。以充饑渴。所攜故篋。尙有殘編。每啜糜之暇。輒與龍眠諸君子。商確圖史。酬唱詩歌。街談巷曲。頗成一集。取揚子雲哀屈之文。命曰質籛。入秋以來。復事賦學。妄謂可以規模江鮑。接跡王揚。但負罪之人。爲時捐棄。縱調如白雪。才似和璧。亦將唾涕視之矣。彼才不逮于中人。名不出于里閭。一旦身躋雲霄。從容輦轂。雖復伏獵侍郎。金根校理。得其片言隻語。以爲韓歐復生。兄聞此言。得無駭其任誕乎。客緒邊愁。百端橫集。停雲之念。無時去懷。但恨元菟黃龍。渺在天末。不特把袂銜杯。難尋佳會。卽雁書遙訊。慰我離愁。亦眇不可得。十年神契。睽絕如斯。憶舊撫今。愴悵何已。杜少陵云。親朋滿天地。兵甲少來書。信非虛語也。懷念之什。頗有數章。欲便錄寄。以當良覲。恐此札達時。正兄等春明得意之日也。

譚瑩玉生覆校

秋笈集附錄

余弟漢槎自塞外貽書徐健菴以所著秋笈集奉寄今健菴函謀剞劂不負故交萬里之托余爲
愴然感泣賦此志謝

吳兆寬安人

嗟爾磊落倜儻之奇才。矯首南國雲烟開。青春翻飛摧羽翮。玉樹葳蕤委草萊。可憐九死身名在。風流文采使人哀。自昔一去遼城北。生入玉門無消息。華萼離居廿載餘。雲海茫茫隔顏色。我欲從之渡桑乾。冰雪嵯峨關塞黑。憶爾魂夢頻往來。容華憔悴恐不識。長風秋盡雁鴻飛。帛書繫足向南歸。吹墮庭前開尺素。合情緘怨淚沾衣。一札殷勤貽舊雨。謂健菴。感恩道故此中寓。鄭重新詩數十篇。展卷如向邊沙語。歷徧山川名狀難。開鑿鴻濛漸如故。雪窖冰天未足奇。山經水注那會數。軍書萬里度遐陲。獨限流人滯一枝。山鬼窈窕陰崖窟。魚龍嘯舞青海湄。屈原澤畔行吟苦。阮籍窮途祗自悲。黃沙白草供詞賦。並入君親朋友思。地非蒼梧麓。斑竹啼痕若可掬。身非蜀道行。月峽哀猿苦爲聽。壯歲沈淪頭漸白。空將詩卷傳荒磧。不遇知音識者稀。虛名千載誰相惜。世路悠悠幾歲寒。交態浮雲感今昔。東海先生金石心。鳳池結念無衣客。追憶平生涕泗流。撫恤患難心手盡。對此往復思纏綿。浩歌把酒欲問天。青蓮放逸夜郎日。學士文章海外年。奇文異響公天下。勿教蒼頡泣無傳。吁嗟才士遇與不遇安足論。立言要使垂久遠。莫嘆虞

翻骨相屯得一知己可不恨。

答徐健菴司寇書

兆騫頓首頓首。奉書健菴大兄先生足下。六月二日。驛騎至會寧。伏承書問。又以僕衣食之憂。輟俸相餉。爲德甚厚。至欲索僕生平譔著。付諸剞劂。無使泯沒。嗟乎。此豈僕素望所及哉。僕少時謬不自料。與海內諸賢。馳騫聲譽。維時足下兄弟爲先登。而僕竊附其後。選集鉅行。類蒙採入。今則顛連無告。不詳姓名。爲人唾弃。何敢復出其技。以爭鳴當世耶。遭難以來。十有八年。嬖時親友。罕以書見及。惟足下兄弟。及蕲溪少宰。倦念舊故。撫慰周恤。於義爲已過矣。又何可以窮愁之辭。重累左右。故三年前。足下貽書及之。而僕逡巡未敢應者。以此也。今足下終不鄙棄。復見徵取。乃識大君子之用心。而僕之妄自疑度。適爲固陋矣。然足下無乃賂僕往日。而不知僕枯槁之餘。豈復有葩華哉。古今文章之事。或曰窮而後工。僕謂不然。古人之文自工。非以窮也。彼所謂窮。特假借爲辭。如孟襄陽之不遇。杜少陵之播遷已爾。又其甚者。如子厚柳州。子瞻儋耳已爾。至若蔡中郎髡鉗剝塞。李供奉長流夜郎。此又古文人困阨之尤者。然以僕昧之何如哉。九州之外。而欲引九州之內之人。以自比附。愈疏闊矣。同在覆載之中。而邈焉如隔夜泉。未知古人處此。當復云何。以此知文莫工于古人。而窮莫甚于僕。惟其工。故不窮而能言窮。惟其窮。故當工而不能工也。萬里冰天。極目慘沮。無輿圖記載。以發其懷。無花鳥亭榭。以寄其興。直以幽憂惋鬱。無可告語。還托筆墨。以自陳寫。然遷謫日久。失其天性。雖積有篇什。亦已潦倒潰亂。不知其所云矣。詩曰。已焉哉。天實爲

之謂之何哉。夫知其當已而不能自己於吟者。此僕比日之心也。古之論文章者。不以其人之貴賤榮辱。今則不然。昔廬次榭與王李七子同時。其才固相軒翥。不幸下獄。其所撰蟻螻集。微元美諸公幾不著。因歎古今文人。觸扞網羅。不遇知己。卒以無傳者。可勝道哉。今海內理平。文治日盛。足下兄弟得位行道。天下文章。翕然歸于三徐。言論所及。藝林以爲宗。今不鄙僕。欲序而梓其所作。使天下知劫灰寒地。猶有燿光。則僕雖終淪廢。豈有恨哉。少作故有刻稿。患難後度已散失。請室諸咏。稍有存者。今所錄詩賦若干篇。皆已亥出塞後作。昨歲插哈喇之亂。倉卒中遺亡百餘篇。睽離日久。無所取正。恐日就棄陋。不復自知。望加刪定。以質當世。幸甚幸甚。兆騫再拜。

跋一

右集詩文共八卷。先君子漢槎先生所作也。先君少負大名。登順治丁酉賢書。爲仇家所中。遂至遣戍寧古。維時大父母在堂。先君忽離桑梓而謫冰雪。觸目愁來。憤抑侘傺。登臨憑弔。俯仰傷懷。于是發爲詩歌。以鳴其不平。雖蔡女之十八拍。不足喻其淒愴。此秋筮所由名也。崑山徐健菴先生。悲故人之淪落。千里命介。索其草稿。梓以問世。古人之交情。不以窮通少異有如此者。泊乎長白賦奏。而特邀當寧之知。沈宛昭雪。賜環歸里。張儉返于亡命。蔡邕召自髡鉗。推轂者總屬鉅卿。延譽者半由名士。方且謂一生抱負。抒展有時。何圖乍入玉門。遽捐館舍。鄙人所以抱恨終天也。今楹臣年過六旬。追思往日。幾同隔世。傳曰。先祖無美而稱之。是誣也。有善而勿知。不明也。知而勿傳。不仁也。楹臣愚蒙不肖。旣不能發名成業。以顯揚我先君矣。敢復蹈不仁不明。致使先君沒沒于後世哉。爰就舊刊。增以家藏。析爲八卷。彙成一集。其前四卷。係健翁所刻。後四卷。則楹臣所增也。後集爲成所暨歸來所作。前集及雜體詩二卷。皆少年所作。序表書記。則合新舊所抄輯而成。不分年月日。蓋先君垂髫之歲。卽好吟咏。加以身際艱難。著作頗富。奈屢丁顛沛。存者無幾。當健翁索稿之先。值有老羌之警。遺失過半。後遇插哈喇之亂。都統唐公。限三日內。合城滿漢。俱遷至必兒汀。避難。及扶柩南還。復覆舟于天津。而沈溺者。又過半。今此所補。皆從故舊處搜羅所得。殆未及十之一二。至于駢麗之體。向與陳陽羨齊名。乃集中所有。僅此數首。尤可痛惜。聞之崑山某氏。

收貯頗多。機臣曾力爲尋訪。而已移居村舍。然終當物色。以成全璧。是則鄙人之素志也。是役也。其訂証校讐之功。姪恆叔之力爲多。亦不可不記。雍正丙午秋八月男機臣謹跋。

跋二

右秋筵集三卷。西曹雜詩一卷。前集一卷。雜體詩一卷。後集一卷。雜著一卷。共八卷。國朝吳兆騫撰。按兆騫字漢槎。吳江人。蘇州府志稱其少有雋才。與慎交社名聞遠近。順治丁酉。舉於鄉。以科場蜚語。逮繫遣戍寧古塔。康熙辛酉。徐健庵司寇爲之納鍰。放歸田里。亦成容若侍御力也。徐菊莊續本事詩。稱漢槎騫才絕豔。數奇淪落。萬里投荒。驅車北上時。嘗託名金陵女子王倩娘。題詩驛壁。以自寓其哀怨。兩河三輔間。多有和者。故計改亭詩云。最是倩娘題壁句。吳郎絕塞不勝情。詩今載集中。則爲豫章劉素素。倩娘其姊云。夫漢槎以美才獲雋。偶緣蜚語。遂罹重譴。固見當日功令之嚴。而國初諸老如徐健庵。王漁洋。宋商邱等。於其在獄。出塞。入關。均各有詩。憐才雅意。尤不可及。至顧梁汾。金縷曲二闋。則更沈著真摯。非血性男子不能作。然余尤服膺者。則吳梅村悲歌贈吳季子七古一首。如淒風驟雨。雲颯而來。殆兼感遼左故人陳素庵相國事。故言哀入痛歟。相國固與漢槎同時遭戍者也。梅村詩原評。稱漢槎極人世之苦。然不如此。無秋筵一集。其人恐不傳。天之阨之。正所以傳之也。諒亦國初諸老之筆。噫。天欲傳之而定阨之乎。其然。豈其然乎。哀其遇。特出藏本重梓之。校畢爲之黯然。咸豐壬子。上元後二日。苦寒。南海伍崇曜謹跋。

王雲五主編
叢書集成初編

秋 笈 集

附二
錄冊

中華民國二十四年十二月初版

撰者 吳兆騫

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

0六二七九五

平



33
4
2190